

MATIYU

Kaviyak o Colai Ayeet Matiyu

Akunak ñeerti Joowo looc alye ci eet ci deer

1 ¹ Zaar ci òl ween jijitigi Yesu ween Kiristo ween dole ci dól o Devid ween ñeerti Ibrayim o kare naaga òl o Juz nòono ka kiiya neen ce. ² Ibrayim baale baati Aizak. Aizak baati Jakob. Jakob baati Juda ki ñeerigin oogi. ³ Juda baati Paraz kibeen Zera ween yaatineej neen Tamar. Paraz baati Ezron. Ezron baati Raam. ⁴ Raam baati Aminadab. Aminadab baati Nacon. Nacon baati Salmon. ⁵ Salmon baati Bowaz baal kazi yaatin ne Reyab. Bowaz baati Obéd baal kazi yaatin zaar ne Ruz. Obéd baati Jesi. ⁶ Jesi baati alaan o kazi Devid.

Devid baati Solomon. Yaatine baale rak ñaa ci eet o kazi Oraya. ⁷ Solomon baati Riyoboyam. Riyoboyam baati Abija. Abija baati Asa. ⁸ Asa baati Jeyozivat. Jeyozivat baati Joram. Joram baati Uziiya. ⁹ Uziiya baati Jotam. Jotam baati Eyaz. Eyaz baati Izakiya. ¹⁰ Izakiya baati Manasa. Manasa baati Amoon. Amoon baati Josiya. ¹¹ Josiya baati Jikoniya ki gotónogi baal aritai waan baal agamin òl o Israyil, ma avóyi òl nòogó looce o kazi Babilan e.

¹² Zin vurma mazi akó agamnyi òl o Israyil, ma avóyi òl nòogó Babilana, Jikoniya ook izi baati Selitil. Selitil baati Zarubabel. ¹³ Zarubabel baati Abiyud. Abiyud baati Iliyakim. Iliyakim baati Azór. ¹⁴ Azór baati Zadok. Zadok baati Acim. Acim baati Eliyud. ¹⁵ Eliyud baati Eliyezar. Eliyezar baati Maatan. Maatan baati Jakob. ¹⁶ Jakob baati Josev ween eet o Meri ween yaati Yesu ween Kiristo.

¹⁷ Izi zin bulowa ci wóto dook amóto wec akanai ñaati Ibrayim zee been Devid. Bodo akanai ñaati Devid zee been iiten baal agamin òl, ma avóyi òl nòono Babilana e bulok amóto wec. Bodo akanai iinyaye baal agamin òl e zee been iiten baal aritan Kiristo e bulok amóto wec.

Tiryan o Yesu

¹⁸ Zin Yesu Kiristo aritai gole ci abil kete. Baale yaatin Meri agam eeti ci kazi Josev ka kiriyi. Mazi ñaan kitivica niini nòono, bar ajowa Meri ele anyake dolece ci anyononek Vónjize o Joowo. ¹⁹ Maje Josev baale niini eet ci abon, ma alañ aróonj kóbórak òl nyayiin ci Meri o, bar abaaban olla aróonj kotonj nòono nòko yóot calañ akólak alyaan. ²⁰ Mazi ñaan abaaban niini gi nico, iiyak nòono toonnyaiti ci Joowo wunozyai, ma aku anak ne, “Josev, borit o tatok o Devid, má abur Meri ñaati avicane kizi ñaa cun gaga, eeci dole ci anyak niini keña noko anyek nòono Vónjizi o Joowo. ²¹ Arita tiñeere logoz, ma akanei zaar ci kazi Yesu, eeci aku niini ka kiiya keela òl ogin baciinowe.”

²² Akatai ni didi kaal nicigi kezédjai dook keleeemte ebaal aduwake Jooi nyakañan zooze o ane ne, ²³ “Anyake katin kabarzeci oman gole ci abiiirni òl ooti, ma arita logoz, ma akanonek katin nòono zaara ci kazi Imanawil.” Keñ ci zaar nicoko kazi ne Aavi Jooi ñaatinaí.

²⁴ Mazi akó añaaz Josev oonnyai, iya didi ook itivica Meri eona aduwaki toonnyaiti o Joowo nòono e. ²⁵ Mazin iinya ci baal anyayin Meri neke dook ñaan koromte Josev ki nòono kizi ñaa ki eet zee ma akó ookcai. Mazi ookcai dole, akatek Josev nòono zaar ci kazi Yesu.

Adiñdñan òl ci ageny Yesu

2 ¹ Aritai zin waanice Yesu kuture o kazi Bezilem looce o kazi Judiya irkite o eene Erod alaan. Ñjintimiliny nòko ivita òl ogene ole o goon iyez kaal monyonye libire ci jenu o ivitak Jerusalem. ² Ma avu ajine azi ne, “Aavi logoti o aritai ka kizi alaan unoonj Juz ñaadañ? Ayelzai monyatot onine kicinta libire ci jenu kabaaka naaga e. Zin kanowana ka kiiya kidiñdñanta nòono.”

³ Mazi akó azii Erod ween alaan kibeen òl dook Jerusalema zóoz nico, ivirit nòogó zinzeeti óróot ele. ⁴ Ma awa Erod alaati o ceez o Joowo been alaati o demziinto ñaatodoi, ma ajin nòogó genyiza anak ne, “Kiristo aritai dim katin ñaadañ?”

⁵ Ma abedeke niigi nòono anak ne, “Aritai katin niini kuture o kazi Bezilem looce o kazi Judiya. Anyak baale nyakañan ci ayeet zóoz ci ane Jooi ne, ⁶ Ineeta kutur o kazi Bezilem o abil Judiya adiñdñan niina óróot, eeci aritai katin ñaatun alaani ci ka kiiya kabal òl ogan Israyil.”

⁷ Otowa ni Erod òl o avu libire o jenu e ka kóot kozoozo ki nòogó ñaatineej doon, ma aku ajin niini nòogó iiten ci da acini niigi monyatot ci tiryan ci dole ci ka kizi alaan ci Juz o. Ma aduwak niigi nòono iiten ci baal acini niigi monyatot o. ⁸ Ma anak Erod nòogó genyiza ne, “Óoto zin oroonj dole nico Bezilema juruj zee mazi ajowanu, ivita buk uduktayan aneeta ka kook kidiñdñan buk naana nòono.”

⁹ Mazi adotiz zooze ci ona aduwak alaani nòogó o, ótoóto. Ma gola icinit niigi bodo monyatot baal rak acin e ele. ¹⁰ Ma atalne niigi óróot ele. Ma oontane monyatot nici nòogó ñuma nòko zee ma akó abil ñaati ona aave dole o ele. ¹¹ Ñjinaante mazi avó niigi ceenza eecito, acin dole ki yaatin Meri, ma akani niigi kozonji looc adiñdñan nòono. Okolit ni kaboot ugeec anyak e, ma anyek niigi nòono kaal ci titiny, warki ki karacenen been karkaret.

¹² Uduwak ni Jooi nòogó wunozyai gi calañ amiironeke Erod. Ma ñeere imiirte didi niigi gole oman wóot looce uneej calañ adiiir Erod.

Aviri Josev ki Meri dole avóyi Masire

¹³ Ma vurte o imiirtó òl nica, iiyak toonnyaiti ci Joowo Josev wunozyai, ma aricanek gi ci anak ne, “Tiña je! Dókonyi dole ki yaatin bití Masire. Bitó aavu ñjinaante zee ma kanekin ne, Bada bodo, eeci tiñeere Erod aróonj dole ka kuruk kadaak.” ¹⁴ Itiña ni Josev ecodoi nòko iyit dole ki yaatin baaline nico ele ooyi Masire. ¹⁵ Ma akó abaak ñjinaante zee ma adaai Erod. Zin gi nici agooni o ka keleeeme zóoz baal azi Jooi nyakañane onin ne, “Kotowa ñeeran Masire ka kimiirozek looc baal aritan e.”

Arɔɔŋ Erod kuruk Yesu

¹⁶ Mazi ako aga Erod ɔl baal avu libire o jenu e alaba da bar nɔɔnɔ, otobor nɔŋ ɔɔɔt ele. Ma aricanek takirnya kɔɔt kuruyit dɔl o miliny macik anyak irkitok ram been o miliny ter ŋaan aritai Bezilema been vitenane o aɔŋɔɔ dook. Agɔɔn Erod nɔkɔ o, eeci aduwak ɔl baal avu libire o jenu e nɔɔnɔ zɔɔz ci anek ne, “Izi irkitowa ci ɔɔtɔ iiten baal kacina monyatot e zee been inoko o ram.” Gi ci zin aruyi Erod dɔl ci miliny anyak irkitok ram been o ŋaan kurumit irkitok nicoko o neen.

¹⁷ Zin giye o aruwen dɔlya kadaayitɔ Bezilema eleemnyai zɔɔz baal aduwa nyakaŋani o kazi Jirimaya e didi. ¹⁸ Azi baale niini ne, “Iziye mɔlɔyi ci aluweki Recal dɔl ogin kuture o kazi Rama nunun. Aboobi niini nɔkɔ zee ma alaj ajaki been neen, eeci dɔlya ogine dook adaayitɔ.”

Abadaak Josev ki Meri been Yesu Nazaret

¹⁹ Mazi ako adaai Erod, iiyak toonnyaiti ci Joowo Josev wunozyai Masire. ²⁰ Ma aku anek nɔɔnɔ ne, “Tiŋa je. Miirɔi dole kibeen yaatin biti looce o Israyil. Eeci ɔl baal arɔɔŋ kuruyit dole kadaak e adaayitɔ.”

²¹ Itiŋa ni Josev iyit dole ki yaatin abadake looc o Israyil. ²² Bar mazi ako azii bodo niini Arkiloz irigiz alaazet o baatin Erod abalun Judiya, ɔɔŋɔle niini ŋaati ako abaai ŋinaante. Zin buk itilo Jooi nɔɔnɔ gɔla wunozyai laadun ka calaŋ ako Judiya. Ook ni niini abaak looce o kazi Galili. ²³ Aruwek niini kɔɔk looc kuture onin kazi Nazaret. Itiroyai ni Yesu ŋinaante zee ma adikir, ka keleeme gi baal aduwa nyakaŋani azi ne, “Katin aga ɔl dook niini eet ci Nazaret.”

Uuwak Jɔn o oonyi baliin o Joowo

3 ¹ Ma vurtu irkitowe ogen iiya eeti ci kazi Jɔn o oonyi, ma akana niini uuwayi balala looce o kazi Judiya. ² Agereny niini iinya dook anek ɔl ne, “Otoŋit baciinok ugooc ger agoonu, eeci baliin o Joowo izi ajɔn.”

³ Jɔn zin neen baal aduwa nyakaŋani o kazi Izaya e. Azi baale niini ne, “Agereny eeti oman balala azi ne, Idimdimantek Manyi gɔl onin. Amadek nɔɔnɔ golok ogin keelit tɔp.”

⁴ Ma Jɔn nici waanice aborcek niini rumane ci agɔɔnnyai imane ci nyakaletu. Ma anyak kavali ceen ruceen barkɔnya, ma adak niini giroc ki lete kizi dayiin cigin neen.

⁵ Ma avunak ɔl dook nɔɔnɔ Jerusalema ki Judiya buk kibeen vitene o aɔŋɔɔ liil o kazi Jordan dook. ⁶ Ma avu abad niigi mony baciinowe ugeec, ma oonyi niini nɔɔɔɔ liile nico.

⁷ Mazi acin Jɔn ɔl o kazi Parici kibeen ɔl o kazi Sajuzi avunak nɔɔnɔ ka kivita kicinit kaal ci agɔɔn niini o, enewun nɔɔɔɔ ne, “Igeet dɔl ci kokonyawu koko! Ŋeneen ci ilotuŋ ka odokonyit bornet noŋe o Joowo ka kiiya tiŋeere neke o? ⁸ Abon zin agoonu kaal ci abon ci ayeleza gi ci utuŋtu niiga kaal o ger didi. ⁹ Má bar anonu ne, Keegina dɔl ci dɔl o Ibrayim. Didile kaduwakuŋ igeet, Jooi anyak dɔyiz ci ookci biyen nico kiziti dɔl ci Ibrayim labak. ¹⁰ Eelnu niiga kiyo keena. Olla zin inoko meleyi o payiin o Joowo erewɔ ka keecawuŋ loota kiyo keeca keet o. Gɔɔn zin laadun keet calaŋ arek kebere ci abon, ateedjak looc, ma akanonek goo.

¹¹ Kuunyuyɔ zin inoko naana igeet maami doon ka keyelizyai badi mony o baciinok ugooc. Bar anyak eet oma ci ŋaan aku ka kiiya kotoony ɔl oogi ŋaatonooŋ Vɔŋize o Joowo, ma apayek oogi goo. Adikir niini ɔɔɔt kujukan aneet. Ma alaj kaganona kanyayek naana nɔɔnɔ caava ogin zoonu. ¹² Anyaa niini luli ci areke labi ŋɔɔt ka keŋer labi ki jululu. Ma arek labi kebere karat, maje jululu avaat gooye o alaj adiiti been neen.”

¹³ Ma iitene nice iiya Yesu looce o kazi Galili. Aku ako ŋaati Jɔn ka kook kotoony Jɔn nɔɔnɔ liile o kazi Jordan. ¹⁴ Maje Jɔn arɔɔŋ kujura ŋaati oonyi nɔɔnɔ, eeci aga niini anyak Yesu dɔyiz ci appe kujuk nɔɔnɔ. Ma anek Jɔn nɔɔnɔ ne, “Alaj agano ŋaati kuunyin naana ineet, bar karoonyin ineet toonyan aneet.”

¹⁵ Ma abedeke Yesu nɔɔnɔ anek ne, “Anyek kibil kiyo kaduwakin noko. Abon kagɔɔn naaga nɔkɔ rak ka koolyai gi o arooŋekan Jooi aneet kutugu.” Agama ni Jɔn zɔɔz nico, ma oony nɔɔnɔ. ¹⁶ Mazi ako adotiz toonyenta, ɔyɔyay Yesu maami, ma akole tammu keŋ, ma acin niini Vɔŋiz o Joowo ŋaati akunake looc kiyo yeelac o, ma aku abil ŋaatin. ¹⁷ Ma azi mɔlɔyi ci aku Joowa tammu tadena ne, “Ŋeeran onan kareez neen nici. Katalne naana ŋaatin ɔɔɔt ele.”

Arɔɔŋ Loryen kuulal liŋliŋɔn o Yesu

4 ¹ Iyit ni Vɔŋizi o Joowo Yesu ooyi balala ka kook kicina Loryenti nɔɔnɔ. ² Mazi ako aavi niini ŋinaante kɔkɔm dayiin iinya eet ram been baalinok eet ram, aburek nɔɔnɔ magiz ɔɔɔt ele. ³ Iiyak ni Loryen nɔɔnɔ, ma aku anek ne, “Mā een didi ŋeerti Joowo, towo di biyen nicoko kizi dayiin.”

⁴ Abedeke Yesu nɔɔnɔ anek ne, “Akɔm! Azi waragewi o Joowo ne, Alaŋ eeti ci deer arogni dayiin doon, bar buk arogni niini zoozok o aduŋna otoge o Joowo.”

⁵ Itiŋawi ni bodo Loryen Yesu ŋinaante ooyi Jerusalema, ma ako atɔɔdi ceez o Joowo taden. ⁶ Ma anek nɔɔnɔ ne, “Mā een ŋeerti Joowo didi, kul di ŋinaanto taak tɔɔɔ, eeci azi waragewi o Joowo ne, Ŋaan itoona Jooi toonnyak ogin ka kivita katabuŋtawin niigi ineet calaŋ iinai looc kuruktin biyen zɔɔ.”

⁷ Abedeke Yesu nɔɔnɔ anek ne, “Akɔm! Azi buk waragewi o Joowo ne, Má acina Jook ween Manyi unun.”

⁸ Itiŋawi ni Loryen Yesu ŋinaante bodo ooyi biye ci wun kal, ma ako ayelek nɔɔnɔ diŋdiŋɔn o baliin o loocu dook. ⁹ Ma anek niini Yesu ne, “Mā akane kozoŋti looc, ma adiŋdiŋanan aneet, kanyin koca kaal ci acin noko dook kizi cugun.”

¹⁰ Ma abedeke Yesu nɔɔnɔ anek ne, “Ineet Loryen, nyeye ŋaatan! Azi warage o Joowo ne, Idiŋdiŋanit Jook ween Manyi unooŋ. Iliŋliŋtozek nɔɔnɔ doon.”

¹¹ ɔɔɔ ni didi Loryen ŋaatin, ma avu toonnyawa o Joowo, ma avu atirit Yesu.

¹²⁻¹³ Ma iitene oman mazi ako azii Yesu acabit ɔl Jɔn, itiŋa niini imiurozek kutur o kazi Nazaret abil Galiliya, ma ŋaan buk kook komon ŋinaante ŋinti wun, bar idicek ook abaak kuture o kazi Kapernam abil liil o Galili otoga ŋaati aɔŋɔɔɔ ki loocok o kazi Zebulon been Navtali.

¹⁴ Ma ako uuwak niini ŋinaante ka keleeme gi baal aduwa nyakaŋani o kazi Izaya baal ane ne, ¹⁵ “Loocok o kazi Zebulon kibeen Navtali noko eel liil o Jordan baagita looce o kazi Galili abaayi ɔl o Juz kibeen buk moden oogi. ¹⁶ Ma ɔl o abaak muure o anyak daayiz ŋinaante acin iima vooritin ci appe ɔɔɔt.”

¹⁷ Ma iitene nice akata Yesu uuwayi onin anek ɔl ne, “Otoŋit baciinok ugooc, eeci baliin o Joowo izi ajɔn.”

¹⁸ Ma iinyaye niceke mazi ako awo Yesu liil o Galili otoga, icin niini ol ceen ram adete cabaya, Saiman o kazi Pitör kibeen Andoru ween gõtöni. ¹⁹ Ma anek Yesu nõõgõ ne, “Ivita korkorit ki aneet. Ñaan kako kademezuñ igeet ka edetit ol ci deer ka gõon anyaahtak nõõgõ Jook.” ²⁰ Enico ele otõttek niigi cabayet ugeec e looc, oneec nõõgõ.

²¹ Mazi ñaan awo niigi ñintimiliny nõkõ, acin Yesu bodo ol oogi ceen gõtön een ram, Jemis ki Jon. Aromë niigi kibeen baatineej ci kazi Zebedi kavoola. Acap cabayet juruñ ka kedetit. Ma awa Yesu nõõgõ. ²² Enico ele otõttek niigi kavool kibeen baatineej looc, ma ərkor kibeen Yesu.

Uuwak Yesu kaviyak o Joowa, ma arogoz ol moorizowe

²³ Ma azõp Yesu Galili dook ademez ol ceezine o ol o Juz lotento, ma uuwak kaviyak o abon akati baliin o Joowo, ma arogoz niini ol ci olla ajowa moorizowe ci meelik keñti ger. ²⁴ Ma avõ kaviyawa cigine o kõt kiziikte looce o kazi Siriya reena many. Ma anyaahtak ol nõõgõ ñinaante ol ci anyak moorizok kebere dook ka kiiya korogoz niini nõõgõ. Ma arogoz didi niini ol nicoko dook, mayo nuun een ol o anyak miniñ ci Loryento ki ol ci abice ki ol ci rebrebik arogoz buk. ²⁵ Ma ano nõõgõ ol ci meel Galiliya ki Dekapolisa ki Jerusalema ki Judiya been ol o abaak liil o Jordan baagita.

Baayiz o arõñ Jooi

5 ¹ Mazi ako acin Yesu kõle ci meel avunak nõõgõ nõkõ, ɔtɔt be, ma ako aavi loota be ɔwa. Ma avu aliya nuyawa ogine nõõgõ kau. ² Ma akana niini demziin ci ademzi nõõgõ azi ne,

³ “Amayuwi ol o arõñ gõl o Joowo, eeci baliin o Joowo izi cineej. ⁴ Amayuwi ol o abad mony zinzeetine kaale ugeec agoon, eeci tiñeere azoosok Jooi nõõgõ. ⁵ Amayuwi ol o acelbezan eleeti, eeci tiñeere ajowa niigi kaal o aterkedek Jooi nõõgõ.

⁶ Amayuwi ol o arõñ kuzuuti zõz o Joowo doon kujuk kaal dook loota, eeci ñaan atirit Jooi nõõgõ kutuguzõ kaal ci abon.

⁷ Amayuwi ol o awucnek gõnõgja ogen, ma alañ acaca kaal o ger agoonek ol nõõgõ, eeci buk tiñeere awucnek niigi Jook. ⁸ Amayuwi ol o iimi zinzeeti ñaaten Jook, eeci tiñeere acin niigi Jook. ⁹ Amayuwi ol o aliñliñ ganõn òla, eeci tiñeere anyek Jooi nõõgõ kizi ðõl cigin een didi. ¹⁰ Amayuwi ol o agide giye o agooni kaal o aricanek Jooi nõõgõ kutuguzõ, eeci baliin o Joowo izi cineej.

¹¹ Amayuwenu niiga, eeci gõon amezu dominet ki giden o akanuñ ol igeet vòlõña giye o anuyañ niiga aneet. ¹² Amayuwenu niiga ɔtɔt ele, eeci azoonekuñ Jooi vɔyit ci appe ɔtɔt tammu tadena. Agaac zin buk baale nyakañaneta o Joowo amez giden kiyo niiga noko.

Aduwa Yesu yabziin ci akati mele

¹³ Eelnu niiga kiyo mele o òla dook loota ñina. Bar zin gõon mã idicai mele mokcarõnti, akõm bodo gõl oma ci ka kanyeke komokcar been neen. Izi gerze nõkõ zee ma ajukonek tuu kizi gi ci labak, ma arõc ol zõõne.

Aduwa Yesu yabziin ci akati vooritin

¹⁴ Eelnu niiga kiyo vooritin o modeni dook loota ñina. Gõon kuturi ci eenycal be ɔwa, alañ aroodi ñaati acini ol been neen.

¹⁵ Akõm eet ci atokol lamba muura, ma abuñ ija. Bar atokol, ma anyek kataraan ceez keñ dook. ¹⁶ Abon zin buk niiga ataranu ol dook loota ñina kaale ugooc abon agoonu ka kanyek niigi baatinai o aavi tammu tadena zany bonate unooñ.

Agamit zõz o Joowo gole ci abon

¹⁷ Má abaabanu aziyu ne, Kakun ka kiiya kuulal warage o Joowo. Akõm! Alañ kakun ka kiiya kutugu nõkõ, bar kakun ka keleeemnyai keñti ci zoosok o ayeedi waragewe o Joowo keelit tɔp. ¹⁸ Didile kaduwakuñ igeet, ako zee ma aṭorneke tammu taden ki tɔɔ, akõm lotinowe nicoko ñintimiliny ter aaryai been neen zee ma iina kaal o aduwa Jooi waragewe onin dook. ¹⁹ Ma eeti ci acelbezan lotinet ci miliny lotinowe o Joowo, ma bar anyek kizi gi ci miliny labak, ma ademez gõnõgi oogi kutuguzõ kiyo niini o, acelbezeni buk katin niini baliinte o Joowo kizi gi ci labak. Maje eeti ci azooni lotinok nicoko, ma ademez gõnõgi oogi kuzuuti kiyo buk niini o, adiññani buk katin niini baliinte o Joowo nõkõ. ²⁰ Kaduwakuñ zin naana igeet, mã alañ abonanu ɔtɔt zinzeetine ugooc ujukit bonat ci ol o Parici kibeen alahtak o ademzek ol lotinok, alañ avoyu baliinte o Joowo been neen.

Demziin ci akati bornet nõñ

²¹ Aziññu baale gõon azi keerita ogaac ne, Má amuny eet ci deer. Mã alam eet ci amony eet ci deer, abon anyaahtak rooni. ²² Bar zin naana kanekuñ ne, Mã alam eet ci olla abornek gõn nõñ, apawonek nõõgõ gerzitin. Mã anek eeti gõn ne, Olla niina arogi gaga, akõm gi ci ka doma, abon apawonek buk nõõgõ gerzitin. Maje eeti ci anek gõn ne, Een niina aliyai ci ðõmðõm, ajukonek niini goo o Loryento.

²³⁻²⁴ Zin gõon mã anyak gi ci arooñ ka taabi Jook ñaaõ taabinto, ma anyak da eet oma ci abornekin nõñ, toñek rak gi ci ona anyaahtak Jook noko looc ñina, iyiik rak ɔtɔ idica ki gotonu gi ci abornekin niini ineet nõñ o zee abada ni ka ija taap Jook.

²⁵ Mã anyak eet ci arõñ kooyin ineet rooni, abon aminyu niina ki nõõgõ idica gi nico taman gõla ñina ele ñaati ñaan urumti rooni. Mã alañ agoon nõkõ, akoyin koca niini ineet alaane o roonnyo, ma ñinaante anyek alaani nici takirnya kõt kacaptin ineet.

²⁶ Didile kaduwakin ineet, mã ñaan ruk karama, alañ koca oogjai been neen.

Demziin ci akati zoocmaz

²⁷ Aziññu baale gõon azi keerita ugooc ne, Má adoma zoocmaz. ²⁸ Bar zin inoko kaduwakuñ naana ineet kanekuñ ne, Mã anyak eet ci olla acin ñaa culu alina, ma arõñ ziniza keleeemto ki nõõgõ, utuguzõ bar niini zoocmaz ki nõõgõ odota ñume o Joowo. ²⁹ Zin mã abacakin kebereci cune azo o gi ci ger, kata bitaala kodowiwin kebereci. Abon bar ñaati adowinin kebereci kujuk ñaati anyaye kebereci dook, ma ajukonek ele dook goo o Loryento eeci. ³⁰ Mã anyin aziiti cune azo o baca baciinok, teedak bitaalin jukek tuu. Abon bar ñaati adowinin aziiti kujuk ñaati anyaye azeen dook, ma ajukonek ele dook goo o Loryento.

Demziin ci ɗaa ci aaryai

³¹ Aziinnyu baale gɗon azi keerita ugooc ne, Mā atɔok eeti ɗaa cin, abon ayeedak niini nɔɔɔ warage ci aryanto. ³² Bar zin inoko naana kanekuɗ ne, Mā atɔok eeti ɗaa cin gaga nɔko ɗaati alaɗ agami zoocmaza, ma ako ariyi ɗaa nico bodo eeti oman, anyek niini ɗaa nico kodoma zoocmaz. Buk eeti ci ariyi nɔɔɔ o odoma zoocmaz.

Demziin ci akati gi ci kitooni Jook gaga

³³ Aziinnyu baale gɗon zɔɔz ci azi ne, Má itoonu zaar o Joowo gaga. Bar mā itoontu Jook, abon didi agoonu gi nico. ³⁴ Bar zin inoko naana kanekuɗ ne, Má itoonu Jook been neen. Buk má itoonu tammu taden, eeci tammu tadena ɗino abaai Jooi alya neen. ³⁵ Buk má itoonu tɔɔɔ, eeci tɔɔɔwa een ɗino ataadek Jooi zɔɔ neen. Buk má itoonu Jerusalem, eeci een kutur o alaan o adikir neen. ³⁶ Má bar buk itoonu eleeti ugooc maany, eeci alaɗ niiga aganeku otoweec imitat codoi ɗɔr ootine cugooc o kizi vɔɔr, karabɔɗ kizi koli. ³⁷ Olla gɗon iziti ne, Yɔɗ, karabɔɗ aziyu ne, Akɔm! Eeci zoowawa ogen ci aroonnyu udukta neke avu Loryenta.

Demziin ci akati cacinet

³⁸ Iziiktu buk baale azi ɔl ne, Mā akana eeti gɔn keberec, akata buk nɔɔɔ keberec. Mā aliba eeti gɔn nyigitat, ilibta buk nɔɔɔ nyigitat. ³⁹ Bar zin naana inoko kanekuɗ ne, Mā agoonekin eeti gi ci ger, má acaca been neen. Mā arookin eeti voret ci azo o, towek bodo ci kaɗeto o. ⁴⁰ Mā akoyin eeti oman rooni arɔɗɗ kaamawin rum unun zinzeetinu, anyek buk nɔɔɔ rum unun malkinto. ⁴¹ Mā aroonnyin takirenti oman nyayek nɔɔɔ ijo cigin dɔyiza ɗintimiliny, nyayek nɔɔɔ ɗinti wun kal. ⁴² Mā anyak eet ci alayin gi ci alayin, ma anyei niina gi nico, anyek nɔɔɔ labak. Buk mā arɔɗɗ eeti gi ci ako alinɗiɗi zee ɗaan abadakin tiɗeere, anyek nɔɔɔ labak.

Ereezit ɔl o amarninuɗ

⁴³ Aziinnyu baale gɗon azi keerita ugooc ne, Ereezit laɗotugooc doon! Otoborit ɔl o amarninuɗ igeet! ⁴⁴ Bar zin inoko naana kanekuɗ ne, Ereezit buk ɔl o amarninuɗ igeet. Ijintek buk Jook ɔl o agiduɗ. ⁴⁵ Mā agoonu nɔko, izitu koca niiga didi dɔl o baatunooɗ o aavi tammu tadena. Eeci anyek niini ii kuduna, ma ataran ɔl o abon kibeen ɔl o ger buk. Ma anyek buk niini tammu taden kitiilak maam ɔl o abon ki ɔl o ger dook. ⁴⁶ Mā areezu ɔl o arezuɗ igeet doon, alaɗ koca atitinyuɗ Jooi igeet, eeci ɔl o gerze agɗon gɗon buk niigi nɔko. ⁴⁷ Mā azaayu laɗotugoocok doon, anyak gi ci utuguzu abon kujuk kaal o agɗon ɔl o alaɗ atuwe tɔ? Mayo nuun een ɔl o alaɗ atuwe gɗon buk agɗon niigi nɔko. ⁴⁸ Abon zin niiga areezu ɔl dook ɔɔɔ kiyo buk baatunooɗ o aavi tammu tadena o.

Demziin ci akati irken ween didi ole ci amaat

6 ¹ Egenyit! Má alinɗiɗiɗi niɗiɗiɗi o Joowo ɔl kɔrgena ka olla bar kicinini niigi kaal ci agoonu o. Mā agoonu kaal ci eel nɔko ɔl kɔrgena, alaɗ ajowanu vɔyit ɗaati baatunooɗ o aavi tammu tadena been neen.

² Zin gɗon mā aroonnyu itiritit eet ci amaat, má abɔraku ɔl dook kiyo gɗon agɗon ɔl o ayelza eleeti o. Agɗon gɗon niigi kaal ci abon ceezine o lotento kibeen golowe ka katanaazɔ ɔl nɔɔɔ kaale nicoko. Zin giye nico abon agayu niiga uruktozek nɔɔɔ vɔyita ugeec dook loota ɗina odota. ³ Bar zin gɗon niiga mā atiritu eet ci amaat, itiritit nɔɔɔ gole ci laɗotugooc o orkoryu alya alaɗ aga been neen. ⁴ Anyek gi nico kizi gi ci agaya niiga doon. ɗaan aruwekuɗ igeet vɔyit o agoonu nɔko baatunooɗ o acin kaal nicoko roodinta.

Demziin ci akati ɗaryiin zinize ci abon

⁵ Gɗon ma ajinu Jook, má eelnu kiyo ɔl o gɗon arɔɗɗ ka keyelizta eleeti ɔla o. Areez gɗon niigi ɗaati eelni jena ɔl kɔrgena ceezine o lotento been golowe, ma ajin Jook ka kicinini ɔl nɔɔɔ. Abon zin agayu niiga uruktozek nɔɔɔ vɔyita ugeec loota ɗina odota. ⁶ Bar zin niiga mā gɗon aroonnyu ijiniit Jook, ɔɔɔ ceezine ugooc eeciɔ, onyoogit karogi. Ijintu ni baatunooɗ o aga kaal dook. ɗaan anyuɗ niini igeet kaal o aroonnyu ɗaaten nɔɔɔ o acin kaal o agoonu niiga roodinta dook.

⁷ Gɗon mā ajinu Jook, má aduwanu zoowok ci wuntik akɔm keɗti kiyo ɔl o alaɗ atuwe gɗon abaaban niigi anɔ ne, Coma azii Jooi ɗaryiin cineen wun o. ⁸ Má zin eelnu kiyo niigi o been neen. Eeci baatunooɗ aga kaal o aroonnyu niiga rogete unooɗ laadun ijaan buk ijiniit niiga nɔɔɔ. ⁹ Zin gɗon ma aɗaryinu, aɗaryuɔ gole ci atobɔ kibeen co. Baatinaaɗ o aave tamma, anyek ɔl kidiɗiɗiɗiɗi zaar ugun. ¹⁰ Anyek baliin unun kiya. Anyek roonjinet unun kutuguwe loocowe kiyo tamma o. ¹¹ Nyet dayiin onaaɗ iiten codoi waanico. ¹² Toɗ baciinok ogaacak kiyo kuɗna kaal o abaca ɔl ɗaatinaaɗ o. ¹³ Nyet dɔyiz ka calaɗ acinanet kaala o gerze.

¹⁴ Mā ooɗneku niiga ɔl oogi kaal o abaca ɗaataunooɗ, ooɗnekuɗ buk baatunooɗ o aavi tammu tadena igeet kaal ugooc abacanu. ¹⁵ Mazi alaɗ ooɗneku niiga ɔl oogi kaal o ger agoonekuɗ niigi igeet, alaɗ buk koca baatunooɗ o aavi tammu tadena ooɗnekuɗ igeet kaal o abacanu been neen.

Demziin ci kooɗni dayiin zinzeetine ci abon

¹⁶ Gɗon mā uuɗnu dayiin ka idiɗiɗiɗiɗi Jook, má anyoranu ɗumti kiyo ɔl o gɗon arɔɗɗ keyelizta eleeti ɔla o. Gɗon niigi ma ooɗ dayiin, alaɗa eleeti, ma azɔp looc, ka kagaac ɔl nɔɔɔ ooɗ dayiin ka kidiɗiɗiɗiɗi Jook. Abon zin agayu niiga uruktozek nɔɔɔ vɔyita cigeec loota ɗina odota. ¹⁷⁻¹⁸ Gɗon zin ma ooɗnu niiga dayiin ka idiɗiɗiɗiɗi Jook, otoonyit ɗumti, ma avilanu ooti juruɗ, ka calaɗ aga ɔl ogen uuɗnu niiga dayiin. ɗaan agayuɗ igeet baatunooɗ o aga kaal dook. ɗaan aruwekuɗ niini igeet vɔyit kaale o abon agoonu roodinta dook.

Demziin ci akati arɔkzet o itaɗnyi tammu tadena

¹⁹ Má itaɗeku eleeti arɔkzet loota ɗina, eeci arɔkzet ci loocu adak tɔɔɔwa ki zizaac, ma agɔɔz agoryawa. ²⁰ Abon zin iyaɗeku eleeti arɔkzet tammu tadena, eeci ɗinaante alaɗ adak zizaaca ki tɔɔɔ, ma akɔm agoryak ci ka kogoroziit. ²¹ Eeci ɗino iyaɗin arɔkzet unooɗ, ɗino buk aavtiye zinzeeti ugooc neen.

Tokolec o alyo

²² Ma kebere tokolec ci alyo gi. Mā abon kebere cugune o, aavi buk ele cune o dook vooritina. ²³ Bar mazi gerze kebere cugune o, aavi buk ele cune o dook muura, ma muuri nici gerze ɔrɔt ele.

Demziin ci akati inoni ci kiinoni kaal

²⁴ Akom laadun eet ci alinjijonek alaat ram. Mā agoon niini noko, areez koca codoi ɲatineer ɔrɔt, ma amarnin codoi. Karabon ɲole codoi, ma apez codoi. Zin gole nico alaj abon ɲaati kalinjijoneke Jook, ma bodo kalinjij guruc.

²⁵ Inoko zin kanekuɲ ne, Mā iionu maam ki dayiin o aroonnyu ka orogti, karabon een rumane ci ka uburucek eleeti. Eeci rogeti titiny ɔrɔt kujuk dayiin, maje ele titiny ɔrɔt kujuk rumanɛ. ²⁶ Icinit di kibaali o too ɲaati akuli tammu keɲa labak. Alaj niigi aɗowe, ma akom nɔɔgo labi ci ateedek piimane. Zin baatunooɲ o aavi tammu tadena neen o anyek nɔɔgo dayiin. Bar zin niiga adiɲɲinyu ɔrɔt ujukit nɔɔgo. ²⁷ ɲeneen inoko ɲaatunooɲ ci azaac roget cin kizi wun iitene codoi ɲor noko inoninta?

²⁸ Iionu zin rumane gaga naa? Icinit di! Koroboli aduɲna ku? Alaj niigi alinjij, ma alaj alolak eleeti rumanɛ. ²⁹ Kaduwakuɲ zin igeet kanekuɲ ne, Mayo nuun een Solomon baal een aroi ɔrɔt e alaj anyak rumane ci alina kiyo goon koroboli o. ³⁰ Mazi alinatan Jooi koroboli o goon alina waanico, ma bodo tiɲeere araaba kor o, alaj agayu Jooi anyuɲ buk igeet rumanɛ? Anyaku didi te niiga tuwen ci miliny ɔrɔt giye ci iionu kaal noko. ³¹ Mā iionu zin gi ci aniyu ne, Kayo kojokta dayiin ɲaɗaɲ? Karabon aniyu ne, Kayo kojokta kaal ci kawot ɲaɗaɲ? Karabon aniyu ne, Kayo kojokta rumane ci kanyak ɲaɗaɲ? ³² Eeci kaal nicoko abaaban goon ol o loocu tup noko. Bar zin baatunooɲ o aavi tammu tadena aga noko aroonnyu niiga kaal nicoko dook o. ³³ Bar zin rak ɔwa ooritnoɲ oroonjit baliin o Joowo. Utuguz kaal o abon aroonjekuɲ niini igeet utuguz ɲaan vurta anyuɲ niini igeet kaal nicoko dook. ³⁴ Mā iionu kaal ci tiɲeertinu, eeci Jooi ɲaan aga niini niceke. Olla utuguz kaal ci te agoonu waanico o doon.

Mā apayeku ol gerzitin

7 ¹ Mā apayeku ol oogi gerzitin ka calaɲ buk apayekuɲ Jooi igeet gerzitin. ² Eeci mā apayeku ol oogi gerzitin, apayekuɲ buk Jooi igeet gerzitin noko. ³ Naa zin rican gi ci abil keberece ci gonon o, ma bar alaj abaaban rak gi ci appe abil keberece cuno o? ⁴ Ku anei gon oma ne, Jai kaarawin gi ci anyei kebereca o, ma gi ci appe abil keberece cun o alaj rak aara naa? ⁵ Zin niina ci adiɲɲinan ele volɔɲa o aara rak gi ci appe abil keberece cun o ɔwa zee mazi icino juruɲ, bito zin aara gi ci abil keberece ci gotonon e.

Demziin ci akati momoz

⁶ Mā anyeku kaal o abon titiny orze, eeci alaj agayu karabon iiten oma ookconekuɲ igeet ele, ma adakuɲ. Mā ajukeku ziira ugooc alina kɔɔɔɔbanen kɔrgen, eeci arocek koca tɔɔ zɔɔne.

Emeda ɲaruyɔ

⁷ Ijinto, ɲaan anyononekuɲ. ɔrɔɔɲto, ɲaan ajowanu. Eterenit karogi, ɲaan akolonekuɲ. ⁸ Eeci eeti ci ajine, anyononek nɔɔno gi o ajin Joowa. Eeti ci aroonnyu, ajowa gi o arɔɲ Joowa. Maje eeti ci ateren karogi, akolonek nɔɔno karogi o Joowo. ⁹ Inoko ɲaatunooɲ ɲeneen ci goon mā ajin ɲeerin ɗokoc, anyek bar niini nɔɔno be? ¹⁰ Karabon mā ajin niini nɔɔno kulugit, anyek bar kowat? ¹¹ Mayo nuun eeginu gerze noko, agayu kaal ci abon anyeku ɗɔl ugooc noko. Zin bar baatunooɲ o aavi tammu tadena anyek ol o ajin nɔɔno kaal ci abon ɔrɔt kujukuɲ igeet.

¹² Utuguzek ol oogi buk kaal o aroonnyu niiga nɔɔgo kutuguzeyuɲ igeet. Nici keɲ o lotinok o Mosis been zoosok o nyakananetu neen.

Demziin ci akati gɔl o akoyet tammu tadena

¹³ Oneec zin gɔl o lodoci ako araane o lodoci. Ma gɔl nici gɔl o ako tammu tadena neen. Ano zin gɔl nico ol ci miliny ter, eeci adɔi ɔrɔt. ¹⁴ Maje gɔl o ako gooye o Loryento alɔɔɔ niini ɔrɔt. Ma ano gɔl nico ol ci meelik ger, eeci aboke ɔrɔt.

Yabziin ci keetu ki kebere ogin

¹⁵ Egenyit nyakananete o voloɲo. Gɔon ma kacin nɔɔgo eci bitaalu gonone kiyo eezana ween aza o. Maje bar zinzeeti ugeec eecito eel kiyo guzule o. ¹⁶ ɲaan zin agayu nɔɔgo kaale o agoon. Kaga zin goon laadun keena ceen tiro alaj abiirna kebere ci kiɲirowu. Buk larbɔ alaj abiirna kebere ci gemenyowu. ¹⁷ Ma keet ci abon abiirna buk kebere ci abon. Maje keet ci gerze abiirna kebere ci ger amadowez. ¹⁸ Ma keet ci abon alaj abiirna kebere ci ger. Maje buk keet ci gerze alaj abiirna kebere ci abon. ¹⁹ Ma keen o alaj anyak kebere ci abon keene o goon aɗok ol ateedjak looc, ma ajukonek goo. ²⁰ ɲaan zin agayu nyakananet o voloɲo kaale ugeec agoon.

Yabziin ci akati nuyak o alaj een didi

²¹ Alaj ol dook o awuyan aneet azi ne, Manyi, Manyi, aridonek katin baliin o Joowo. Avo ɲinaante ol o goon agoon kaal o aroonjek baaba o aavi tammu tadena nɔɔgo kutuguzɔ doon. ²² Mazi iitene ci aku katin e ol ci meel avu anekan ne, Manyi, Manyi, baale goon kaduwaka ol kaviyak o Joowo zaare ugun. Buk baale goon kaarana miniɲ o Loryento ɔla zaare ugun. Ma kagoona kaal ci meel atet ol biye zaare ugun.” ²³ Kanei zin katin naana nɔɔgo ne, Alaj kagayuɲ igeet been neen. Enyekte ɲaatan ɲina lorye ci oɲenu koko.

Yabziin ci akati eet ci tarbal kibeen eet ci ageny ɲaati eenyci ceezi

²⁴ Ma eeti ci azii zoosok cigan noko, ma azooni zinize onin dook, atobo niini kibeen eet ci ageny eenyet ceez cin kutur ɔwa. ²⁵ Mazi atiiil tammu ɔrɔt, ma ariya tawani, ma ivaan ɲɔti ɔrɔt, alaj ceez nici aruk looc been neen, eeci eenyci kutur ɔwa.

²⁶ Maje eeti ci azii zoosok cigan noko, ma alaj azooni, abil niini kiyo eeti ci tarbal eenyet ceez nyarata o. ²⁷ Mazi atiiil tammu ɔrɔt, ma ariya tawani, ma ivaan ɲɔti ɔrɔt, aruk ceez nici looc kɔoye lai, eeci eenyci nyarat keɲa.”

Abiir ol ooti genyize o Yesu

²⁸ Mazi ako adica Yesu demziin nico, ibiirir ol dook ooti tet gole cin ademzin noko. ²⁹ Eeci alaj demziin cine o atobo ki demziin o alaat ugeec goon ademzek noogo lotinok, bar ademze niini kizi eet o didi anyak alaazet.

Arogoz Yesu ol ci meelik moorizowe

8 ¹ Mazi alocai Yesu be tadena, unuya noono ol ci meel ger. ² Ma akunak eeti ci anyak mooriz o gidan noono, ma aku akani kozoŋti looc noono ŋuma, ma azi ne, “Manyi, mā arooŋ rogozan kizi maya, rogozan.”

³ Ma anek Yesu noono ne, “Karooŋ kuruguzin.” Ma itoon Yesu aziit, ma uum noono azi ne, “Izi zin maya.” Enico ele izi moorizi onine e dim. Orok didi niini kobona kigirgir ele kiyo da alaj amoor o. ⁴ Ma anek Yesu noono ne, “Ziiyan di. Má ako aduwai zozz nico eet oma, bar bito yelek ele alaan o ceez o Joowo ka kook kicinini niini ineet. Buk bito taap Jook ebaal aduwan lotinowa o Mosis, ka kagayin ol dook didi urugu niina moorize baal amoorni e.

⁵ Mazi akunak Yesu kutur o kazi Kapernam, iya urumto ki alaan ci takirnya o Rom. Ma ilalek alaani nici Yesu arooŋ tirten. ⁶ Azi ne, “Manyi, amoor gabarenti cane ol oroot ele. Zoŋ niini onyite codoi tor noko, ma alaj anim kitiŋa jena. Apirmane noono balcanti ci amoorni noko oroot ele.”

⁷ Ma abedeke Yesu noono anek ne, “Ŋaan kako kanyi noono kizi maya.”

⁸ Ma anek alaani nici Yesu ne, “Akom Manyi. Alaj agano ŋaati akunake niina korok can o. Kaga noko olla moloŋyi ci aduwa niina ŋina arogoz tedec gabaren can noko. ⁹ Kanyei buk naana alaat oogi ci adikir ŋaatan alaazeta, ma kazii naana zoozok cigeec. Ma bodo buk naana keen alaan ci adikir takirnyi, ma aziŋnan niigi aneet. Mā kanei co ne, Bito kete, ako. Mā kanei ce ne, Ija, aku. Buk mā kanei gabara ogan ne, Utuguz gi co, agoon.”

¹⁰ Mazi azii Yesu gi nico, ibiir noono zo oroot ele, ma anek ol ona ano noono e ne, “Didile kaduwakuŋ igeet, ŋaan baal reen ŋaan kicin ole o Israyil dook eet ci atuyan oroot kiyo eeti nici noko! ¹¹ Abon aadanu gi ce. Avu katin ol ci meel atuyan aneet libire ci jenu o, ma avu ogene libire ci nyagjo o. Ma avu aavtiz niigi dook loota kibeen Ibrayim ki Aizak been Jakob baliinte o Joowo.

¹² Maje bar ol o Israyil ogen o waan agano ŋaati avoŋi baliinte o Joowo, ma bar alaj arooŋ kutuyan aneet, atoowonek katin niigi muur bitaala reena many, ma alu niigi ŋinaante zee ma adak nyigit kirkic kirkic balcanta kibeen badi mony.”

¹³ Enek ni Yesu alaan nico ne, “Bito ol. Ma gi o atu niina ŋaan agoononekin ineet.” Ma ziite ci azoozone niigi neke ele urugun gabarenti o alaano nico.

¹⁴ Mazi ako Yesu ole o Pitōr, amoda inyik o Pitōr amoor. Anyak tadiwon ci zoŋe onyite codoi noko. ¹⁵ Mazi uum Yesu noono aziit, izi maya enico ele, ma iŋaaz, ma ako agoonek noono dayiin.

¹⁶ Ma yomana anyaaktak ol Yesu ol ci meel ger ci anyak miniŋ o Loryento eleetine. Mazi aduwa Yesu olla zozz ci aduwa, aduŋna miniŋa ci Loryento noko ŋaatiŋeeŋ ecodoi noko. Ma arogoz niini ol ci amoor noko dook.

¹⁷ Zin giye o agooni niini gi nico, eleeme zozz baal aduwa nyakaŋani o kazi Izaya zooze o ane ne, “Noono neen o aarawet ageet moorizok ogaac.”

Alaj aboke ŋaati kanowi Yesu

¹⁸ Mazi acin Yesu kole ci meel aliya noono noko, enewun nuyak ogin ne, “Kabaayizit liil kooto baagita.” ¹⁹ Ma akunak alaani ci goon ademzek ol lotinok o Juz noono, ma anek ne, “Gayoi, inoko korooŋa naana kunuwin ineet. Olla ŋinti akoye o korokor.”

²⁰ Ma abedeke Yesu noono anek ne, “Anyak kireerwana looknya, ma anyak kibaali ceezi, maje bar naana Ŋeerti Eeto alaj kanyei ŋinti ka kaave loota ka kuyubuzi.”

²¹ Bodo azi eeti oman ole o goon ano noono ne, “Gayoi, karooŋ kunuwin ineet. Nyan zin rak kimiirezek korok ka kook kiyaŋ baaba iitene ci adaŋni.”

²² Ma abedeke Yesu noono anek ne, “Akom! Nowawan aneet inoko o. Anyek ol o alaj atuwi kiyaŋit goonŋi o adaai.”

Ativan Yesu ŋoot

²³ Ma vurtat ootodit Yesu ki nuyak ogin kavool o liilu. ²⁴ Ŋintimiliny noko omōdak noogo ŋooti ci appe oroot liil keŋ. Ma ayelyelanak ŋooti nici maam kavool oroot ele. Maje Yesu zoŋ daa. ²⁵ Ma iinŋa nuyawa ogine noono anek ne, “Manyi, Manyi, Tiŋa je! Eelawet! Kizita toronye ka kadaakta.”

²⁶ Ma anek Yesu noogo ne, “Naa? Abarinu naa? Anyaku dim tuwen ci miliny ter nokon?” Itiŋa ni niini jena, ma agerneyek ŋoot ki maam kajaŋante. Ma ajaŋani didi tiv enico ele.

²⁷ Ma abiir noogo dook ooti tet, ma ano ne, “Ma laadun eet ci abil ku nici? Ma nuun een ŋoot kibeen maam azii noono!”

Arogoz Yesu ol ceen ram anyak miniŋ ci ger

²⁸ Mazi abaawonek Yesu looc o ol o kazi Gadariin liil baagita, zoŋ urumto niini kibeen ol ceen ram ci avu bootwane o goon iyaŋi ol goonŋi o adaai. Ol nicigi anyak miniŋ ci ger oroot ootine. Aam noogo maŋonnya kiziti kelek o too ele, ma akom eet ci anim kono gol ci aavtiye niigi o. ²⁹ Ma agerney niigi enico ele azi ne, “Ŋeerti Joowo, arooŋ ŋaatiŋaŋ naa? Akun ka ija uulalet ageeta iŋaan iitene o payiinto zawa?”

³⁰ Maje ŋinaante anyak korooŋbanen ci age vorora liil otoga. ³¹ Ma ilalek miniŋa ci ol nicoko o Yesu anek ne, “Inoko zin mā arooŋ aarawet ageeta bitaala, nyet koota korooŋbanene niceke.” ³² Ma anek Yesu noogo ne, “Udunta zin. Zoŋ.” Ma aduŋna niigi ole ceen ram noko, ma avo korooŋbanene. Enico ele odokonyca korooŋbanena vorora, ma iinak liil kutudude niigi dook lai.

³³ Odokonyit ni ol o oowa korooŋbanen e odokonyit zoŋ korogjowe, ma avo aduwak ol zoozok nicoko kutur keŋa dook. ³⁴ Ma avu ol dook kutura ka kivita kicinini Yesu. Mazi avu acin noono, ilaltek niigi noono kotoo looce cineŋ o.”

Arogoz Yesu eet ci rebrebi

9 ¹ Ma atoot Yesu kavool, ma abaayiz liil amiironok kutur onin kazi Kapernam. ² Ma ŋinaante odooŋtak ol ogen noono eet ci rebrebi zoŋ kuwena noko. Mazi acin Yesu tuwen cineŋ o, enek eet ci rebrebi noko ne, “Ŋeeran, talo! Aaryai baciinowa ugune.”

³ Enico abaabanit alaata o ademzek ol lotinok zinzeetine ci aborni noŋ zozz ci azi ne, “Ma dim eeti nici anyek ele kizi Jook?”

⁴ Maje Yesu aga kaal ci abaaban niigi o noko, ma anek nongo ne, “Abaabanu dim kaal ci ger zinzeetine naa? ⁵ Mayo aboke jaŋ? Kizi ne, Aaryai baciinowa ugune, yo da kizi ne, Tiŋa jena, tɔ? ⁶ Inoko zin karoŋ keyeleyun igeet naana Ŋeerti Eeto kanyei doyiz ci kaarane baciinok ɔla.” Enico enek niini eet ci rebrebi noko ne, “Tiŋa je! Doma kuwen cun o. Tɔ, bito ɔlo.”

⁷ Ma iŋaaz didi eeti nici, ma awo ako ɔlo. ⁸ Mazi acin ɔl gi nico, anyayit ŋoliin ɔroɔt ele, ma anaat Jook giye ci anyeke eet ci deer alaazet ci abil kiyo ci anyek eet nico noko.

Awa Yesu Matiyu

⁹ Ma vurtu otoŋ Yesu ŋinito ɔto. Mazi ŋaan awo gola noko, icin Matiyu o goon alota guruc ole o ataaline kaal melegenyai aavi loota maktabe onin. Ma anek Yesu nongo ne, “Nowawan.” Enico ele itiŋa Matiyu, ma ano nongo.

¹⁰ Mazi ako adake Yesu ole o Matiyu, anyak buk ɔl ci meelik ŋinaante ole o goon alota guruc kibeen ɔl oogi ole o goon alaŋ azooni lotinok o Juz. Ma avu azolo niigi kibeen Yesu ki nuyak ogin ŋaatodoi. ¹¹ Mazi acin ɔl ogen ole o kazi Parici gi nico, enektek nuyak o Yesu ne, “Ma dim alaani cunooŋ o azolo ki ɔl ci goon alot guruc ki ɔl ci ger o naa?”

¹² Mazi azii Yesu gi nico, ebedeke niini nongo enek ne, “Goon ɔl calaŋ amoor alaŋ arooŋ niigi akim. Bar arooŋ akim ɔl ci amoor doon. ¹³ ɔto ojokta keŋ ci zɔzɔ o aduyai waragewe o Joowo azi ne, Alaŋ karoŋ kelek ceen todoyok o doon, bar karoŋ zinzeeti bonat ka kagama todoyok cugooocok o. Mazin naana alaŋ kakun ka kiiya kotowo ɔl o agoon kaal o abon, bar kakun ka kiiya kotowo ɔl o agoon kaal o ger.”

Ademez Yesu ɔl yabziinta

¹⁴ Ivitak ni ivitak Yesu nuyawa o Jon o oonyi, ma avu ajin niigi nongo anek ne, “Goon naaga kibeen ɔl o Parici kuunna dayiin iiten oma ka kidinŋanta Jook. Ma bar nuyawa cugune o adake niigi iinya dook labak o naa?”

¹⁵ Ma abedeké Yesu nongo anek ne, “Ma ŋaan karomena naana kibeen nuyak cigan o alaŋ rak niigi akat culum. Mazi tiŋeere iiya iitini o ka kaaryai naana ŋaatineeŋ, ŋaan zin akat niigi culum, ma abor dayiin.

¹⁶ Akom laadun eet ci abutanek rum ci reen gon ci colai, eeci mā agoon noko, areecai koca kujuk we.

¹⁷ Akom buk eet ci arek iira buru ci reen. Mā agoon niini noko, ade koca iirana, ma alip buru. Abon zin arek niini iira buru ci colai ka calaŋ alibe.

Arogoz Yesu ŋaa ci amoor ki dole ci adaai

¹⁸ Mazi ŋaan aduwak Yesu nongo gi nico noko, iiyak nongo alaani codoi alaate o ceez o Juz lotento, ma aku akani kozoŋti looc Yesu ŋuma, ma ilalek nongo anek ne, “Adaak beenyani! Bar zin kaga mā akun, ma ataadei nongo aziit, arogi koca.” ¹⁹ Itiŋgazo ni Yesu kibeen nuyak ogin dook oneec eet nico.

²⁰ Mazi ŋaan awo niigi gola noko, iiya ŋaa ci anyak mooriz ci maam o ŋaanu irkitok amoto ram calaŋ goon rak eel. Ma aku uum niini Yesu rum eci bawuco. ²¹ Eeci anek niini ele maany ne, “Mā olla inoko kuum rum cin malkinto noko karugi koca.”

²² Mazi abuudi Yesu, acin ŋaa nico, ma anek nongo ne, “Beenyani, mā anyei ŋoliin gaga. Uruguzin ineet tuwen unune.” Enico ele urugun didi ŋaa nici.

²³ Idiceki ni niigi ɔto korge o alaano e, Mazi avo arum korok, ajowa dole ona amoor e adaawa. Maje ɔl alu ŋinaante. ²⁴ Ma anek Yesu nongo ne, “Udunit ɔto bitaala. Alaŋ dole adaai, olla ɔoŋ labak.” Mazi azii ɔl gi nico, atararti niigi nongo. ²⁵ Mazi avo aduŋna ɔl dook, ook niini ceeza, ma ako agam dole aziit, ma iŋaaz dole enico ele. ²⁶ Ma adiica awaŋi ci gi ci agoon niini noko looc nice dook.

Arogoz Yesu ɔl ci rubenik een ram

²⁷ Mazi ako iŋaaz Yesu ŋinaante, iziiyit ɔl ceen ram ruben Yesu aku adiir ŋintineeŋ o. Mazi aku Yesu, oneec niigi nongo. Ma agereny azi ne, “Ŋeerti Devid, anyek da kuwuceyin rubenzet cinaaŋ noko. Kolet da kebere kicintowa.”

²⁸ Mazi ako arum Yesu korok oma, ivitak ɔl ci ruben noko nongo, ma ajin niini nongo anek ne, “Inoko atuyu kizik tedec naana karuguzun igeet didi?”

Ma abedeké niigi nongo anek ne, “Ii, kagaya anyei niina doyiz ci aruguzet ageeta.”

²⁹ Itiŋa ni Yesu, ma uum nongo kebere azi ne, “Anyek zin kibil eci ona atuyu niiga o.” ³⁰ Enico ele izi kebere ugeec wak icinto. Ma aricanek Yesu nongo anek ne, “Mā avo aduwaku eet oma gi nico.”

³¹ Bar mazi awo niigi, ɔt uduktak ɔl kutura dook zɔzɔ ci ona agoon Yesu o.

Arogoz Yesu eet ci adiiti alemeti

³² Mazi ka kotoozo Yesu ki nuyak ogin, anyaaktak bodo ɔl nongo eet ci adiiti alemeti, eeci anyak minijit. ³³ Mazi aara Yesu minijit eete nico, ozoozun niini enico ele kibirit ɔl dook ooti tet. Ma ano niigi ne, “Ŋaan baal reen laadun ŋaan kicinit Israyila ŋina gi ci abil noko been neen.

³⁴ Maje bar ɔl o Parici ano ne, “Anyek nongo doyiz ci aarane minij ɔla noko alaani o minijū.”

Awucnek Yesu ɔl

³⁵ Ma azop Yesu kuturyok o looc nice dook ademez ɔl ceezine o Juz lotento, ma uuwak kaviyak o baliin o Joowo abon. Ma arogoz ɔl moorizok keŋti dook. ³⁶ Mazi acin niini ɔl ci meel avunak nongo noko, icirit nongo ziniz ɔroɔt ele. Eeci avir nongo zinzeeti, ma anyak ŋoliin kaale o ger avunak nongo kiyo eezana o akom tuwayoi o. ³⁷ Ma anek Yesu nuyak ogin yabziinta ne, “Icinit di! Anyak mana labi ci meel ger, maje bar naaga ci ka keteedit mana o, keegin kidice ter. ³⁸ Kijinit zin eet o mano ka kitoonayet ɔl oogi bodo kiiya kitirititet ageet teedinta.”

Itoon Yesu nuyak ween amoto ram

10 ¹ Ma awa Yesu nuyak ogin een amoto ram dook ŋaatodoi, ma anyek nongo dook doyiz ci ka kaartai minij ɔla, ma arogzi ɔl moorizok keŋti dook. ² Zaar zin o nuyak ween amoto ram neen ce. Saiman o kazi zaar oogi ne Pitɔr, ki gotoni o kazi Andoru, ki Jemis, ki gotoni o kazi Jon o eegin lozɔzɔ o eet o kazi Zebedi, ³ ki Pilip, ki Bartalamu, ki Tomaz, ki Matiyu baal goon alot guruc

o meeryo e, ki Jemis ween ñeerti Alvayoz, ki Tadeyos, ⁴ ki Saiman baal gōon oorine looc onin Israyil e, been Judaz Iskariyot baal ka kataaloi Yesu e.

⁵ Mazi ka kitoon Yesu nuyak ceen amōto ram nicoko, itilo nōōgō rak anek ne, “Má avoyu loocowe o ɔl o alaŋ eegin Juz, karabōŋ een kuturyowe ci ɔl o Samariya been neen. ⁶ Bar ɔto korogjowe ci ɔl o Israyil atobō ki ɛza ci akoloni. ⁷ ɔto uuwayit iziti ne, Izi baliin o Joowo aŋon. ⁸ Orogozit zin ɔl o amōor, ɔdōŋta ɔl o adaai daayiza, orogozit ɔl o anyak mōoriz o gidaŋ, aarta miniŋ ɔla. Kiyo anyuŋ Jooi igeet dōyiz nico kōkōm gi ci aruweku nōōnō o, ɔto buk niiga utuguz kaal nicoko nōkō kōkōm gi ci aruwekuŋ ɔl igeet. ⁹ Má ayiitu guruc been neen. ¹⁰ Má buk ayiitu kaboot ci eeronu. Olla iyiiit rumanē ki caava ci anyaku eleetine o doon kibeen keen ci omtinto. Eeci eet ci aligŋiŋ ŋaan anyononek nōōnō kaal o arōŋ dook ka keerōni.

¹¹ Má avoyu kuture ci avoyu, orooŋit eet ci abon atalnanuŋ ka itiktoi. Aavtiyu ni ole nico zee ma alam avoyu ŋina. ¹² Má avoyu ole ci avoyu, enektek rak ɔl ɔwa ne, Abonanu ɔl ci kōrōk nico? Ganōn ŋaatunooŋ. ¹³ Mazi atalnanuŋ ɔl ci kōrōk nico igeet, amayuwit nōōgō. Má alaŋ atalnanuŋ niigi ageet, abadai mayuwenet cunooŋ o. ¹⁴ Má alam kōrōk, karabōŋ een kutur calaŋ atalnanuŋ ɔl, karabōŋ alaŋ aŋiŋnuŋ niigi igeet, otoŋit ŋinito. Utuduŋta zin tōdō zōōne ka kizi teedzoooc calaŋ abadaku ŋinite been neen. ¹⁵ Abon aadanu gi ce. Katin iitene ci payiinto e apayek Jooi ɔl ci kutur calaŋ atalnanuŋ neke gerzitin ci appe ɔrōt kujuk ci ɔl baal abaak loocowe o kazi Sodom been ɔl o Gomora e.

Ilot Yesu nuyak ogin

¹⁶ Iziikto di! Olla kitoonūŋ naana igeet ɔto ɔtōz kiyo aza o gononik awo guzule kōrgena o. Abon zin agenyu kiyo kireerwana o, ma abon anyaku ɛzet kiyo yeela o. ¹⁷ Ebeyit zin eleeti juruŋ! Anyak tiŋeere gōon ɔl ci avo agamnyuŋ igeet, ma avoyuŋ rooni, ma avo arukuŋ ceezine ugeec lotento. ¹⁸ Anyaakuŋ gōon tiŋeere niigi igeet rooni, eeci anuyaŋ niiga aneet. Ma ŋinaante ŋaan aduwaku niiga alaŋ o roonnyo ki ɔl o alaŋ een Juz zoozok ogan. ¹⁹ Mazi anyaanuŋ gōon tiŋeere niigi igeet rooni, má abarinu aniyu ne, Kayo kōt kudukta naa?, karabōŋ bar aniyu ne, Kayo kōt kozoozo ki nōōgō ku?, eeci iitene ci avoyuŋ niigi igeet rooni e ŋaan anyononekuŋ igeet zoozowa ci ka udukta. ²⁰ Ma zoozowa ci ka udukta o alaŋ een zoozok cugooc, bar zoozok ci avu Vōŋize o Jook ween baatunooŋ o azōz ŋaaten igeet.

²¹ Iitene nice akōyi gōon katin eeti dole o yaatin ele daayiza kook kadaak didi. Maje buk baatizet ki yaatizet avōyi dōl ugeec ele daayiza nōkō. Dōlya buk katin ookconek baatigeec ki yaatigeec, ma avōyi nōōgō daayiza. ²² Amarninuŋ katin ɔl dook igeet, eeci anuyaŋ niiga aneet. Zin eeti ci amez kaal nicoko dook zee ma aŋoneke niigi dook, arogze waanma niini. ²³ Má agiduŋ ɔl kuture oman, ɔto bodo kuture ce. Didile kaduwakuŋ igeet, alaŋ azobju kuturyok ci ɔl ci Israyil noko dook zee ma adicanu ŋaati uuwayeku nōōgō zōz o Joowo, maŋaan naana ŋeerti Eeto kiiya.

²⁴ Akōm eet ci ademze ci adiŋdiŋ kujuk eet o ademz nōōnō. Ma buk akōm gabaren ci adiŋdiŋ kujuk manyi onin. ²⁵ Abon zin buk eeti ci ademze azol ki eet o ademz nōōnō piryakzet. Buk gabarenti abon azol ki manyi onin piryakzet. Gōon mā awo ɔl eet ci korgu zaar ceen mazwa kizi Loryen, bar tiŋeere ɔl ci kōrōk cino akanek ɔl nōōgō mazwa ci ger ɔrōt.

²⁶ Zin má aŋolinu niiga nōōgō, bar uuwayit moozeta. Eeci gi ci aroodi inoko tiŋeere ayelzai. Buk kaala o aŋōmte inoko katin abōryai. ²⁷ Ma zoozok ci kaduwakuŋ naana igeet ceza tō noko, abon avo aduwaku niigi ɔl bitaala vitenane dook. Buk zoozok o aŋiŋnu niiga aŋōmōt ɔl, abon abōraku ɔl dook kiziiyit.

²⁸ Má aŋolinu ɔl o aruk eleeti doon kadaayito, ma bar alaŋ anim kuruyit vōŋizok ugooc. Bar zin abon aŋolinu niiga Jook o anim niini kuruk eleeti ki vōŋizok buk, ma ajukek nōōgō dook goo. ²⁹ Inoko anim eeti oman ŋaatunooŋ kataala zoot ceen ram giricoca labak, ma bar akōm zin zoote nicoko ŋaatineŋ ci adaai calaŋ baatunooŋ tamma aga. ³⁰⁻³¹ Má anyak zin ŋoliin gaga, eeci adiŋdiŋnyu niiga Joowa ɔrōt ujukit zoot ci meel ger. Agayuŋ Jooi igeet, ma azoonuŋ ɔrōt ele, mayo nuun een im cugooc ootinu noko ele aga dook lai.

³² Má abōra eeti ɔl dook keberca gi ci azi ne, Katu naana Yesu, kabōrai buk katin naana tuwen onin ŋume o baaba tammu tadena nōkō. ³³ Má adaŋnyan eeti aneet ɔl dook keberca, kadaŋ buk katin naana nōōnō ŋume o baaba tammu tadena nōkō.

³⁴ Má abaabanu gi ci aniyu ne, Kuni cane o anyaa looc ganōn. Akōm! Bar tiŋeere anyaa marnōn. ³⁵ Kuni cane o anyek tiŋeere lōgōz kamartōi baatigeec. Maje dōlya o ŋaaye amarnin yaatigeec. Alawaneta amarnin inyigo. ³⁶ Maje eet ci atuyan aneet amarnin tiŋeere nōōnō ɔl o tatok onin ɔrōt ele.

³⁷ Ma eeti ci areez baatin ki yaatin ɔrōt kujukan aneet alaŋ agano ŋaati ɛene niini nuyai can kodot. Buk eeti ci areez ŋeerin karabōŋ een beenyin ɔrōt kujukan aneet alaŋ agano ŋaati ɛene niini nuyai can kodot. ³⁸ Maje eeti calaŋ adoma keet onin een talakec, ma ataadek inyaa, ma anuyan aneet, niini alaŋ een nuyai can. ³⁹ Ma eeti ci arōŋ korogoz ele onin, bar akoloz. Maje eeti ci akoloz ele onin ŋaaten aneet, bar ajowa niini roget o abil been neen.

⁴⁰ Mazin eeti ci atalnanuŋ igeet ole cin, atalnanan bar niini aneet, ma atalna buk niini eet o itoonanan aneet. ⁴¹ Ma eeti ci atalna nyakaŋan ci Joowo giye o ɛene niini nyakaŋan ci Joowo, aruwek katin buk Jooi nōōnō vōyit kiyo nyakaŋani nici noko. Ma eeti ci atalna eet ci abon atu Jook, eeci een niini eet ci abon Joowo, aruwek katin buk Jooi nōōnō vōyit kiyo eeti nici noko. ⁴² Abon zin agayu gi ce. Ma eeti ci olla anyek nuyawe cigan noko codoi ŋaatineŋ maam ci alal kowot giye o ɛene niini nuyai can, didile, aruwek katin buk Jooi nōōnō vōyit cigin.

Itoonek Jōn nuyak ogin Yesu

11 ¹ Mazi akō odotiz Yesu ŋaati aduwake nuyak ogin een amōto ram lotinok nicoko, otoŋ niini ŋinite ɔto ook edemez ɔl kuturyowe o aŋōzō ki ŋinite. ²⁻³ Maje Jōn o oonyi waanice acabje. Mazi azii niini sijina ŋinaante kaal o agōon Yesu, itoonek nuyak ogin oogi ka kōt kijinit nōōnō kenektek ne, “Ma dim yo niina een Kiristo baal azi Jōn ne, ka katin kiiya e neen, yo kereya da eet oma ci ŋaan aku?”

⁴ Ma abedeke Yesu nōōgō anek ne, “Imiirte ɔto uduktak Jōn kaal ci acinu kibeen kaal ci aŋiŋnu noko. ⁵ Enektek nōōnō ne, ɔl o ruben icintō. ɔl o ŋōlik ɔtōzō tōp. ɔl o anyak moorizok o gidaŋ orogozte. ɔl o adiiti iina iziikto. ɔl o adaai itingazō daayiza korogit bodo. Maje kaviyawa o Joowo abon uuwawonek ɔl o amaŋ. ⁶ Amayuk zin Jooi eet calaŋ bakbai ziniz ŋaatan.”

⁷ Mazi amiiri nuyawa ci Jōn o, uduwak Yesu ɔl o avu azii nōōnō e zōzō ci akati Jōn. Anek ne, “Baale avoyu ŋaati Jōn balala e, arooŋnyu da ɔt icinit naa? Arooŋnyu ɔto icinit arte ci amōoni ŋōti? ⁸ Yo da arooŋnyu ɔto icinit eet ci aborcek rumanē ci alina? Bar kane alaŋ een neen, eeci ɔl ci anyak rumanē ci alina abaak gōon niigi ceezine o adikir alaatu. ⁹ Yo da arooŋnyu ɔto icinit nyakaŋan? Kanekuŋ zin ne, Icintu zin da didi niiga eet ci adiŋdiŋ kujuk bar nyakaŋan. ¹⁰ Eeci Jōn nica nyakaŋan baal azōzō Jooi

waragewe onin e neen, baal azi ne, Kitoona katin toonnyai onan karayai nyaatun, ka kiiya kidimdimaneyin gól unun. ¹¹ Abon zin agayu gi ce. Ma Jón nica adiñdñ niini ɔrɔt kujuk ɔl o abaak loota baale e zee been inoko o buk. Mazin eeti ci celbez baliinte o Joowo, mayo nuun celbez niini ɔrɔt, bar adiñdñ niini kujuk Jón. ¹² Ma iiten baal akanan Jón uuwayi o kaviyak o Joowo e zee been waanico o, ɔl ci meel amartoi baliin o Joowo ɔrɔt ele, ma arɔɔɔ keelti ɔl o gerze nɔɔɔ dɔyiza. ¹³ Maje nyakananeta dook kibeen buk Mosis azɔɔz waanice niigi zɔɔz ci akati baliin o Joowo. Mazi aku Jón e, iya buk uduwa zɔɔz nico. ¹⁴ Mā didi utuyu da waanice niiga kaviyak ugeec, agayu koca didi Jón nica Ilija baal aduwa nyakananeta kuni onin e neen. ¹⁵ Mā anyaku iin ci aziiknenu, iziikto juruɔ.

¹⁶ Kayo kotobozek ɔl ci ɔɔ nico alaɔ atuwi noko naa? Atobo niigi ki dɔl o gɔɔn amici kɔrɔk bawuca, ma agernyek ogene gɔɔɔgi anek ne, ¹⁷ Karuwekuɔ kidoret, bar niiga alaɔ arooɔnyu orogomit. Kabena beniin o daayizo, bar niiga alaɔ arooɔnyu utuluz.

¹⁸ Iziiyt di keɔ ci yabziin nico. Baale ma aku Jón e, alaɔ adak dayiin ci adak ɔl dook o, ma alaɔ awot nyaan. Ma bar azi ɔl ne, Anyak niini miniɔit ɔɔwa. ¹⁹ Mazi kakun Naana Ŋeerti Eeto e, kadake, ma kawode. Ma azi ɔl dook ne, Icinit di eet nico. Anyak alem, ma abaaki, ma eegino laɔten ki ɔl o gɔɔn alot guruc ki ɔl o alaɔ azooni lotinok o Juz dook. Zin bonati o genyiz o Joowo ayeizai keleeme kaale o abon agooni.”

Abornek Yesu nɔɔ ɔl o kuturyok o alaɔ atuwe

²⁰ Akata ni Yesu ɔɔɔz zɔɔz ci aborneki nɔɔ kuturyok baal gɔɔn agɔɔni niini kaal o atet ɔl biye e, eeci ɔl o kuturyok niceke alaɔ arɔɔɔ kabadit mony baciinowe ugeec. ²¹ Ma azi Yesu ne, “Izi nɔɔa cugoocok wole ɔl o kutur o kazi Korazin. Izi buk nɔɔa cugoocok wole ɔl o kutur o kazi Bezediya. Mā da kaal baal atet ɔl biye agooni nyaatunooɔ e kutuguze kuturyowe o kazi Taylor ki Sidon baal uulali e, abadit waan ɔl ugeec mony baal reena many iɔaan kuulalte e, ma uburuca waan niigi awac eleetine ugeec, ma aborcek rumane ci zɔɔzɔɔ, ma anyak waan buk niigi ciroc ka keyeleza gi o abadi niigi mony baciinowe ugeec. ²² Abon zin agayu gi ce. Katin iitene ci payiinto e apayekuɔ Jooi igeet gerzitin ɔrɔt kujuk ɔl ci kuturyok ci kazi Taylor been Sidon noko. ²³ Buk niiga ɔl o kutur o kazi Kapernam arooɔnyu odoɔit eeleeti? Ajukoneku zin buk katin niiga goo o Loryento ɔɔɔ many. Eeci kaal baal atet ɔl biye baal agooni nyaatunooɔ e waan da kutuguze kuture o kazi Sodom, nyaan waan Sodom kuulale zee been inoko. ²⁴ Abon zin agayu gi ce. Katin iitene ci payiinto e awucnek Jook ɔl o kutur o kazi Sodom bar kujukuɔ igeet.”

Azi Yesu ne, Ivitayan aneet

²⁵ Ma anyek Yesu Jook zany anek ne, “Baaba, Manyi o tammu tadenu ki tɔɔɔ, katalne naana ɔrɔt nyaatun, eeci arɔɔde zɔɔz unun een didi ɔl o gɔɔn abaaban niigi kizik bar ageny, ma iya eyeleyu ɔl o celbez. ²⁶ Nɔɔɔ zin neen baaba. Agoon gi nico gole o arooɔ niina.”

²⁷ Mazi aɔorneke Yesu zooze nico, enek ɔl ne, “Anyan baaba onane kaal dook aneet. Akɔm zin eet oma ci agayan aneet ɔerɔn, bar agayan aneet baaba doon. Akɔm buk eet oma ci aga baaba, bar kaga nɔɔɔ naana ɔerɔn doon, kibeen ɔl o karooɔ ka keyelizak baaba nɔɔɔɔ.

²⁸ Ivitayan zin aneet niiga dook o apiranu kaale o loocu, ka kiiya kanyuɔ igeet uyubuzit. ²⁹ Agamta demziin onan zinzeetine ugooc dook. Ivita edemeztɔ nyaatan, eeci aneet alalnan ziniz, ma kacelbezan ele. Ka zin ivita ajokta niiga yubzen eleetine ugooc kizi zinzeeti tiv. ³⁰ Eeci demziin ci ka kanyuɔ naana igeet o alaɔ adɔi.”

Abornek ɔl o Parici Yesu nɔɔ

12 ¹ Ma iinyaye ogen iitene o gɔɔn yubzento ɔɔɔɔz Yesu ki nuyak ogin, ma avɔ abatak maneen culu labinu. Maje nuyak adak magizeeti, ma acarkiz labi nicoko, ma adak. ² Mazi acin ɔl o Parici gi ci agɔɔn nuyawa noko, enekteki niigi Yesu ne, “Cin di! Apez nuyawa cugune noko lotinok ogaac giye ci agɔɔni niigi gi ci waan alaɔ agano nyaati agɔɔni iitene ci yubzento o.”

³ Ma abedeke Yesu nɔɔɔ anek ne, “Nyaan ekeebit gi baal agɔɔn alaani o kazi Devid waan baal adayi magiz nɔɔɔ kibeen ɔl ogin e? ⁴ Akɔ waanice niini ceeze o Joowo, ma akɔ anyek alaani o ceez nice nɔɔɔ ki ɔl o ɔrɔkɔr dɔken o gɔɔn ataabi ɔl Jook. Ma avu adak niini ki ɔl cigin noko. Yo nuun abac niigi waanice lotinok baal gɔɔn azi ne, Abon adak dɔken niceke alaata o ceez o Joowo doon e, adayit waanice niigi labak. ⁵ Buk nyaan agaac niiga keeranene ugooc zɔɔz o gɔɔn alinɔɔni ɔl o atap Jook ceeze o Joowo iitene o yubzento tup nɔkɔ, ma akɔm gi ci ger nyaatineɔ? ⁶ Kanekuɔ zin ne, Bar naana kadiñdñ ɔrɔt kujuk ceez o Joowo. ⁷ Azi waragewi o Joowo ne, Alaɔ karooɔ kelek ceen todoyok o doon, bar karooɔ buk zinzeeti bonat ɔla. Inoko te didi agaac keɔ ci zɔɔz nico, alaɔ koca apayeku ɔl ci abon noko gerzitin. ⁸ Eeci naana Ŋeerti Eeto keen Manyi o iiten o yubzento neen.”

Arogoz Yesu eet ci dɔkɔm aziiti

⁹ Enico otoɔ Yesu ɔɔnito ɔɔɔ ook ceeze o lotento. ¹⁰ Maje ɔɔnaante anyak eet ci dɔkɔm aziiti. Ma anyak buk ɔɔnaante ɔl ci Parici ci arɔɔɔ kedetit Yesu giye ci ger agɔɔn. Ma ajin niigi nɔɔɔ anek ne, “Mayo dim lotinowa ogaac aziinekin ineet rogoz ɔl iitene ci yubzento noko labak?”

¹¹ Ma abedeke Yesu nɔɔɔ anek ne, “Ŋeneen inoko nyaatunooɔ ci iinak eez cine look iitene ci yubzento noko ma alaɔ eela?

¹² Mazin bar eeti ci deer adiñdñ ɔrɔt kujuk eez! Ma aziineket buk lotinowa ogaac kitiritit ɔl iitene ci yubzento o labak.”

¹³ Zin enico ele enek Yesu eet ci dɔkɔm aziiti noko ne, “Zolan aziit cun dɔkɔm noko.” Mazi azolan eeti aziit, obona didi kotobto ki gɔn ci ona abon o nɔkɔ. ¹⁴ Mazi acin ɔl ci Parici o gi nico, otoborit niigi nɔɔ ɔrɔt ele. ɔɔɔɔz ni ɔɔna ɔɔt abaabanit gól ci ka kurukti Yesu kadaak.

Aɔeryai Yesu laadun kizi gabaren ci Joowo

¹⁵ Maje Yesu aga gi nico nɔkɔ, otoɔ ni niini ɔɔnito ɔɔɔ, ma ano ɔl ci meel ger nɔɔɔ. Ma arogoz niini ɔl o amɔɔr dook. ¹⁶ Ma aricanek niini ɔl ci ona arogoz mɔɔrizoi noko calaɔ avɔ aduwak ɔl oogi.

¹⁷ Zin agooni gi nico o ka keyelizai bonati o Yesu baal aduwa Jooi nyakanane o kazi Izaya. ¹⁸ Azi baale niini ne, “Icinit di gabaren onan kanjera naana. Kareez naana nɔɔɔ ɔrɔt ele, ma katalne nyaatin. Kareke tiɔere nɔɔɔ Vɔɔɔ onan, ma aduwak katin niini ɔl dook zɔɔz o payiin onan abil tɔp. ¹⁹ Alaɔ tiɔere niini adaɔɔ kibeen ɔl, ma alaɔ agereny, ma akɔm eet ci azii nɔɔɔ molok ci abololi gɔla. ²⁰ Atirit gɔɔn tiɔere niini ɔl o apirna, mā niigi arɔɔɔ tirten nyaatin. Ma iitene ci abadaan niini e, anyaa katin bonat, ma adica kaal ci ger eel loota ɔɔna noko dook. ²¹ Ma atu katin modena ci loocok noko dook nɔɔɔɔ.”

Aara Yesu miniŋ o Loryento dɔyize o Vɔŋiz o Joowo

²² Anyaaktak ni ɔl ogen Yesu eet ci ruben, ma alaŋ azɔɔz, eeci anyak miniŋit alya. Ma arogoz niini eet nico, kicinɔ ma azɔɔz labak. ²³ Ma abiir ɔl dook ooti giye nico, ma ajinɔ niigi maany anɔ ne, “Mayo nici ŋeerti Devid didi?”

²⁴ Mazi avɔ azii ɔl o Parici zɔɔz nico, izito ne, “Aara niini miniŋ ɔla o, eeci anyek nɔɔɔ dɔyiz Loryenti ween alaan o miniŋu kazi Baalziibol.”

²⁵ Maje Yesu aga gi ci abaaban niigi o nɔkɔ, ma anek nɔɔɔ ne, “Gɔɔn mǎ aŋerɔ ɔl ci looc codoi, ma ɔɔɔ niigi maany, loɔci nici uulali, ma alaŋ abil kɔdɔk ŋinti reen. Buk mǎ aŋerɔ ɔl ci kɔrɔk codoi, ma ayɔwɔ niigi maany, alaŋ kɔrɔgi nici abil kɔdɔwe ŋinti reen. ²⁶ Zin buk koca mǎ aŋer Loryenti baliin cin o, ma ɔɔɔ niigi maany, adicai koca baliin cine o taman. ²⁷ Aniyu inoko niiga ne, Anyan Loryenti aneet dɔyiz ci kaaranɛ miniŋ ɔla. Zin mǎ abil nɔkɔ, ŋeneɛn koca ci anyek ɔl o anuyunŋ igeet dɔyiz ci aaranɛ miniŋ o? Inoko zin ɔl ugooc anuyu igeet apakteyunŋ vɔlɔŋ. ²⁸ Bar zin kaara naana miniŋ ɔla Vɔŋize o Jook o ayelzakunŋ gi o iiyakunŋ igeet baliin o Joowo. ²⁹ Akɔm laadun eet ci anim kook kɔgɔrɔz kaal ceeze ci eet ci mooti adɔi dooke coma rak acap nɔɔɔ ɔɔwa, ma adɔɔn zee ook ni adoma kaal ogin dook ceeza.

³⁰ Ma eeti calaŋ korkorya been aneet, amarninan niini aneet. Maje eeti calaŋ atiritan kolotak ɔl baliin o Joowo, atooyek niini ɔl tuu ŋaatan. ³¹ Zin giye nico kanekunŋ ne, “Aara Jooi ɔl baciinok ugeec gɔɔn agɔɔn, kibeɛn zoozok ugeec ger gɔɔn aduwa dook labak. Maje bar eet ci aduwak zɔɔz ci ger Vɔŋiz o Joowo, alaŋ ŋaatin ŋeeci nici aariyai nɔkɔ been neen. ³² Ma eeti ci aduwakan zɔɔz ci ger aneeta ŋeerti Eeto, aara Jooi nɔɔɔ ŋeɛc nico labak. Maje eete ci aduwak zɔɔz ci ger Vɔŋiz o Joowo alaŋ ŋaatin ŋeeci nici aariyai nɔkɔ been neen.

³³ Gɔɔn keen ci abon abiirna buk kebere ci abon. Maje keen ci gerze, abiirna buk kebere ci ger. Mǎ anyeku zin keet o abon kizi gerze. ³⁴ Igeet dɔl ci kokonyawu coko! Kayo udukta kaal ci abon ku mǎ gerze zinzeeti o? Ma gɔɔn laadun ɔtɔgi aduwa kaal o anyak ziniz eecitɔ. ³⁵ Ma eeti ci abon ziniz aduwa zoozok o abon eel zinize onin. Maje eeti ci gerze ziniz aduwa niini zoozok o ger eel zinize onin.

³⁶ Didile kaduwakunŋ igeet, katin iitene ci payiinto e ajin Jooi ɔl dook zoozok ugeec ger baal gɔɔn aduwa loota ŋina e dook.

³⁷ Apakunŋ katin igeet zoozowa ugoocok maany, karabɔŋ apayekunŋ gerzitin, karabɔŋ een bonat.

Arɔɔŋ ɔl Yesu kutugu gi ci atɛet nɔɔɔ biye

³⁸ Ma vurta ivitak ɔl o Parici ogen ki ɔl o gɔɔn ademzek ɔl lotinok o Joowo Yesu, ma avu anek ne, “Gayoi, tuguweyet di gi ci ateedek biye.”

³⁹ Ma azi Yesu ne, “Mayo ɔl ci ɔɔ nico noko akɔm tuwen, ma gerzete ɔrɔɔt nɔkɔn? Ajinaŋ niiga aneet kutugu gi ci ateedunŋ biye. Akɔm zin kina! Olla gi o atɛet ɔl biye baal agoononek nyakanan o kazi Jona e doon ci ka buk kutuguwozeyunŋ igeet. ⁴⁰ Zin kiyo baale aave niini kulugit keŋa waazinok iyyu ki baalinok iyyu e, buk tiŋeere naana ŋeerti Eeto ŋaan kaave tɔdɔwai eecitɔ waazinok iyyu ki baalinok iyyu. ⁴¹ Mazin katin iitene ci payiinto e ɔl baal kutur o kazi Ninava e iŋaaz jena, ma abɔrak Jook kaal ugooc ger agoonu, eeci baale niigi ɔtoŋit baciinok ugeec iinya baal aziŋni zɔɔz o Jona e. Mazin bar demziin cane o adiŋdiŋ ɔrɔɔt kujuk zɔɔz baal Jona e. ⁴² Buk katin iitene ci payiinto e iŋaaz ŋaa ween alaan baal abal looc o kazi Ciba, ma abɔrak Jook kaal ugooc ger agoonu, eeci baale eeron niini ook looce o reen many arɔɔŋ ka kook kiziik demziin ci genyiz baal alaan o kazi Solomon e. Zin bar naana kadiŋdiŋ ɔrɔɔt kujuk Solomon.

⁴³ Zin gɔɔn ma aduŋna miniŋit ci Loryento eete oman, awɔ akɔ balala ŋaati adɔyi akɔm maam ka kook kɔrɔɔŋ ŋinti ayubzi ŋinaante. ⁴⁴ Mazi alaŋ ajowa ŋinti ayubzi ŋinaante, anek ele maany ne, Nyan kimiire kook eete baal kooŋnei looc e. Mazi abada, aku ajowa eet nico abil kiyo ceez o aviilyai kitiliza, ma akɔm ririny keŋa o. ⁴⁵ Ma adun bodo niini akɔ bitaala, ma akɔ anyaa miniŋ ci Loryento oogi ceen torgerem ci ger ɔrɔɔt bar kujukit nɔɔɔ, ma avu abaak eete nico. Ma uulali eeti nici kizi gerze ɔrɔɔt kujuk baale. Iinak zin buk katin ɔl ci ɔɔ nico ger noko gerzitin nici nɔkɔ.

Yaati Yesu ki gɔtɔnɔgi Yesu

⁴⁶ Mazi ŋaan azɔɔzɔ Yesu ki ɔl nicoko nɔkɔ, ivita yaatine ki gɔtɔnɔgi. Ma avu eel bitaala arɔɔŋ ka kozoozɔ ki nɔɔɔ. ⁴⁷ Ma anek eeti oman Yesu ne, “Yaatan ki gotonogu nɔɔɔ ci eel bitaala neke arooŋnyin niigi ozoozɔ ki ineet.”

⁴⁸ Ma abedeke Yesu nɔɔɔ anek ne, “Yaai ŋene? Gɔtɔnɔga ɔl jaŋ?” ⁴⁹ Ma oov Yesu nuyak ogin, ma anek eet nico ne, “Cin di! Nicigi yaai, ma een gɔtɔnɔga. ⁵⁰ Ma eeti ci agɔɔn kaal o arooŋek baaba o aavi tammu tadena nɔɔɔ kutugu, niini gɔtɔna, ma een ŋɔɔna, ma een yaai.”

Aduwa Yesu yabziin ci eet ci aɔowe

13 ¹ Ma iitene nice ele itiŋa Yesu ɔlɔ ook liil otoga, ma akɔ aavi loota ŋinaante. ² Ma ŋinaante ivitak nɔɔɔ ɔl ci meel ger zee makacin ook niini kavoola liil keŋa. Maje ɔl dook aavtiz liil otoga dɔwɔna. ³ Ma oobek niini nɔɔɔ kaal ci meel ger yabziinta. Anek niini nɔɔɔ ne, “Anyak baale eet ci akɔ dɔwen mana. ⁴ Mazi akɔ aɔowe, iitazak dɔwo ogen gɔl keŋ, ma avu avera kibaali, ma adak dook lai. ⁵ Maje dɔwo ogen iinak viten ceen biyen, ma aduŋna dɔwo nici kataman. ⁶ Mazi arane kɔr, araabjai bodo kataman, eeci akɔm tɔdɔ ci abon ka kurukteke agerɔ looc jurunŋ. ⁷ Maje dɔwo ogen iinak bila kɔrgen, ma aduŋna bila zee makacin eedit nɔɔɔ calaŋ abiir. ⁸ Bar dɔwo ogen iinak tɔdɔ ci abon, ma abiir jurunŋ, ma anyaa gɔɔn vokonti codoi kebere ci miliny. Ma anyaa ogen kebere ci meel kidicilim. Maje ogen anyaa kebere ci meelik ɔrɔɔt.”

⁹ Mazi aŋorneke Yesu yabziinte nico, enek nɔɔɔ ne, “Mǎ anyaku iin ci aziiknenu, iziikto jurunŋ.”

Aduwa Yesu gi o azɔɔzi kaal yabziinta

¹⁰ Ivitak ni Yesu nuyawa ogine, ma avu anek ne, “Ma dim gɔɔn niina aduwai ɔl kaal yabziinta o naa?”

¹¹ Abedeke Yesu nɔɔɔ anek ne, “Inoko anyozozeyunŋ igeet genyizi ci ka agayi zoozok o baliin o Joowo aroodi. Maje nɔɔɔ ŋaan kanyozozek genyizi nici. ¹² Ma eeti ci ageny laadun azaaconek bodo nɔɔɔ bar kegeny ɔrɔɔt. Maje bar eeti ci akɔm nɔɔɔ genyiz laadun, mayo nuun anyak da niini ci miliny ter, aamnyai bar ŋaatin nici kaavu nɔkɔ. ¹³ Zin kaduwai nɔɔɔ zoozok yabziinta o, eeci niigi mǎ agelem kaal, alaŋ acin jurunŋ. Mǎ azii, alaŋ aga keŋti cigeec jurunŋ. ¹⁴ Eleemnyai zin zɔɔz baal aduwa nyakanani o kazi Izaya. Azi baale niini ne, “Aziizar gɔɔn niigi kaal been ter, bar alaŋ aga keŋti cigeec. Agelem gɔɔn niigi kaal been ter, bar alaŋ

acin juruŋ. ¹⁵ Eeci ɔl ci ɔɔ nico noko akom nɔɔgo baabani. Ma adiit iin ugeec, eeci alaŋ arɔɔŋ kiziiktɔ, ma amot kebere, eeci alaŋ arɔɔŋ kicintɔ. Mate calaŋ agɔɔn niigi noko, acine waan keberen labak, ma aziikne iini ugeec. Mate waan buk kabadayan niigi aneet, akoli koca nɔɔgo ooti kagaac kaal juruŋ, ma waan kuruguz naana nɔɔgo.”

¹⁶ Bar zin niiga amayuwenu ɔɔɔt, eeci kebere cugooc o acine juruŋ, ma buk iina cugooc o aziijne. ¹⁷ Didile kaduwakuŋ igeet, baale nyakaneta ci meel kibeen ɔl ci meel ole o Joowo arɔɔŋ kicinit kaal ci acinu niiga noko ɔɔɔt ele, ma bar ŋaan niigi kicinit noko been neen. Ma buk arɔɔŋ niigi kiziiyit kaal ci aziijnu niiga noko, bar ŋaan kiziiyit.

Aduwa Yesu keŋ ci yabziin o eet o aɔowe

¹⁸ Iziiartɔ zin juruŋ ka agaac keŋ ci yabziin ci eet ci aɔowe o. ¹⁹ Ma ɔl o azii kaviyak o akati baliin o Joowo, ma bar alaŋ aga keŋ cin, atobɔ niigi ki gɔl keŋ o iinak ɔowo. Ma aku Loryen, ma avera zɔɔz o aɔowe zinzeetine ugeec. ²⁰ Ma vitena ceen biyen iinak ɔowo o atobɔ niigi ki ɔl o gɔɔn olla azii zɔɔz o Joowo talniinta, ma agama kataman talniinta. ²¹ Bar alaŋ akɔ zɔɔz nici zinzeetine juruŋ, ma atuwe ŋintimiliny ter, mazi akunak nɔɔgo piryakzet giye o tuwen uneeŋ, amiiri bodo niigi ki vurut. ²² Ma tɔdɔwa ci eel bila kɔrgena, ma iinak ɔowo o, atobɔ niigi ki ɔl o gɔɔn azii zɔɔz o Joowo, maje bar baabani ci kaal o loocu ki baabani ci arokzetu eet zɔɔz o Joowo kamaduk ŋaatineeŋ. ²³ Mazin tɔdɔwa ci abon, ma iinak ɔowo o, atobɔ niigi ki ɔl o gɔɔn azii zɔɔz o Joowo juruŋ, ma azooni zinzeetine ugeec didi. Ma amena niigi gole o Joowo juruŋ, ma atobɔ niigi baayize uneeŋ ki labi ci abiirna kebere ci miliny, maje ogen abiirna kebere ci meel kidicilim, maje ogen abiirna kebere ci meelik ɔɔɔt.”

Aduwa Yesu yabziin ci labinu kibeen imac

²⁴ Ma bodo aduwak Yesu ɔl yabziin oma anek ne, “Ma baliin o Joowo atobɔ ki mana ci aɔok eeti. ²⁵ Ma iitene oman baalin keŋa ŋaati atanguzi ɔl dook iiya eeti ceen miroi, ma aku aɔok imac kacantɔ ki labi mana eecitɔ zee ɔɔtɔ ni niini. ²⁶ Mazi akɔ arec labina, eyeliztai imac nicigi buk. ²⁷ Ma avu gabara ci eet o mana nico, ma anek nɔɔnɔ ne, “Manyi, iiten baale kizik aɔui ɔowo ci abon ɔɔɔt. Mazin yo imac nici avu ŋaadaŋ?”

²⁸ Ma abedeke niini nɔɔgo anek ne, “Anyak miroi ci iiya oɔok nɔɔgo.”

Ma ajin niigi nɔɔnɔ anek ne, “Mayo zin inoko aroŋnyet ageeta koota keteedawa imac nicoko?”

²⁹ Ma abedeke niini nɔɔgo anek ne, “Akɔm! Alaŋ karooŋ, eeci kabaaban karabɔŋ koca ateedanu labi buk. ³⁰ Anycek rak labi kibeen imac buk kɔɔt niigi dook zee ma iitene ci teedinto e, ŋaan kaduwai ɔl o teedinto ka kɔɔt keteeda rak imac ɔɔwa, ma acap zee ka kujuktek goo. Maje labi ka keteeda zee ka karyekan piim onan.”

Aduwa Yesu yabziin ci keberec ci keetu

³¹ Ma bodo aduwak Yesu nɔɔgo yabziin oma anek ne, “Ma baliin o Joowo atobɔ ki keberec o motoŋtoco aduŋna mana o. ³² Bar mazi akɔ aduŋna, iroktai zee makacin izi keet ci adikir ɔɔɔt. Ma eenyet kibaali ceezi keet nico otone.”

Aduwa Yesu yabziin ci nyigit ci telawu

³³ Ma bodo aduwak Yesu nɔɔgo yabziin oma anek ne, “Ma baliin o Joowo atobɔ ki nyigit o telawu gɔɔn adɔŋca ŋaa jayitota, ma arurek tela zee makacin etedewi tela we dook komokcar o.”

Aduwak Yesu ɔl zoozok yabziinta

³⁴ Aduwak Yesu ɔl kaal dook yabziinta zee ma akom gi codoi ɔɔr noko calaŋ aduwak niini nɔɔgo yabziinta. ³⁵ Agooni kaala nici o ka keleme zɔɔz baal aduwa nyakanani. Baale azi niini ne, “Katin gɔɔn mɔ kazoozona kibeen nɔɔgo, kaduwai zoozok yabziinta. Kaduwai katin nɔɔgo kaal ci baale kinatamma laadun e ŋaan kagaac.”

Aduwa Yesu keŋ ci yabziin ci labinu ki imac

³⁶ Otoŋek ni Yesu kɔle looc ɔɔtɔ ook ceeza. Ma avunak nuyawa ogine nɔɔnɔ, ma avu anek ne, “Duwayet di keŋ ci yabziin ci labinu kibeen imac o.”

³⁷ Ma abedeke niini nɔɔgo anek ne, “Ma eeti ci aɔok ɔowo ci abon o aneeta ŋeerti Eeto neen. ³⁸ Maje mana looc neen. Ma labina ci abon o ɔl o avunak baliin o Joowo neen. Maje imac ɔl o avɔ niigi ki Loryen. ³⁹ Ma miroiti ci aku aɔok imac o Loryen neen. Ma ɔl ci alinjij ateet labi o toonnyak o Joowo. ⁴⁰ Zin kiyo buk alotai imac, ma ajukonek goo o, abil buk tiŋeere iitene ci aɔorneke lɔɔci e noko. ⁴¹ Waanci kagame baliin onan loota ŋina kitoon tiŋeere naana ŋeerti Eeto toonnyak ogan kɔɔt kuluta ɔl dook o gɔɔn ademzek gɔɔngi oogi gɔl ci ka kabacai baciinok, kibeen ɔl o gɔɔn agɔɔn kaal o ger dook. ⁴² Ma avu ajukek nɔɔgo goo, ma alu niigi ŋinaante zee ma adak nyigit. ⁴³ Maje dɔlya o Joowo anyak katin niigi vooritin ci vɔɔr per kataraanet kiyo ii o baliinte o baatineeŋ tammu tadena. Zin mɔ anyaku iin, iziiktɔ juruŋ.

Aduwa Yesu yabziin ci akati warki ci aroodi mana

⁴⁴ Ma baliin o Joowo abil kiyo warkina o arɔɔt da eeti oman mana keŋa o. Mazi awɔ aku eeti oman bodo mana nico, ma ajowa warki nicoko, ma alaŋ arɔɔŋ rak kadawa. Bar atalne ɔɔɔt, ma abun, ma akɔ ataaline kaal ogin anyak dook zee iiya ni ataala mana nico ele dook kizi cin.

Aduwa Yesu yabziin oma ci akati baliin o Joowo

⁴⁵ Buk baliin o Joowo abil kiyo eeti ween tajer arɔɔŋ kataala kalbe ceen ziira o. ⁴⁶ Mazi akɔ ajowa niini codoi ŋaatineeŋ ci adɔŋnyi ɔɔɔt ele, amiironek kɔrɔk, ma akɔ ataaline kaal ogin anyak dook zee iiya ni ataala ziira nicoko.

Aduwa Yesu yabziin ci akati cabak

⁴⁷ Bodo buk baliin o Joowo abil kiyo cabai o ajukonek liil, ma agama kuluk kebere dook o. ⁴⁸ Mazi akɔ abiz cabai nici, agurak ɔl dɔwɔn, ma aku aavtiz loota, ma atakal kuluk. Adoma kuluk ci abon adikir o arek tori, maje ci miliny ger o ajukek tuu. ⁴⁹ Mazin buk katin iitene ci adican lɔɔci e abil noko. Avɔ katin toonnyawa o Joowo, ma avɔ alota ɔl o ger dook, ma aŋera nɔɔgo doon ole o abon dook lai. ⁵⁰ Ma avu ajukek nɔɔgo goo o Loryento. Ma alu niigi ŋinaante zee ma adak nyigit kirkic kirkic.”

Demziin o rēen been o colai

⁵¹ Ma ajin Yesu nōwō anek ne, “Inoko kaal ci kaduwakuŋ noko dook aziŋnu juruŋ?”

Ma abedeke niigi nōwō anek ne, “Ii, kaziŋna.”

⁵² Ma anek Yesu nōwō ne, “Ma ɔl o aga warage o Joowo rēen, ma ademzek gōwōgi oogi, ma inoko ivita iziti nuyak cigan, atobo niigi kibeen eet ci korgu anyak ceeze cin kaal o abon rēen been buk o colai o.”

Abor ɔl Yesu kuture onin kazi Nazaret

⁵³ Mazi adica Yesu yabziinok nicoko, ɔwō ŋinaante imiurozek kutur onin. ⁵⁴ Ma ako ademz ɔl ceeze o lotento. Ma abiir ɔl o azii nōwō ŋinaante ooti tet, ma anō niigi ne, “Ma dim logoti nici ajowa genyiz kibeen dayiz ci agōoni kaal ci atet ɔl biye noko ŋaadaŋ? ⁵⁵ Mayo niini alaŋ een ŋeerti eet o gōon abaac keen ŋina o neen? Alaŋ een yaatin neen Meri? Alaŋ een gōtōwōgi neen awoyi Jemis ki Josev ki Saiman been Judaz? ⁵⁶ Alaŋ een ŋōwōgi dook neen o abaak ŋina o? Ajowa zin niini kaal nicoko dook ŋaadaŋ?” ⁵⁷ Zin enico otoborit niigi nōwō.

Ma anek Yesu nōwō ne, “Gōon laadun nyakaŋan atitiny nōwō ɔl ci kuturyok oogi, maje bar ɔl o kutur onin kibeen ɔl o tatok onin ele alaŋ atitiny nōwō.” ⁵⁸ Ma akōm waanice Yesu kaal ci meelik atet ɔl biye agōon ŋinaante, eeci alaŋ anyak niigi tuwen.

Abaaban Erod zōz ci akati Yesu

14 ¹ Ma iinyaye niceke iziik alaani o kazi Erod baal abal looc o kazi Galili e kaal ci agōon Yesu o. ² Ma anek niini alaat o miliny alinŋiŋ ki nōwō ne, “Inoko nicini Jōn o oony ɔl neen abada bodo daayiza. Gi zin inoko ci agōoni niini kaal ci atet ɔl biye noko neen.”

Daayiz o Jōn o oonyi

³ Azi Erod nōkō o, eeci baale agam niini Jōn, ma acap sijina giye ci akati Erodias ween ŋaa o gōtōni o kazi Pilip. ⁴ Eeci baale anek Jōn Erod ne, “Alaŋ abon ŋaati bodo ariye ŋaa ci gotonon o niina maany.” ⁵ Waanice arōŋ Erod kuruk Jōn kadaak, bar olla waanice aŋole niini ɔl o Juz, eeci waanice Jōn ŋaatineeŋ abil kiyo nyakaŋani o. ⁶ Mazi ako aada Erod iiten onin baal aritan e, otowa ɔl ci meelik ka kivita kimicit ole cin o. Orogom ni tinati Erodias ɔl ŋuma zee makacin eteede Erod ziniz ɔrɔt ele. ⁷ Ma aterkedek dole gi ci anek ne, “Mā anyak gi ci olla aroŋ, duwayan ka kanyin.”

⁸ Imiire ni dole ook ijin yaatin gi ci abon ka kanyek Erod nōwō. Mazi abada, iya anek Erod ne, “Karoŋ ɔɔ o Jōn. Nyaayan kodooca inoko ele ŋina.”

⁹ Ma awuci Erod ziniz ɔrɔt ele zooze nico. Bar giye o eterkedi niini dole zōz ɔl dook ŋuma, ɔkōma bodo gɔl ci ka kabadai zōz nico. ¹⁰ Ma aduwak ɔl kɔt keteeda Jōn ɔɔ sijina. ¹¹ Ma anyaa ɔl dole ɔɔ kodooca, ma ako anyek niini yaatin. ¹² Mazi azii nuyawa o Jōn daayiz onin, ivita adomta nōwō, ma avo ada zee iya ni ɔt uduktak Yesu daayiz.

Adayiz Yesu ɔl ci meelik ger (5000)

¹³ Mazi azii Yesu zōz nico, ɔwōzō niini ki nuyak ogin ŋinaante oneec liil kavoola ɔwō ŋaatineeŋ doon tuuwa. Mazi avo aziiknek ɔl Yesu ŋinite, ɔwō buk niigi odotek korogjok looc oneec Yesu zōne liil otoga. ¹⁴ ŋinaante mazi atōdak Yesu dōwōn, icinun ɔl ci meelik anowa nōwō noko. Ma uwucnek nōwō kōle nici, ma arogoz o amōr ŋaatineeŋ dook moorizowe.

¹⁵ Ma iitene nice ele yoman, ivitak Yesu nuyawa ogine, ma avu anek ne, “Izi lōoci yoman, ma buk een ŋina lōoci balal. Anyek ɔl kōt kuturyowe ci miliny neke ka kōt kataalta kaal ci adak.”

¹⁶ Bar abedeke Yesu nōwō anek ne, “Alaŋ agano ŋaati awoyi. ŋaan anyeku nōwō kaal ci adak niiga alya.”

¹⁷ Ma abedeke nuyawa nōwō anek ne, “Akōm dayiin ci kanyaka meel kina. Kanyaka ŋina dōken tur ki kuluk ram nōkō.”

¹⁸ Enek ni Yesu nōwō ne, “Anyaaktayan di kaal nicoko ŋaato.” ¹⁹ Ma aduwak ɔl kaavtiyo loota artene. Ma adoma dōken ceen tur noko ki kuluk ceen ram noko, ma agelem tammu taden, ma anyek Jook zany. Eteet ni dōken, ma anyek dōken nicoko kibeen kuluk nuyak ogin ka keŋeryek ɔl. ²⁰ Ma adake ɔl dook zee makacin ipiiyante. Ma alota nuyawa dayiin ci anyigjai o zee ma abitiz gilanya amōtō ram. ²¹ Ma ɔl ci baal adake neke een maczet doon lak tur lak eet ram kamōtō (5000) calaŋ akeep ɔl ŋai ki dɔl.

Awo Yesu maam tadena

²² Mazi avo adotiz ɔl dayiinta, anyek Yesu nuyak ogin kōtōzō enico ele kabaakte kavoola karakte kōt liil baagita. Maje niini aavi rak ka kazaan ɔl kōt korogjowe. ²³ Mazi avo azaani ɔl, ɔwō niini doon ook ɔtɔt be taden ka kook kijin Jook. Ma ako aavi ŋinaante niini doon zee ma yoman. ²⁴ Maje kavooli o avōyi nuyawa e ŋaan awo liil keŋa nōkō, eeci atirginyo ki ŋɔt ɔrɔt ele. ²⁵ Mazi ako amaman tammu, iyyak Yesu nuyak ŋaati awoyane maam tadena. ²⁶ Mazi acin nuyawa nōwō awo maam tadena nōkō, otōŋole looc ɔrɔt ele. Abaaban bar azi ne, Coma een miniŋit. Makacin egerenyit niigi ŋoliinta.

²⁷ Ma azoozek Yesu nōwō anek ne, “Aneeta gi! Má aŋolinu looc gaga. Anyek zinzeeti kodoyit.

²⁸ Ma abedeke Pitōr Yesu anek ne, “Manyi, mā een didi nicini ineet neen, nyan buk aneet kōtō maam tadena kook ŋaatun.”

²⁹ Ma anek Yesu nōwō ne, “Ija.” Ma aduŋna Pitōr kavoola, ma awo maam tadena ako ŋaati Yesu. ³⁰ Bar bodo mazi acin ŋɔt iyaan ɔrɔt nōkō, anyawun ŋoliin, ma arōŋ ako maami tō ka waan kotodode. Makacin egereny izi ne, “Manyi, Manyi, eelawan.”

³¹ Ma itoonek Yesu nōwō aziit, ma eela nōwō enico ele. Ma anek Yesu nōwō ne, “Anyei niina tuwen ci miliny ter. Bodo anyi ziniz kizi dākḍak naa?”

³² Ma avo niigi dook kavoola, ma azi ŋɔti tiv. ³³ Ma adiŋdiŋan nuyawa dook Yesu azi ne, “Een didi te niina ŋeerti Joowo.”

Arogoz Yesu ɔl ci amōr kuture ci kazi Genezaret

³⁴ Abaayizit ni niigi liil, ma avunak looc o kazi Genezaret. ³⁵ Mazi avo acin ɔl Yesu ŋinaante, iyezit niigi nōwō, ma itoonek niigi utugeti ɔl dook kutura ka kulutak ɔl Yesu ɔl o amōr. ³⁶ Ma ilalek niigi nōwō ka kanyek ɔl ci amōr noko olla nuun kuumit rum cin o. Mazi olla uum ɔl o amōr rum cin o, orogit didi niigi moorizowe ugeec.

Demziin ci akati keer ci ɔl o Parici

15 ¹ Ivitak ni Yesu ɔl o Parici ki ɔl oogi ole o gɔɔn ademzek ɔl lotinok Jerusalema, ma avu anak nɔɔnɔ ne, ² “Ma dim nuyawa cugune o alaŋ azooni lotinok o jijitigaac reɛn o naa? Alaŋ rak gɔɔn niigi oony azeen juruŋ ijaan kadaktɔ eo aduwan keeranɛ ogaac naa?”

³ Ma abedeke Yesu nɔɔgo anak ne, “Ma niiga buk alaŋ azoonu lotinok o Joowo, ma bar anuyu demziinok cugooc doon o naa? ⁴ Azi gɔɔn Jooi ne, Tɔŋɔle baatun ki yaatun. Mā alam eet ci aduwak yaatin ki baatin gi ci ger, abon aruwe niini kadaak. ⁵ Maje bar niiga ademzonu anonu ne, Mā anyewun eeti kaal ogin anyak dook Jook, alaŋ bodo niini agano ŋaati atiriti baatin karabɔŋ een yaatin. ⁶ Gole nico eeti nici alaŋ aŋole baatin ki yaatin. Buk gole nico epeztu niiga zɔɔz o Joowo, ma bar unuyu zoozok cugooc doon. ⁷ Igeet ɔl ci abuuku eeleeti o! Aleema didi Jooi zɔɔz o akanuŋ igeet baal aduwa nyakanane o kazi Izaya ane ne, ⁸ Gɔɔn ɔl nicigi adiŋɗiŋanan aneet utugetine doon, maje bar zinzeeti cigeec o adeyai ŋaatan many. ⁹ Alaŋ zin niigi agano ŋaati adiŋɗiŋanan aneet, eeci arican niigi demziin ci keeranɛ ugeecik ɔɔt kujuk demziin ci zɔɔz onan.”

Kaal o anyek eet kizi ririny

¹⁰ Otowa ni Yesu kole dook, ma aku anak ne, “Iziikto di! Aryek keŋ ci zɔɔz co zinzeeti juruŋ. ¹¹ Akom gi ci adak eeti otoga ci anyek eet kizi ririny ŋume o Joowo, bar zin kaal o gɔɔn aduwa eeti otoge onin neen o anyek nɔɔnɔ kizi ririny.”

¹² Ma vurtā itak Yesu nuyawa ogine, ma avu anak ne, “Zoozok ona aduwa e anyigit ɔl o Parici ɔɔt ele.”

¹³ Ma abedeke Yesu nɔɔgo anak ne, “Mā anyak gi ci ŋaan laadun baaba tammu tadena koɗok, ma bar aduŋna niini doon, adaacak koca bitaalin. ¹⁴ Mā areku zin niiga nɔɔgo zinzeeti gaga. Niigi olla alaati ci ruben. Gɔɔn laadun mā ayit eeti ci ruben gon ci buk ruben, iinak koca niigi dook look.”

¹⁵ Ma ajin Pitɔr Yesu anak ne, “Duwayet di keŋ ci yabziin nico.”

¹⁶ Ma anak Yesu nɔɔgo ne, “Ma een buk igeet nuyak ogan ele, ŋaan aleekuŋ keŋ ci zɔɔz nico noko? ¹⁷ Alaŋ agayu dayiin ci adak eeti ci deer otoga avo keŋa, ma bodo avo aduŋna o? ¹⁸ Bar zin kaal o anyek eet ci deer kizi ririny ŋume o Joowo neen o aduŋna zinize onin. ¹⁹ Eeci ziniz anyaa baabaninok ci meel ger kiyo monyenet ci kamonyi ɔl ci deer, ki zoocmazit, ki reecanzet, ki gorziin, ki vɔɔŋ, been ŋomtiin. ²⁰ Avu kaal nicigi dook eet ziniza, ma anyek nɔɔnɔ kizi ririny ŋume o Joowo. Maje bar gi ci kadayin ijaan kotoonyit azeen o alaŋ anyek eet kizi ririny ŋume o Joowo.”

Ŋaa ci atuwe

²¹ ɔtɔɔ ni Yesu looce ci kazi Genezaret noko ook looce ci aŋɔŋɔ ki looc o kazi Tayor been Sidon. ²² Maje ŋinaante anyak ŋaa ceen borit ci ɔl o kazi Kanan abaak ŋinaante, ma akunak niini Yesu, ma agereŋy ŋaati aluwi ɔɔt ele, ma ilalek nɔɔnɔ anak ne, “Manyi ween ŋeerti Devid, eelawan da! Tiritan! Kanyei beenyān ɔɔ ci anyak minijit ci Loryento alya, ma apirnanɛ nɔɔnɔ ɔɔt ele.” ²³ Maje Yesu ajaki niini labak. Akom gi ci aduwak nɔɔnɔ kina. Ivitak ni Yesu nuyawa ogine, ma avu anak nɔɔnɔ ne, “Anyek ŋaa nico kɔtɔɔ, eeci anuyet, ma awudeket luwanta.”

²⁴ Ma abedeke Yesu, azi ne, “Kitoonnyai laadun o ka kiiya keela ɔl o Juz doon, eeci niigi atobo ki eeza ci akoloni.”

²⁵ Mazi azii ŋaa nici zɔɔz nico, iiya, ma aku akani kozoŋti looc Yesu ŋuma, ma alu azi ne, “Manyi, tiritan!”

²⁶ Ma abedeke Yesu nɔɔnɔ anak ne, “Alaŋ abon ŋaati kaamane dɔl dayiin, ma kanyek orze.”

²⁷ Ma ilalek niini Yesu anak ne, “Manyi, aleema didi zɔɔz nico. Zin mayo nuun een orze o ele aver zurzuryak o gɔɔn iinane ɔl dayiinta o labak.”

²⁸ Ebedeke ni Yesu nɔɔnɔ anak ne, “Een ŋaa ci anyei tuwen ci appe ɔɔt. Ŋaan zin agoononekin ineet gi ci ona arooŋ o.” Enico ele orok didi dole onine.

Arogos Yesu ɔl ci meel ger

²⁹ ɔtɔɔ ni Yesu ŋinaante, ma ako ano liil o kazi Galili otok. Ma bodo ooŋ liil otok, ma atɔt ako taden, ma ako aavi loota biyene ŋinaante. ³⁰ Ma avunak ɔl ci meel ger nɔɔnɔ ŋinaante. Anyaak niigi nɔɔnɔ ɔl ci ŋɔɔlik, ki ɔl ci ruben, ki ɔl ci dɔkɔm azeena, ki ɔl ci adiiti iina ki alemeti, been ɔl oogi ci amɔɔr meelik ger. Ma avu areke niigi Yesu looc, ma arogos niini ɔl nicoko dook lai. ³¹ Mazi avo acin kole dook ŋinaante, ɔl o adiiti iina ki alemeti e iziikto ma azɔɔz labak, ki ɔl o dɔkɔm azeena e ɔɔlante azeena ugeec, ki ɔl o ŋɔɔlik e ɔtɔɔz berber, ki ɔl o rubenik icinto, ibiirit nɔɔgo ooti giye nico, ma adiŋɗiŋan niigi Jook ɔɔt ele.

Adayiz Yesu ɔl ci meelik (4000)

³² Otowa ni Yesu nuyak ogin, ma aku anak ne, “Awucnekan ɔl nici ɔɔt ele, eeci karomena ki nɔɔgo iinya ceen iiyu noko dook, ma ɔkɔm niigi gi ci adak. Alaŋ zin karooŋ kanyek nɔɔgo kazaante kɔtɔɔz noko kɔkɔm gi ci adak, gerze ŋaan avo aval magizeeti gola.”

³³ Ma abedeke nuyawa nɔɔnɔ anak ne, “Ka zin yo kojokta balale nico dayiin ci aleeno ki kole nicoko dook ŋaadaj?”

³⁴ Ma ajin Yesu nɔɔgo anak ne, “Anyaku inoko dɔken izok?”

Ma anak niigi nɔɔnɔ ne, “Kanyaka dɔken torgerem ki kuluk ci miliny ter.”

³⁵ Uduwak ni Yesu ɔl dook kaavtiyo loota. ³⁶ Ma adoma dɔken ceen torgerem noko ki kuluk nicoko, ma anyek Jook zany, ma atet dɔken nicoko, ma anyek nuyak keŋeryek ɔl. ³⁷ Ma adake ɔl oke dook zee been paŋ. Ma alota nuyawa dɔken ci anyigjai o zee ma abitiz gilanya torgerem. ³⁸ Maje ɔl ci baal adake neke een maczet doon eet tur lak eet ram (4000) calaŋ kakeebek ŋaai ki dɔl.

³⁹ Mazi adotiz ɔl dayiinta, anyek Yesu ɔl kɔtɔɔz. Ma atɔt niini kavool, ma abaayiz liil ako looce o aŋɔŋɔ ki kutur o kazi Magadan.

Abor Yesu ŋaati agɔɔni gi ci atet ɔl biye

16 ¹ Ma avunak ɔl o Parici ki ɔl o Sajuzi Yesu. Arɔɔŋ kicinta nɔɔnɔ, ma avu anak ne, “Tuguweyet di gi ci ateedet biye ci aku tammu tadena.”

² Ma abedeke Yesu nɔɔgo anak ne, “Gɔɔn mā akola ŋɔɔti ci jenu o, anonu ne, Uluz tiŋeere tammu alaŋaan bodo atii. ³ Mā acinu anewek tɔ ŋeere ririwɔna, anonu ne, Atili tedec tammu. Anyaku gɔɔn niiga arizet ci agayu kaal o ka kivita looc tiŋeere ŋɔɔta.

Bar zin alaŋ eeginu arinya ci kaal o agooni inoko o aroonkeŋ Jooi igeet ka agaac. ⁴ Mazin ol ci aronŋ kicinit gi ci atet ol biye kiyo niiga noko gerze ɔɔɔt, ma akom nɔɔɔɔ Jook. Alaŋ zin bodo kagoonekuŋ naana igeet gi oma ci ateeduŋ biye. Olla gi baal agoononek Jona e doon ci ka buk keyelozeyuŋ igeet.”

Enico odotek Yesu nɔɔɔɔ looc, ɔɔɔ.

Alaŋ aga nuyawa keŋ ci zɔɔɔ ci aduwa Yesu o

⁵ Mazi abaaki nuyawa kibeen Yesu avo liil baagita, erektek nuyak ɔɔkena ŋaati anyaaani. ⁶ Ma anek Yesu nɔɔɔɔ ne, “Egenyit ɔɔɔt! Ebeyit eleeti ole o Parici been ol o Sajuzi. Edeya eleeti nyigite ugeec goon arek ɔɔken ka ketedeec o.”

⁷ Ma anɔmtɔ nuyawa ano ne, “Aduwa boŋ gi nico o, eeci ŋaan kanyaakta ɔɔken.”

⁸ Maje Yesu aga gi ci azɔɔɔ niigi o nɔkɔ, ma ajin nɔɔɔɔ anek ne, “Naa ako ma azoozu gi ci akomnuŋ ɔɔken o? Anyaku niiga tuwen ci miliny ɔɔɔt. ⁹ ŋaan dim iziikto nɔkɔ? Alaŋ aadanu iiten baal kaŋereke ol ween 5000 ɔɔken ween tur nɔkɔ e? Waanice alotanu dayiin o anyigjai zee ma abitiz kodooc izek? ¹⁰ Inoko buk alaŋ aadanu iiten baal kaŋereke ol ween 4000 ɔɔken ween torgerem nɔkɔ e? Waanice alotanu dayiin o anyigjai zee ma abitiz kodooc izek? ¹¹ Alaŋ zin aziŋnenu naa? Alaŋ kazooz naana zɔɔɔ ci akati ɔɔken ci ka ketedeec o. Bar kilotuŋ egenyit ole o Parici been ol o Sajuzi. Edeya eleeti demziinte uneen ger atobo ki nyigit o goon arek ol ɔɔken.”

¹² Enico agaac nuyawa alaŋ aronŋ Yesu nɔɔɔɔ kedeya eleeti nyigite o goon arek ol ɔɔken ka ketedeec. Bar aronŋ nɔɔɔɔ kedeya eleeti demziinte o ol o Parici ki ol o Sajuzi.

Acuba Pitɔr jinen o Yesu

¹³ Mazi akunak Yesu looc ci ajonzo ki kutur o kazi Sisiriya Vilipiya, ŋinaante ijin niini nuyak ogin anek ne, “Mayo dim goon azi ol ne, Naana ŋeerti Eeto keen ŋeneen?”

¹⁴ Ma abedeke niigi nɔɔɔɔ anek ne, “Azi ol ogen ne, Een Jon o oony ol. Azi ol ogen ne, Een Ilija. Azi ogen ne, Een Jirimaya. Azi ol ogen ne, Een nyakanan oma nyakananete o Joowo baal adaayito e.”

¹⁵ Ma anek niini nuyak ne, “Ma niiga aziyu ne, Keen naana ŋeneen?”

¹⁶ Ma abedeke Saiman Pitɔr nɔɔɔɔ anek ne, “Een niina Kiristo ween ŋeerti Jook o arogi been neen.”

¹⁷ Ma anek Yesu nɔɔɔɔ ne, “Amayuwin Jooi ineet Saiman ŋeerti Jona. Eeci alaŋ aduwakin zɔɔɔ nico eeti ci deer, bar baaba o aavi tammu tadenu neen o ayzelakin ineet zɔɔɔ nico. ¹⁸ Inoko zin kakateyin ineet zaar ci kazi Pitɔr, ma keŋ ci zaar nicoko kazi ne be, eeci ado niina kiyo be o. Mazin biye nico ŋaan keenyeti ceez onan een ol o atuyan aneet, ma alaŋ anim daayizi kuulal nɔɔɔɔ. ¹⁹ Kanyin tiŋeere alaazet o baliin o Joowo. Zin gi o abur niina loota ŋina, aborne buk tammu tadena. Maje gi o agama niina loota ŋina, agamnyai buk tammu tadena.”

²⁰ Ma bodo aricanek Yesu nuyak ka calaŋ aduwak ol oogi gi o eene niini Kiristo.

Aduwa Yesu zɔɔɔ ci akati daayiz onin

²¹ Ma iitene nice ele akata Yesu gi ci aboraki nuyak ogin labak nɔkɔ zɔɔɔ ci anek ne, “Abon kako Jerusalema ka koɔt kigidan alaata o ceez o Joowo been ol o ademzek ol lotinok. Arukan tiŋeere niigi aneet kadaak. Mazi kadica iinya iiyu, ŋaan kaŋaaz bodo daayiza.”

²² Ma alakada Pitɔr Yesu doon kidicilim, ma anek ne, “Uloi, Manyi! Lam gi nico calaŋ akunakin ineet been neen. Abon bai ŋaati alaŋ akunakin gi nici nɔkɔ been neen.”

²³ Enico ele ookci Yesu, ma anek Pitɔr ne, “Nyeye ŋaatan Loryen co. Inoko aroonŋ niina ka nyook goɔl o liŋliŋon onan, eeci baabani cune o alaŋ aku Joowa, bar baabani ci eet ci deer.”

²⁴ Enek ni Yesu nuyak ogin dook ne, “Mā aronŋ eeti konowan aneet, abon areyek nɔɔɔɔ ele onine, ma abon agama giden ki piryakzet ŋaati anuyan niini aneet. ²⁵ Eeci eeti ci aronŋ korogoz ele onin, bar akoloz. Maje eeti ci akoloz ele onin ŋaatan, bar arogoz. ²⁶ Mayo zin inoko mā anyak eeti kaal o loocu dook, ma bar akoloz roget ci ele onin, bonat inoo? Mā adaak eeti, akom bodo gi ci ka kabadake nɔɔɔɔ roget onin. ²⁷ Kakun zin tiŋeere naana ŋeerti Eeto ŋaati korokorana ki toonnyak o Joowo diŋdiŋonte o baaba. Ma kaku kacacai goon eet co kaal ogin abon baal goon agoon e. ²⁸ Abon zin agayu gi ce. Anyak ŋaatonooŋ ŋina ol oogi calaŋ adaai zee ma acinan aneeta ŋeerti Eeto waanci kakune baliinte onan.”

Owo Yesu ele

17 ¹ Mazi adicai iinya ceen torkonon, iyit Yesu Pitɔr ki Jemis been gotoni Jemis o kazi Jon, ma avo atɔɔt be ci wun, ma aavtiz niigi doon biya ŋinaante. ² Mazi ŋaan aavtiz nɔkɔ, bar acin niigi Yesu otowe nɔɔɔɔ keberen nɔkɔ. Otowe ŋum onine kizi vɔɔr per kataraanet kiyo ii o. Ma ookci rumanne ogine aborcek e buk kizi vɔɔre per ɔɔɔt. ³ Ma ŋintimiliny icinit niigi Mosis ki Ilija azɔɔɔ ki Yesu.

⁴ Enek ni Pitɔr Yesu ne, “Manyi, kavu te ŋina juruŋ. Inoko mate aroonŋ, nyet keteenycawa kaal ceen ceezi kabili kor iiyu ka codoi kizi cun, codoi ci Mosis, codoi ci Ilija.”

⁵ Mazi ŋaan azɔɔɔ niini nɔkɔ, acin diizoc ci vɔɔr per aku, ma aduuleke nɔɔɔɔ diiz. Ma azii niigi molok ci azɔɔɔ diizoce nico eecito azi ne, “Nicini ŋeeran onan een didi o kareez ɔɔɔt. Katalne naana ŋaatin ɔɔɔt. Abon zin niiga dook aziŋnu nɔɔɔɔ.”

⁶ Mazi azii nuyawa molok nico, iiyak nɔɔɔɔ kulurkulur ɔɔɔt ele zee makacin iitazɔ ŋoliinta kakati ŋumti looc. ⁷ Iiya ni Yesu, ma uum nɔɔɔɔ anek ne, “Itiŋgaz jena. Má aŋolinu looc gaga.” ⁸ Mazi aara niigi kebere, okoma eet oma ci acin kina. Izi Yesu doon.

⁹ Mazi alocai niigi be tadena, iricanek Yesu nɔɔɔɔ enek ne, “Mā avo rak aduwaku gi ci ona acinu noko ol oogi zee been iiten ci katin kaŋaane naana ŋeerti Eeto daayiza e.”

¹⁰ Ijinit ni nuyawa nɔɔɔɔ enektek ne, “Dim goon alaata o ademzek ol lotinok azi ne, Arayai katin Ilija rak ɔɔwa ŋaatan o naa?”

¹¹ Ma abedeke Yesu nɔɔɔɔ anek ne, “Ii, aleem didi. ŋedet Ilija arayai ɔɔwa rak ŋaatan ka kiiya kidimdimanayan aneet kaal dook keelit juruŋ. ¹² Inoko zin kanekuŋ ne, Iiya Ilija iiten baale, ma akom eet ci aga nɔɔɔɔ. Ma bar agoonek niigi nɔɔɔɔ kaal ci ger eo aronŋ niigi. Zin kiyo waanice agiti niigi nɔɔɔɔ e, agidan buk tiŋeere niigi aneeta ŋeerti Eeto nɔkɔ.”

¹³ Enico agaac nuyawa zɔɔɔ ci aduwak Yesu nɔɔɔɔ o akati Jon o oony ol.

Arogos Yesu logo ci anyak miniñit ci Loryento

¹⁴ Mazi alocai niigi be tadena, ivita amada ol ci méele be loota. Ma akunak eeti oman Yesu, ma aku akani kozonñi looc nɔɔnɔ ɲuma. ¹⁵ Ma anek ne, “Manyi, eelawan da! Tirit ɲeeran ci anyak mɔɔriz ci avalni ce. Gɔɔn ma agam nɔɔnɔ mɔɔrizi nici, iinak goo karabonɲ een maam. ¹⁶ Kanyaai uyene nɔɔnɔ nuyak cugun noko, bar akom ɲaatineej ci anim kitirit nɔɔnɔ been neen.”

¹⁷ Ma abedeke Yesu nɔɔgo anek ne, “Igeet ol ci akomnuj tuwen koko. Kayo koromte naana kibeen igeet zee been inin ka utuyo? Ka kemez zɔɔz cunooj zee been inin? Anyaaktayan zin di logo nico ɲaato.” ¹⁸ Ma agerenyek Yesu miniñit ci Loryento noko kuduna. Ma arogi logoti enico ele.

¹⁹ Ivitak ni Yesu nuyawa ogine ɲaati aave niini doon, ma avu ajin nɔɔnɔ anek ne, “Mate uyene ageeta akomneket miniñit nici ɲaati kaarana naa?”

^{20–21} Ma abedeke Yesu nɔɔgo anek ne, “Alaɲ niiga animnyu aarta moorizok ki miniñ ol a o, eeci alaɲ anyaku tuwen. Didile kaduwakuñ igeet, inoko te nuun anyayit olla tuwen ci miliny ter ceen ki keberec ci lañiracoco, koca ma aneku be nico ne, Piya ele ɲina! Bitɔ bil bodo ɲaate! Aziñnuj koca, ma apiya ele ɲina, ma ako ɲaati ona aduwaku niiga nɔɔnɔ o. Ma akom waan gi ci akomnekuñ igeet been neen.”

Aduwa Yesu bodo zɔɔz ci akati daayiz onin

²² Mazi avu alote Yesu ki nuyak ogin iitene oman looce o kazi Galili, enek niini nɔɔgo ne, “Inoko izi ajon ɲinti ka kuruktan ol aneeta ɲeerti Eeto kadaak. ²³ Ma iinyaye ceen iyyu ɲaan kiɲaaz bodo daayiza.” Mazi azii vuyawa zɔɔz nico, akatit culum ɔɔɔt ele.

Aruk Yesu guruc o ceez o Joowo

²⁴ Mazi avunak Yesu ki nuyak ogin Kapernam, ivitak ol o gɔɔn alot guruc o ceez o Joowo Pitɔr, ma ajin nɔɔnɔ anek ne, “Mayo dim gɔɔn alaani cunooj noko buk aruk guruc o ceez o Joowo?”

²⁵ Ma abedeke Pitɔr nɔɔgo anek ne, “Ii ri. Aruk gɔɔn buk.”

Maje Yesu aga gi nico noko. Mazi ako Pitɔr ɲaatin ceeza, enek Yesu nɔɔnɔ ne, “Saiman, mayo inoko niina azi ne zooze nico? Inoko gɔɔn aruwek alaati o loocu guruc ol jañ? Ol o tatok onin ele, yo da aruwek nɔɔgo guruc ol o bitaalu?”

²⁶ Ma anek Pitɔr nɔɔnɔ ne, “Aruwek nɔɔgo guruc ol o bitaalu.”

Ma azi Yesu ne, “Abon! Mazi abil noko, alaɲ waan agano ɲaati karuyi naaga guruc ci ceez ci Joowo o. ²⁷ Bar zin alaɲ karooj naaga kanycek nɔɔgo kotoborteyet noj kiziti ne, Coma alaɲ kareez naaga ceez o Joowo. Inoko zin bitɔ liila. Yiito abic ka bitɔ detai. Zin tedec kulugiti ci ako agama oowa neke ajowa anyak otoga guruc ci kaleeno ki ageet dook ka kuruktek ol nicoko. Doma zin, tedec anyek nɔɔgo.”

ɲeneen dim ci adikir baliinte o Joowo?

18 ¹ Ma iitene nice ele ivitak Yesu nuyawa ogine, ma ajin nɔɔnɔ anek ne, “ɲeneen dim inoko ci adikir ɲaatinaaɲ baliinte o Joowo?”

² Ma awa Yesu dole ci miliny, ma aku anyek kibil nɔɔgo ɲuma. ³ Ma azi ne, “Didile kaduwakuñ igeet, mā alaɲ abadanu eleeti eelit kiyo doɲya o miliny o, alaɲ avoyu baliinte o Joowo been neen. ⁴ Ma eeti ci anyek ele kizi celbez kiyo dole ci miliny abil igeet ɲuma noko, eet o adiñdiñ baliinte o Joowo neen. ⁵ Ma eeti ci atalna dole ci miliny kiyo dole nici noko zaare ogan atalnanan niini aneet.

Baciinok o anyek ol kɔɔt gooya

⁶ Bar mazi anyak eet ci anyek dol ci miliny noko codoi ɲaatineej kimiire kivurut calaɲ atuyan aneet, agano koca niini ɲaati acaboneke golu nɔɔnɔ inyaa, ma ajukonek liil kotodode kook many. ⁷ Izi nojja wole zin ole o anyek ol kabaca oñe. ɲedet kaal ci gerze acinanuñ igeet noko avunak looc nico tup. Bar zin izi nojja wole eete ci laadun anyaa kaal nicoko o. ⁸ Mā anyin aziiti karabonɲ een zɔɔci baca baciinok, abon ateeda, ma ajukei tuu. Abon bar ako rogete o abil been neen ɲaati eene ɲool karabonɲ adowinin aziiti kujuk ɲaati ajukoneke goo o Loryento abil been neen ɲaati anyaye zɔɔ ki azeen dook. ⁹ Mā anyin kebereci baca baciinok, abon akana, ma ajukei tuu. Abon ɲaati akoye rogeta keberece codoi kujuk ɲaati ajukoneke goo Loryento abil been neen ɲaati anyaye kebere dook.

^{10–11} Egenyit zin juruñ ka calaɲ apezu dolene ci miliny noko codoi ɲaatineej. Didile kaduwakuñ igeet, ma toonnyawa ugeec abek nɔɔgo gɔɔn avo Joowa tup, ma aduwak nɔɔnɔ kaal o agooneku niiga dol ci miliny noko.”

Aduwa Yesu yabziin ci eez ci akoloni

¹² Ma ajin Yesu nɔɔgo anek ne, “Inoko mā anyak eeti eeza ceen eet tur, ma akoloni codoi ɲaatineej, abaabanu agɔɔn koca niini naa? Bar kane ooñnek rak koca eeza ceen eet wec kamoto ki tiin torkoc o looc, ma ako arooj eez codoi ona akoloni o zee ma ajowa. ¹³ Didile kaduwakuñ igeet, ako zee mazi ajowa niini eez nico, atalne ɲaatin ɔɔɔt ele kujuk talniin o anyak eezaye o ɲaan kukuluze e. ¹⁴ Mazin buk gole nico baatunooj o aavi tammu tadena alaɲ arooj dole codoi dolene ci miliny noko kokoloze.

Gotonu ci abaca zɔɔz ɲaatun

¹⁵ Mā agoonekin gotonu gi ci ger, bitɔ ɲaatin ka bitɔ boɔrak nɔɔnɔ gi nico. Abon zin aminyu niiga doon. Mā aziñnin niini ineet, idicai gi nici, izi niini gotonu bodo. ¹⁶ Bar mā alaɲ aziñnin niini ineet, biti eet codoi karabonɲ een ol ram orkorit ki ineet, ka kɔɔt kiziiyit zozok ci abornekin niini ineet o eo aduwan warage o Joowo. ¹⁷ Bar mā alaɲ buk azii niini nɔɔgo, bitɔ duwak ol o ceez o Joowo zɔɔz nico. Mazi alaɲ azii niini ol o Joowo buk, abon adeyanu niiga dook ɲaatin.

Anyek Yesu nuyak doyiz

¹⁸ Didile kaduwakuñ igeet dook, ma gi ci azoozu, ma abornu niiga loota ɲina, aborne buk tammu tadena. Maje gi ci azoozu, ma agamanu niiga loota ɲina, agamnyai buk tammu tadena.

Ɗaryiin ɲaatodoi

¹⁹ Mā arom ɔl raman ɲaatunooɲ eleeeti, ma ajin Jook gi ci arɔɔɲ niigi nɔɔnɔ kutuguwek, agoonek koca baaba tammu tadena nɔɔɔ gi nico. ²⁰ Eeci mā alote ɔl raman karabɔɲ een iiyon zaare ogan, karomena buk naana ki nɔɔɔɔ.”

Yabziin ci eet calaɲ ooɲnek ɔnɔɔgi ɲabolo

²¹ Iiyak ni Pitɔr Yesu, ma aku ajin nɔɔnɔ anek ne, “Manyi, inoko mā agoonekan ɔtɔna gi ci ger, kotoɲ nɔɔnɔ lak izɔk? Kotoɲ lak torgerem?”

²² Ma abedeke Yesu nɔɔnɔ anek ne, “Akɔm! Alaɲ een lak torgerem nɔkɔ, bar toɲ nɔɔnɔ lak eet iyyu kamɔtɔ lak torgerem. ²³ Eeci baliin o Joowo abil kete. Anyak baale alaan ci arɔɔɲ kekeep ɲabolet baal ɔɔn da anyek niini ɔl ogin alinɲinonek nɔɔnɔ e iziti izɔk. ²⁴ Mazi akana ka kekeep, anyaaktak ɔl nɔɔnɔ eet ci anyak ɲabolo ci guruc ci meel ger ci atobɔ ki guruc ci kataalane tiin eet tur lak amɔtɔ. ²⁵ Maje eeti nici alaɲ anyak guruc ci meel ka kurui ɲabolo nico. Ma aricanek alaani ɔl ka kɔɔt kataalɔi nɔɔnɔ ki ɲaa onin ki dɔl ogin ki kaal ogin anyak dook ka kurui ɲabolo nico. ²⁶ Mazi akɔ azii eeti nici zɔɔz nico, iyya akati kozoɲti looc alaan onin ɲuma, ma azi ne, “Anyek da kalalin ziniz ɲaatan zee ma karuwekin kaal cugun o dook kidicilim labak.”

²⁷ Uwucek ni alaan zɔɔz nici, makacin otoɲek didi niini nɔɔnɔ ɲabolo nico, ma anyek nɔɔnɔ kɔɔtɔ.

²⁸ Mazi adun eeti nici, ook urumtɔ ki ɔnɔ oma ci anyayek nɔɔnɔ ɲabolo ci miliny ter. Ma agam nɔɔnɔ, ma adaal alem anek ne, “Nyan guruc ogan baal anyei e.”

²⁹ Ma akani eeti nici kozoɲti looc nɔɔnɔ ɲuma, ma anek ne, “Anyek da kalalin ziniz ɲaatan zee ma karuwekin guruc cugun o labak.” ³⁰ Bar niini alaɲ arɔɔɲ kiziik zɔɔz nico been neen. Ma bar anyek nɔɔnɔ kook sijina ka kook kacabe zee ma aruk ɲabolo nico.

³¹ Mazi akɔ acin ɔl ogene ci alinɲin ki nɔɔnɔ ɲaatodoi gi nico, otoborit niigi nɔɲ ɔɔɔt, ma avɔ aduwak alaan gi ci agɔɔn niini noko. ³² Ma awa alaani nɔɔnɔ ma aku anek ne, “Een eet ci ger ɔɔɔt. Iiten baale kuɲnekin naana ineet ɲabolo baal appe e, eeci arooɲnyan aneet kutuɲeyin. ³³ Abon waan zin buk awunekin gotonu nici kiyo baale awucnekan niina aneet e.” ³⁴ Enico otobor alaani nɔɲ arɔɔt, ma itoonek nɔɔnɔ sijin ka kook kipirtai ɔl nɔɔnɔ sijina zee ma aruk guruc baalke dook.”

³⁵ Ma anek Yesu nɔɔɔɔ ne, “Mā alaɲ ooɲneku gotonogu kaal o abaca niigi ɲaatunooɲ zinzeetine ugooc dook, koca buk baaba o aavi tammu tadena alaɲ ooɲnekuɲ igeet kaal o abacanu.”

Ɗerɔn ci ɲaaɔ kibeen eet

19 ¹ Mazi adica Yesu zoɔzok nicoko, itiɲa Galiliya ook abaawozek looc o kazi Judiya liil o kazi Jordan baagita. ² Ma ano ɔl ci meel ger nɔɔnɔ, ma akɔ arogɔz niini nɔɔɔ moorizowe ɲinaante. ³ Ma avunak ɔl o Parici nɔɔnɔ arɔɔɲ kicinta nɔɔnɔ ɲaati ajini aneki ne, “Mayo ɔɔn lotinowa ogaac aziɲneek eet kɔtɔk ɲaa cin giye ci ɔɔ cin doon labak?”

⁴ Ma abedeke Yesu nɔɔɔɔ anek ne, “Ɗaan da niiga ekeebit warage o Joowo reen o azi ne, Baale kinatamma laadun e eɲnya Jooi eet ci mac ki ɲaa. ⁵ Ma azi Jooi ne, Gi o zin ɔɔn ooɲni eeti baatin ki yaatin, ma akɔ aromen niini ki ɲaa cin o neen nici ka kiziti niigi dook ramantiya ele codoi. ⁶ Alaɲaan zin bodo niigi eegin ram, bar iziti ele codoi. Akom zin bodo eet ci ka keɲer gi ci orom Jooi o.”

⁷ Ma ajin ɔl o Parici nɔɔnɔ anek ne, “Mazin da baale Mosis azi ne, Mā arɔɔɲ kɔtɔk eeti ɲaa cin, abon labak, olla anycek keteyeedak niini nɔɔnɔ warage ci ɲeronto o naa?”

⁸ Ma abedeke Yesu nɔɔɔɔ anek ne, “Anyuɲ lotinowa o Mosis ɔl ci atooku ɲaai labak o, eeci igeet adɔi zinzeeti kak. Maje baale laadun kinatamma e laadun alaɲ abil nɔkɔ. ⁹ Inoko zin kanekuɲ ne, Mā eeti ci atɔk ɲaa cin ɲaati alaɲ agami zoocmaza, ma akɔ arɔɔa niini ɲaa oma bodo, odoma niini zoocmaz.”

¹⁰ Ma vurta ivitak nuyawa Yesu, ma avu anek ne, “Mā een ɔl ci akati ɲaa kibeen eet neen nici, maya bar alaɲ karɔce dook.”

¹¹ Ma abedeke Yesu nɔɔɔɔ anek ne, “Ma ɔl calaɲ karocin o alaɲ akati ɔl dook, bar akati ɔl o anyek Jooi nɔɔɔɔ dɔyɔz ci aavtiye calaɲ arocin doon. ¹² Eeci anyak kaal oogi ci anyek ɔl calaɲ arɔce. Ɔl ogen alaɲ arɔce o, eeci aritai gole nico nɔkɔ laadun. Ɔl ogen alaɲ arɔce o, eeci anyek ɔl ogene nɔɔɔɔ calaɲ arɔce. Ɔl ogen alaɲ arɔce, eeci arɔɔɲ kilinɲinɲit ɔl ci akati baliin o Joowo. Ma eeti ci agama ɔl calaɲ karocin o, anycek nɔɔnɔ kagama didi.”

Amayuk Yesu dɔl ci miliny

¹³ Ma anyaaɔ ɔl ogine Yesu dɔl ci miliny ka kiiya kataadek niini nɔɔɔ azeeen kamayuk ma ajinek nɔɔɔ Jook. Maje bar nuyawa ogine agerɲyek ɔl nicoko ka calaɲ anyaaɔ dɔl Yesu.

¹⁴ Ma anek Yesu nɔɔɔɔ ne, “Anycek dɔl kivitayan aneet. Má alamnyu nɔɔɔɔ, eeci baliin o Joowo abilnek ɔl o anyek eleeeti keelit kiyo dɔɲya ci miliny noko.” ¹⁵ Amayuk ni niini nɔɔɔ zee ɔtɔɔ ni niini.

Abon ano ɔl Yesu zinzeetine dook

¹⁶ Ma akunak eeti ci ɲaan een mɔldɔɲ Yesu, ma aku ajin nɔɔnɔ anek ne, “Alaan o demziinto, mayo gitaz ci abon kagoon ka kojowa roget o abil been neen?”

¹⁷ Ma abedeke Yesu nɔɔnɔ anek ne, “Akɔ ma ajinan gi ci abon ka tugu o naa? Akom zin gi oma ci abon, bar abon Jooi doon. Mazi arooɲ roget o abil been neen, zooti lotinok.”

¹⁸ Ma abedeke eeti nici Yesu anek ne, “Lotinok jaɲ?”

Abedeke Yesu nɔɔnɔ anek ne, “Má amuny eet ci deer. Má adoma zoocmaz. Má agɔrze. Má avolonɲ. ¹⁹ Tɔɲɔle baatun ki yaatun. Zin ricik ɔɔɔt reez ɔl o abaawonu kiyo areez ele unun o.”

²⁰ Ma abedeke eeti nici Yesu anek ne, “Lotinok nicoko dook kazoone baale laadun. Gi jaɲ zin inoko ci arooɲnyan bodo kutugu?”

²¹ Ma anek Yesu nɔɔnɔ ne, “Mā arooɲ ka bona ɲume o Joowo, bitɔ taalɔi kaal ugun dook zee ɲerek guruc ɔl o amaati. Mazi odot, ija niina alya nowan aneet. Ɗaan akɔ ajowa arɔkzet tammu tadena.”

²² Mazi azii eeti nici zɔɔz nico, alaca ele, ma awɔ bornet nɔɲa, eeci een niini aroi ɔɔɔt.

²³ Enek ni Yesu nuyak ogin ne, “Didile kaduwakuɲ igeet, adɔi ɔɔɔt ele eete ceen aroi ɲaati akɔyi baliinte o Joowo. ²⁴ Inoko bodo kabedeke zɔɔz nico kanekuɲ ne, “Adɔi ɔɔɔt ele eete ceen aroi ɲaati akɔyi baliinte o Joowo kiyo alaɲ ayizonek nyakale nyibira ɲino vɔlɔɲ o.”

²⁵ Mazi azii nuyawa zɔɔz nico, ibiirrit nɔɔgɔ dook ooti tet giye nico, ma ano ne, “Ka dim zin katin korogozɛ ɲene?”

²⁶ Egelem ni Yesu nɔɔgɔ, ma anek ne, “Ma zɔɔz nici adoi eete ci deer doon, maje Joowa akɔm gi ci adoi.”

²⁷ Ma abedeke Pitɔr nɔɔnɔ anek ne, “Inoko kotonɲeya naaga kaal ogaacak dook looc, ma kivita kunuyin ineet o, mayo katin kajowana naa?”

²⁸ Ma anek Yesu nɔɔgɔ ne, “Didile kaduwakuɲ igeet, katin waanci kagame naana ɲeerti Eeto alaazet onan tammu tadena, niiga ci anuyɲ aneet eeginu amɔtɔ ram noko avɔ buk niiga aavtiyu lecerene cugooc een amɔtɔ ram ka apayit boryok o Israyil een amɔtɔ ram. ²⁹ Ma eeti ci oon kɔrɔk onin, ki gɔtɔnɔgi, ki ɲɔɔnɔgi, karabɔɲ een yaatin, ki baatin, ki dɔl cigin, ki mana cin ɲaaten aneet, azaaconek bodo katin nɔɔnɔ kaal ci meel, ma ajowa buk niini roget o abil been neen. ³⁰ Zin ɔl ci meel ole o inoko abaaban bar kizik oontane niigi gole o Joowo, katin eegin vurut. Maje ɔl ci meel ole o inoko abaaban kizik niigi eegin vurut gole o Joowo bar, katin oontane niigi.”

Yabziin ci akati ɔl ci liɲliɲonto

20 ¹ Ma anek Yesu bodo nɔɔgɔ ne, “Ma baliin o tammu tadenu abil kete. Anyak baale eet ci mano alɔk ririwɔna ka kook kataala ɔl ci avu ateet mana. ² Mazi akɔ ajowa nɔɔgɔ, zɔɔzɔtɔ ki nɔɔgɔ zee ma agama ka kanyek niini nɔɔgɔ eet codoi gɔɔn ɲaatineɲ gurucoc codoi liɲliɲone ci iiten dook. Itoonek ni niini nɔɔgɔ mana kɔɔt kiliɲliɲit. ³ Ma ziiye ween tɔrkɔc ɔtɔɔ bodo ook ɔrɔɲ ɔl oogi melegenya. Ma akɔ ajowa ɲinaante ɔl ci olla eel aɲaam, akɔm gi ci alinliɲ kina. ⁴ Enek ni niini nɔɔgɔ ne, “Karooɲnyuɲ ɔtɔɔ ilinliɲteyaɲ mana. ɲaan tedec karuwekuɲ igeet dook guruc ci agano ki liɲliɲon.” ⁵ Agamta ni niigi gi nico, ma avɔ mana, ma waaz ziiye ween amɔtɔ ram been ziik ween iyyu yomana ook anyaa niini ɔl oogi ka kivita kiliɲliɲit mana. ⁶ Ma ziiye ween tur yomana ook melegenya bodo, ma akɔ ajowa ɔl oogi eel ɲinaante olla aɲaam, akɔm gi ci alinliɲ kina. Ma anek nɔɔgɔ ne, “Ma dim aavtiyu ɲina adicanu iiten dook o agoonu naa?”

⁷ Ma abedeke niigi nɔɔnɔ anek ne, “Kaavtiya ɲina o, eeci akɔm eet ci aku akɔyɛt ka koota kiliɲliɲtozeyaya.”

Enek ni niini nɔɔgɔ ne, “Ivita ɔtɔ ilinliɲit mane onan.”

⁸ Ma yomana enek eeti o mano eet o gɔɔn abek ɔl keevinta ne, “Izi yoman. Odot liɲliɲoni. Towa ɔl ka kivita kagamit guruc. Kata ole ona akana liɲliɲon vurtɔ e zee been tir ole ona arayai e.”

⁹ Ivita ni ɔl ona akana liɲliɲon ziiye ween tur yomana e, ma anyek ɔl nɔɔgɔ dook eet codoi gɔɔn ɲaatineɲ gurucoc codoi. ¹⁰ Mazi avu ɔl ona akana liɲliɲon ɔɔwa e ka kagamit guruc, anycek buk ɔl nɔɔgɔ gɔɔn eet codoi ɲaatineɲ gurucoc codoi. Maje bar uyen niigi abaaban kizik tedec anyonek nɔɔgɔ guruca ci meel kujuk ɔl ona avu liɲliɲon vurtɔ e. ¹¹ Ma vurtɔ mazi agamit guruc odot, ɔtɔ oyoyit eet o mano e. ¹² Anek niigi nɔɔnɔ ne, “ɔl ci ona avu akana liɲliɲon vurtɔ o alinliɲ niigi ziit codoi tɔr nɔkɔ. Maje naaga kaliɲliɲnya uyene iiten dook kore ci abur pɛr. Alaɲ abon zin ɲaati waan katobona naaga kibeɲ nɔɔgɔ guruci.” ¹³ Ma abarzek eeti ci mano noko eet codoi ɲaatineɲ anek ne, “Ziik di, gɔtɔn. Alaɲ kadakuɲ looc nɔkɔ been neen. Uyene agamtawu liɲliɲon ka ilinliɲit gurucoc codoi iiten dook. ¹⁴ Inoko odomta guruc cugooc o, ɔtɔ ɔl. Ma naana kanyi ɔl ci ona avunak liɲliɲon vurtɔ o guruc ci atobɔ ki ci ona kanyuɲ igeet o labak. ¹⁵ Mā anyak gi ci karooɲ kutugu guruce cigan o, kagoon labak. Yo da amadiku ɔl ci ona avu vurtɔ o, eeci kiirkei nɔɔgɔ guruc?”

¹⁶ Izi ni Yesu ne, “Tiɲeere ɔl o inoko een vurut, oontane niigi ɔɔwa. Maje bar ɔl o inoko een ɔɔ, amiiri kizi vurut.”

Aduwak bodo Yesu nuyak daayiz onin

¹⁷ Mazi avɔ Yesu ki nuyak ogin Jerusalema, ook uduwak niini nɔɔgɔ doon gɔla gi ci anek ne, ¹⁸ “Inoko kavɔ Jerusalema ɲaao ka kook kanyozozeke naana ɲeerti Eeto alaata o ceez o Joowo kibeɲ ɔl o demziinto. Ma avɔ apayekan tiɲeere niigi aneet daayiz.

¹⁹ Avoyan zin tiɲeere niigi alaata o Rom ka kɔɔt komomoztan niigi aneet, ma arukan, ma avɔ adodoyan keete ween talakec. Zin iinyaye ceen iyyu, kiɲaaz bodo daayiza.”

Ajin ɲaa ci eet ci kazi Zebedi Yesu

²⁰ Iiyak ni ɲaa ci eet ci kazi Zebedi kibeɲ lɔgɔz cigin een ram kazi zaar cigeec ne Jemis ki Jɔn Yesu, ma aku akani kozoɲti looc Yesu ɲuma, ma anek ne, “Anyak da gi ci karooɲ tuguweyan.”

²¹ Ma abedeke Yesu nɔɔnɔ anek ne, “Arooɲ gitaz?”

Ma anek niini Yesu ne, “Karooɲ katin waanci eene alaan, anyek lɔgɔz cigan noko keɲerteyin ineet kɔrgen kiziti buk niigi alaata.”

²² Ma abedeke Yesu nɔɔgɔ anek ne, “Alaɲ niiga gi ci ajinaɲu noko agayu juruɲ. Inoko tiɲeere piryakzet ci kakɔ kapirnanɛ neke niiga animnyu?”

Ma agama niigi dook azi ne, “Ii, kanimnya labak.”

²³ Ma abedeke Yesu nɔɔgɔ anek ne, “ɲedet didi tiɲeere apirnanu kiyo naana o. Bar zin inoko o akɔmnan aneet alaazet ci ka kanyuɲ igeet eɲerteyɲ katin gɔɔn kɔrgen. Aɲera ɔl ci ka kaavtiyo vitenane nicoko o baaba doon.”

²⁴ Mazi avɔ azii nuyawa ween amɔtɔ e gi nico, otobortek niigi lɔgɔz ceen gɔtɔn een ram noko nɔɲ. ²⁵ Ma awa Yesu nɔɔgɔ dook ɲaatodoi, ma aku anek ne, “Agayu niiga gɔɔn alaata o loocu ɲina anyak dɔyiz ole ugeec ci abali nɔɔgɔ. ²⁶ Bar zin niiga alaɲ abon ɲaati eelnu kiyo niigi o. Mā anyak ɲaatunooɲ eet ci arɔɲ dikirzet, abon rak bar alinliɲonek niini gɔnɔgi kiyo gabarenti o. ²⁷ Buk mā arɔɲ eeti ɲaatunooɲ kootonai kizi ɔɔ, abon rak anyek eɛ kizi gabaren. ²⁸ Utuguz niiga kiyo buk naana ɲeerti Eeto o. Alaɲ kakun ka kiiya kiliɲliɲtozeyan ɔl aneet, bar kakun ka kiiya kiliɲliɲozek naana ɔl, ma kadaai ka korogoz ɔl ci meel.”

Arogoz Yesu ɔl ci ruben een ram

²⁹ Mazi iɲaaz Yesu kibeɲ nuyak ogin Jerikowa, oneec nɔɔgɔ kɔle ci meelik ger. ³⁰ Maje ɔl ci ruben een ram aavtiz gɔla, iziiyit Yesu aku anowa gɔl nico. Egerenyit ni niigi dook ramantiya azi ne, “ɲeerti Devid, tiritet da!”

³¹ Maje ɔl ceen kɔle ɔrkɔr ki Yesu noko agernyek nɔɔgɔ kajaktɔ. Bar enico egerenyit niigi ɔrɔt eɛ kujuk we azi ne, “ɲeerti Devid, tiritet da!”

³² Enico ibil Yesu, ma awa nɔɔgɔ, ma aku anek ne, “Arooɲnyɲ kutuguweyuɲ naa?”

³³ Ma abedeke niigi nɔɔnɔ anek ne, “Manyi, karooɲnyin kolet kebere kicintowa.” ³⁴ Uwucek ni Yesu gi nici, ma uum nɔɔgɔ kebere. Enico eɛ ɔkɔlte kebere ugeec icintɔ labak, ma ano Yesu.

Akunak Yesu Jerusalem

21 ¹Mazi avunak niigi njino kazi Bezpeja ajonzo ki Jerusalem biye o kazi Kijiroc, njinaante itoonun Yesu nuyawe ogin ram karaktere. ²Anek nwozo ne, “Doto korogjowe ci eel igeet owa neke. Avu tedec ajowanu zigir ci acabje kibeem joron njinaante. Dokta zin nwozo dook ramantiya ka anyaaktayan njina. ³Mã anyak eet ci ajinun, enektek ne, Aroonj Manyi nwozo. Anyun tedec niini igeet anyaakta labak.”

⁴Agooni gi nici noko o ka kelemnyai zoz baal aduwa nyakanjani azi ne, ⁵“Enektek ol o Jerusalem ne, Icinit di, iyyayun alaani unoonj. Acelbezen niini ele, ma awo joronte ci zigiro.”

⁶Dot ni nuyawa ceen ram noko, ma avo agoon eona aduwake Yesu e ele. ⁷Anyaahta zigir been joron, ma avu ataadek niigi rumane ugeec zigir bawuc, ma anyek Yesu kotoot. ⁸Maje kole ci meelik ger avetek rumane gol kenj. Maje ogen acarkiza bolok, ci keenu, ma avu avetek gol buk. ⁹Maje kole ci araki Yesu owa o kibeem ci awo nwon vurta o agereny azi ne, “Kidiñdjanit Ijeerti Devid! Amayuk Jooi nwon o aku zaare o Jook ona! Abil diñdjaniti njaaten Jook!”

¹⁰Mazi ako arum Yesu Jerusalem, adonnyai ol dook kutura donj. Ma ajino ano ne, “Eet jan te nici?”

¹¹Ma anek kole ci ano Yesu o nwozo ne, “Nicini Yesu ween nyakanjan o aku kuture o kazi Nazaret abil Galiliya.”

Ako Yesu ceeze o Joowo

¹²Ook ni Yesu kaluwawe o ceeze o Joowo eecito, ma ako atowa ol o goon ataaline kaal been ol o ataali dook bitaala lai. Ma uup tarabzet ci ol o abali guruc njinaante kibeem lecere ci ol o ataaline yeela. ¹³Ma anek niini nwozo ne, “Ayeedi waragewe o Joowo zoz ci ane Jooi ne, Ceez cane o ceez ci naryiinto. Maje bar niiga avu anyeku kizi njinti aroodine agoryawa.”

¹⁴Ma njinaante ivitak nwon ol ci njolik ki ci ruben, ma arogoz niini nwozo dook lai.

¹⁵Mazi ako acin alaata o ceez o Joowo kibeem ol o goon ademzek ol lotinok kaal ci atet ol biye agoon Yesu noko, otoborit niigi nonj zoz. Ma abor buk niigi nonj, eeci dol o miliny aavtiz ceeze o Joowo agereny atal Yesu azi ne, “Kidiñdjanit jeerti Devid.”

¹⁶Ma anek ol ci abor nonj noko Yesu ne, “Inoko azii gi ci aduwa niigi o?”

Ma abedeke Yesu nwozo anek ne, “Ii, kazii. Ma niiga njan ekeebit zoz nico waragewa? Azi warage o Joowo ne, Niina Jooi ademez goon dol o miliny ka katanaazin ineet jurunj.”

¹⁷Enico otow Yesu otonek nwozo looc ook kuture o kazi Bezani, ma ako onj baalin codoi njinaante.

Ator Yesu keet ceen moneec

¹⁸Ma neere ririwona iitene ci ano gon o olwa Yesu Bezaniya njaabaal onje e abadaak Jerusalem. Ma gola adawun nwon magiz. ¹⁹Ma acin keet ceen moneec gol kabanyca, ma anyaanonek azi ne, Coma abiir. Mazi ako acin, bar akom kebere kina, olla anyak bolok doon. Enek ni niini keet nico ne, “Alanj bai bodo katin niina abiir noko been neen.” Enico ele araabjai keet nici kodok kak.

²⁰Mazi acin nuyawa gi nico, ibiirit nwozo ooti, ma ano ne, “Araabjai yo keet nici taman noko ku?”

²¹Ma abedeke Yesu nwozo anek ne, “Didile kaduwakun igeet, ma atuwenu niiga kokom gi oma ci abakbayanun zinzeeti, animnyu koca buk utuguz gi ci abil kiyo ci kagoonei naana keet nico noko. Alanj zin buk bar een gi nico doon, bar animnyu buk koca enektek be nico ne, Piya ele njina. Bito jukozeke liil, ma aziñnu koca niini igeet. ²²Mã atuwenu, anyun koca goon Jooi kaal o ajinu njaatin dook.”

Ajin ol Yesu zoz ci akati alaazet cin o

²³Abadaak ni Yesu ceez o Joowo, ma aku ademez ol. Mazi njan ademze noko, ivitak nwon alaata o ceez o Joowo ki ol o Juz adikir, ma avu ajin niigi nwon anek ne, “Ma dim alaazet ci agoone kaal nicoko o anyin ineet ne?”

²⁴Ma abedeke Yesu nwozo anek ne, “Karooñ buk kijinun naana igeet gi codoi tor noko ce. Mã aduwakanj, kaduwakun buk koca naana igeet alaazet can kagoone kaal nicoko o. ²⁵Baale Jon o oony ol ajowa alaazet baal oonyi ol e ola yo Joowa da?”

Mazi ajin Yesu nwozo noko, adant niigi maany izito ne, “Kayo kenektek ne? Mã inoko kanek ne, Ajowa Joowa, aneket koca ne, Alanj zin da baale atuyu Jon naa? ²⁶Bar mã kanek ne, Ajowa eete ci deer, aborneket koca ol nici dook nonj, eeci baale atu niigi Jon anyek kizi nyakanjan.”

²⁷Ebedeke ni niigi Yesu enektek ne, “Alanj kagaya.”

Ma anek Yesu nwozo ne, “Alanj zin buk kaduwakun igeet eet ci anyan alaazet ci kagoone kaal nicoko o.”

Yabziin ci logoz ceen ram

²⁸Abaabanit di gi ce. Anyak baale eet ci anyak logoz ram. Ook ni eeti logote cin een abuu o, ma ako anek ne, “Bito liñlij mana waanico.”

²⁹Abedeke niini baatin anek ne, “Kajura,” bar bodo njintimiliny noko itinja ook mana eona aduwaki baatine nwon e.

³⁰Ook ni bodo baatine logote ween tutur, ma ako anek buk nwon ne, “Bito liñlij waanico mana.”

Ma agama azi ne, “Yonj, njan kak,” bar vurta aavu alajaan ako mana been neen.”

³¹Ma anek Yesu nwozo ne, “Inoko logoze ceen ram noko jan ci iziik gi o aduwak baatine nwon?”

Ma abedeke niigi nwon anek ne, “Iziik baatin logoti ween abuu e.”

Enek ni Yesu nwozo ne, “Didile kaduwakun igeet, avo tijeere ol o goon alot meeri kibeem njan ween waananyak baliinte o Joowo, maje bar niiga alanj avoyu. ³²Eeci baale iyyayun Jon o oonyi igeet ka kiiya keyeleyun gol o abon ka waan oneec, ma bar alanj aziñnu niiga nwon. Maje bar waanice ol o goon alot meeri ki njan ween waananyak iziyyit niigi zoz onin. Mayo nuun icintu niiga gi nice e, alanj aroonnyu otoweec ooti ugooc ka utuweec nwon been neen.”

Yabziin ci ol ci aliñlij mana

³³Ma anek Yesu nwozo ne, “Iziyyit di bodo yabziin oma ce. Anyak baale eet oma ci adok mana ci keenu, ma alok jurunj, ma agoona njinti ka goon kocoortek ol nyaantane, ma eenyca vaaco ci beyiinto. Mazi ako adotiz, ook anyaa ol ci ka goon kilinlijit mana. Otow ni niini. ³⁴Mazi ako ajon iitene o teedinto, itoona niini gabara ogin kot ole o aliñlij mana ka kot kanyaaktak nwon keem kebere cigin. ³⁵Mazi avo arum gabara nici ol o aliñlij mana, agamit niigi gabara nicoko, ma arwok codoi, ma aruk codoi

kadaak, ma avac codoi biyene. ³⁶Ma itene oman itoona bodo eeti ci mano o gabara oogi ci meel kujuk baal oowu e. Mazi avo arum niigi mana, utuguzek bodo ol ci alinjliŋ mana o nɔɔɔ gi baal rak agoonek gabara baal oowu e ele. ³⁷Ma vurtu itoonek niini nɔɔɔ ɲeerin onin ele azi ne, “Kaga naana aŋole tiŋeere niigi ɲeeran.” ³⁸Mazi bar avo acin ol ci alinjliŋ mana noko ɲeerti eet ci mano o, izito ne, “Ŋeerti eet o mano neen nici. Ivita kuruyit kadaak ka kula kaalyan cigin o dook kizi cigaac.” ³⁹Agamit ni niigi nɔɔɔ ooti mana bawuca, ma avo aruk kadaak.”

⁴⁰Ijin ni Yesu ol o aziirar nɔɔɔ e enek ne, “Mazi yo inoko ma ako aku eeti ci mano o, agoonek ol nicoko naa?”

⁴¹Ma abedeke niigi Yesu anek ne, “Aku koca aruk ol ci ger noko kadaayito, ma anyek mana ol ci abon kilinjliŋit ka goon keŋerit ki nɔɔɔ kaal ci abiirna mana o juruŋ.”

⁴²Ma ajin Yesu nɔɔɔ anek ne, “Ŋaan ekeebit zɔɔz o warage o Joowo azi ne, Ma be o abor ol o goon eenyet ceezi biyene, ma apez kizi gi ci labak, bar be o titiny ɔɔɔt kujuk biyen o enyeciinto dook neen. Ma gi nico agoon Jooi niini alya kizi titiny ɔɔɔt ele.”

⁴³Zin kaduwakuŋ igeet, abuluzu katin niiga baliin o Joowo, ma bar ako anyonek ol oogi ci atuwe, ma alinjliŋ juruŋ eeci abornaŋ niiga aneet. ⁴⁴Ma eeti ci adir be nici, aduuli yivyiv. Ma eeti ci iinak be nici nɔɔɔ, uurti kututut.”

⁴⁵Mazi azii alaata o ceez o Joowo kibeen ol o Parici zoosok ci aduwa Yesu yabziinta noko, agaac niigi ariik niini nɔɔɔ.

⁴⁶Oroonjit ni niigi goɔl ci ka kagamti nɔɔɔ, bar olla bodo otoŋole kole ci arome kibeen Yesu o, eeci anyek niigi Yesu kizi nyakanan.

Zɔɔz ci ayabzonek tiŋkawiin

22 ¹Ma uduwak Yesu ol zoosok yabziinta bodo anek ne, ²“Abil baliin o Joowo kete. Anyak baale alaan ci agoon dayiin ci ka kiiya kadayit ol itene ci arocin ɲeerin. ³Ma itene nice itoon gabara ogin koɔt kutuya ol baal aduwak ka kivitak tiŋkawiin e. Mazi avo aduwak gabara nɔɔɔ molok, bar ujurta niigi, alajaan arɔɔŋ kivita. ⁴Bodo aku itoon gabara oogi anek ne, “Ɔɔɔ utuya ol baal kawai tiŋkawiin e enektek ne, Odotit kaal dook. Kɔɔɔɔɔ, ma aakte kaal dook odota. Ivitak zin tiŋkawiin.” ⁵Bar ol nica alaj arek zinzeeti zɔɔz nico. Bar codoi ɲaatineeŋ ako keevin mane cin. Maje oman ako ataaline kaal cigin melegenyai. ⁶Maje ogen agam gabara ci ona itoonnyai o, ma aruk kadaayito. ⁷Otoɔɔ ni alaani nɔŋ giye nico ɔɔɔt ele. Ma itoon takirnya ogin koɔt kuruyit ol ci ona aruk gabara nicoko o kadaayito, ma atooz kutur dook lai.

⁸Ma vurtu otowa gabara ogin bodo, ma aku anek ne, “Inoko kaal o tiŋkawiinto dook odotita, bar zin ol baal kawa e alajaan agano ka kivita ka kadaktɔ. ⁹Inoko zin ɔɔɔ utuya ol ci olla ajowanu awo golowe kivita kadaktɔ.” ¹⁰Itiŋgazɔ ni gabara ɔɔɔ uluta ol o ger kibeen ol o abon buk zee ma abitiz ceez tɔc.

¹¹Mazi aku alaani ka kiiya kicin kernok, bar acin eet codoi ɲaatineeŋ calaŋ anyak rumane ci tiŋkawiinto. ¹²Ma ajin niini nɔɔɔ anek ne, “Laŋo, mā alaj anyei rumane o tiŋkawiinto o, akun zin te ɲina ku?” Bar akom eeti nici gi ci abarzek nɔɔɔ kina. ¹³Enek ni alaani gabara ogin ne, “Agamit eet nico acabit zɔɔ ki azeen ɔɔɔ ujuktek bitaalin. Alu tedec ɲinaante zee ma adak nyigit.”

¹⁴Izi ni Yesu ne, “Abil zin buk baliin o Joowo noko. Inoko otoyai ol ci meel ger, bar zin avu ɲaatineeŋ ci miliny ter.”

Acina ol o Parici Yesu zooze ci akati meeri

¹⁵Ɔɔɔɔ ni ol o Parici, ma avo abaabanit goɔl ci ka kicintai Yesu jinenta. ¹⁶Ma avo itoonak niigi nɔɔɔ nuyak ugeec kibeen ol o alaan o kazi Erod. Ivita ni ijinit niigi nɔɔɔ anek ne, “Alaan o demziinto, kagaya aduwa goon niina zoosok ceen didi. Ma ademzei ol zɔɔz ween didi o arɔɔŋ Jooi eet ci deer kutugu juruŋ kɔkɔm gi ci aŋole niina ola. ¹⁷Duwayet zin di. Inoko ɲaatun agano ɲaati karuweke meeri alaan o Rom, yo akom da?”

¹⁸Maje Yesu aga keŋ ci jinen cineeŋ ger o noko, ma anek niini nɔɔɔ ne, “Igeet labjok koko! Aroonnyu icintawaŋ naa?”

¹⁹Eyeleyaŋ di gurucoc ci ka ɔɔt urukti meeri o.”

Anyaaktak ni niigi gurucoc. ²⁰Ma ajin niini nɔɔɔ anek ne, “Ma zaara ci ayeedi gurucoca ce ki ririton co ci ɲene?”

²¹Ma abedeke niigi Yesu anek ne, “Ŋum o alaan o kazi Sizar ki zaar ogin.”

Ma anek Yesu nɔɔɔ ne, “Uruktek zin Sizar kaal o akati nɔɔɔ, maje Jook uruktek kaal ogin.”

²²Mazi azii niigi gi ci aduwa Yesu noko, olla apaŋante paŋ, ma ooŋnek nɔɔɔ looc, ma awo.

Acina ol o Sajuzi Yesu zooze ci akati ɲaazi daayiza

²³Ma itene nice ele ivitak ol o kazi Sajuzi Yesu. Maje goon niigi alaj agama zɔɔz o bodo katin iŋaani ol daayiza. ²⁴Ivita ni enektek niigi Yesu ne, “Alaan o demziinto, azi baale Mosis ne, Mā adaai eeti iŋaan kitira dɔl ɲaawe cin, abon arigiz goɔɔnnya ɲaa ka kitirak nɔɔɔ dɔl. ²⁵Anyak zin baale logɔz ceen goɔɔn een torgerem abaak ɲina. Ɔɔɔɔ ni logoti ceen abuu o, ma adaai iŋaan kanyak ɲaa dɔl. Iiya ni goɔɔnnya o anowa nɔɔɔ anyawun ɲaa. ²⁶Ma bodo ɲintimiliny noko adaawun buk logoti nici iŋaan kitirak ɲaa nico dɔl. Ma azɔɔɔn niigi ɲaa noko zee makacin adaayito niigi dook iŋaan kitirtak ɲaa dɔl. ²⁷Ma vurtu adaak buk ɲaa. ²⁸Inoko zin tiŋeere mā iŋaaz ol daayiza, ɲaa nicini akati ɲeneen giye baal anyakti niigi dook ɲaa nico?”

²⁹Ma abedeke Yesu nɔɔɔ anek ne, “Abacu niiga zɔɔz nico ɔɔɔt, eeci alaj areku niiga zinzeeti warage o Joowo ki doyiz onin.

³⁰Katin ma iŋaaz ol daayiza, eel niigi kiyo toonnyawa o Joowo o. Ma alaj bodo eeta ki ɲaai arɔɔɔ. ³¹Mazin giye ci akati ɲaazi daayiza, ɲaan niiga ekeebit zɔɔz baal aduwakuŋ Jooi e? ³²Azi baale niini ne, Keen Jook o Ibrayim ki Aizak been Jakob. Ma zɔɔz nici ayelza gi o inoko arogni Ibrayim ki Aizak been Jakob. Zin Jooi niini Jook ci ol ci arogi, alaj een Jook ci ol ci adaai.”

³³Mazi azii kole gi nico, ibiirit nɔɔɔ ooti ɔɔɔt ele.

Lotinet o titiny

³⁴Mazi avo azii ol o Parici eteza Yesu ol o Sajuzi, ivitak niigi dook nɔɔɔ. ³⁵Icina ni eeti codoi ole o goon ademzek ol lotinok Yesu jinenta. ³⁶Ma aku ajin niini Yesu anek ne, “Alaan o demziinto, mayo lotinet paŋ ci titiny ɔɔɔt kujuk goɔɔgi dook.”

³⁷Ma abedeke Yesu nɔɔɔ anek ne, “Lotinet o azi ne, Abon areez Jook ween Manyi unun zinize unun dook, ki rogete unun dook, been baabaninte unun dook. ³⁸Lotinet zin ci titiny ɔɔɔt neen nici. ³⁹Bodo lotinet oma ci titiny neen o azi ne, Reez ol o abaawonu kiyo areez ele unun maany o. ⁴⁰Ma lotinowa o Mosis been demziin o nyakananetu ano niigi dook lotinok ceen ram noko doon.”

Ajin Yesu ol o Parici zɔɔz ci akati Kiristo

⁴¹Mazi ɲaan alote ol o Parici noko, ijin Yesu nɔɔɔ anek ne, ⁴²“Abaabanu dim inoko niiga aziyu ne, Kiristo ɲene? Niini ɲeerti ɲene?”

Ma abedeke niigi Yesu anek ne, “Kiristo niini dole ci dól o Devid.”

⁴³ Ma anek niini nɔɔɔ ne, “Mazi een Kiristo dole ci dól ci Devid, anyek zin baale Vɔɔɔzi o Joowo Devid kotowo nɔɔɔ kizi Manyi cin naa? ⁴⁴ Azi baale Devid ne, Anek Jooi Manyi onan Kiristo ne, Aavu libire can azo o zee ma kanyin rocek modo ugun amarninin ineet looc zɔɔɔe.

⁴⁵ Mazi awo Devid Kiristo kizi Manyi o, alaɲ agano ɲaati eene dole ci dól ci Devid doon, bar aku niini Joowa.”

⁴⁶ Mazi azi Yesu nɔkɔ, ajaktɔ niigi dook tiv, kɔkɔm gi ci abariz. Zin iitene nice ɔkɔma bodo eet ci anim kijin nɔɔɔ been neen.

Ilot Yesu ɔl ka calaɲ adɔɲ eleeti

23 ¹ Enek ni Yesu kɔle ki nuyak ogin ne, ² “ɔl o demziinto kibeen ɔl o Parici irigizit niigi zɔɔ o Mosis ka koobtek ɔl lotinok. ³ Abon zin aziɲnu niiga nɔɔɔ, ma anuyu kaal o aduwakuɲ niigi igeet dook. Bar zin má agoonu kaal ci agɔɔn niigi o, eeci kaal ci agɔɔn niigi o aɲɔɔwɔ kibeen kaal o ademzek niigi ɔl. ⁴ Adaɲekuɲ gɔɔn niigi igeet utuguz kaal ci adɔi kak, maje bar niigi alya alaɲ buk ataman kuzuuti.

⁵ Agɔɔn niigi kaal dook gole ci ka keyeliztai eleeti ɔla. Aborcek gɔɔn niigi kaal ci ayeedonek zoowowa o Joowo ɲumti kibeen azeen ka kicinit ɔl. Ma buk aborcek rumane ci wuntik alina ka kiziti ɔl ne, Niigi ɔl ci Joowo. ⁶ Areez gɔɔn niigi aavuzit ci aavtiye lecerene ci abon ɲaati aloten ɔl. Ma areez buk lecere o abon ceezine o lotento. ⁷ Areez niigi buk ɲaati azaawi ɔl nɔɔɔ diɲɲaninta ɔl kɔrgena. Ma arɔɔɲ niigi kotoweec ɔl nɔɔɔ kiziti alaat ci demziinto.

⁸ Alaɲ zin agano ɲaati awuyuy ɔl igeet iziti alaat ci demziinto, eeci niiga dook eeginu gɔɔn. Ma anyaku niiga dook alaan unooɲ demziinto adɔi ɲɔr nɔkɔ. ⁹ Alaɲ zin buk abon ɲaati awoyu niiga eet ci deer loota ɲina kizi baatunooɲ, eeci anyaku niiga dook baatunooɲ o adɔi ɲɔr nɔkɔ tammu tadena. ¹⁰ Má anyeku buk kutuyuy ɔl igeet iziti alaat, eeci alaan unooɲ igeet dook neen Kiristo doon. ¹¹ Ma eeti ci titiny ɲaatunooɲ abon aliɲɲonekuɲ niini igeet kizi gabaren. ¹² Ma eeti ci gɔɔn adɔɲ ele, tiɲeere acelbezene. Maje eeti ci acelbezene ele, adɔɲnyi katin niini kidiɲɲi.”

Apayek Yesu ɔl o Parici gerzitin

^{13–14} Ma anek Yesu ɔl o Parici ne, “Izi nɔɲa wole ɲaatunooɲ igeet alaat o demziinto kibeen ɔl o Parici! Abuuku gɔɔn niiga eleeti. Unyuuku niiga gɔl o baliin o Joowo ɔl ɲuma. Ma alaɲ anyeku ɔl o arɔɔɲ kɔɔt baliinte o Joowo kɔɔt eecitɔ. Zin buk tiɲeere niiga alya alaɲ avoyu baliinte o Joowo eecitɔ been neen.

¹⁵ Izi nɔɲa wole ɲaatunooɲ igeet alaat o demziinto kibeen ɔl o Parici! Abuuku gɔɔn niiga eleeti! Abaayizu gɔɔn liilok, ma azobju loocok ka ɔɔtɔ anyek eet codoi ɲɔr nɔkɔ kono lotinok ugooc. Ma vurta bar bodo uwuyu eet nico ele kagantɔ ki goo o Loryento kiyo buk niiga o.

¹⁶ Izi nɔɲa wole ɲaatunooɲ igeet alaat ci ruben noko! Ademezu gɔɔn niiga ɔl aneku ne, Mā itoon eeti zaar o ceez o Joowo, zɔɔz cine o gi ci labak. Mazi bar itoon niini zaar o warki o eel ceeze o Joowo, zɔɔz cine o een didi. ¹⁷ Igeet aliyak ci ruben koko! Adiɲɲi yo ɔɔɔt gi jaɲ? Warkina yo ceez da o Joowo o anyek warki nicoko kililec? ¹⁸ Ademezu buk gɔɔn niiga ɔl aneku ne, Mā itoon eeti zaar ci ɲino taabinto, alaɲ zɔɔz cine o een didi. Bar mazi itoon eeti zaar ci kaal o ataabi ɔl Jook, anyeku zɔɔz cino kizi didi. ¹⁹ Eeginu zin niiga rubene ɔɔɔt! Mayo adiɲɲi ɔɔɔt gi jaɲ? Adiɲɲi kaal o kataabi Jook, yo da ɲino taabinto o anyek kaal nico kililec? ²⁰ Zin mā itoon eeti ɲino taabinto, itoon niini nɔɔɔ ki kaal o taabinto eel ɲinaante dook. ²¹ Mā itoon eeti ceez o Joowo, itoon niini nɔɔɔ ki Jook o abaak ɲinaante buk. ²² Mā itoon eeti tammu tadena, itoon niini lecer o Joowo kibeen Jook ele o aave lecere nico.

²³ Izi nɔɲa wole ɲaatunooɲ alaat o demziinto kibeen ɔl o Parici! Abuuku gɔɔn niiga eleeti! Anyeku gɔɔn niiga Jook lelen codoi lelene ween amɔtɔ, mayo nuun een tambu karabɔɲ een barabarac. Ma bar aburnu ɲaati azuunu lotinok o titiny kiyo payiin ci waan apaku zoozok keelit tɔp, ki ziniz bonat ɔla, been ziniz laliz. Abon waan zin niiga aliɲɲiɲnyu kaal ci titiny noko dook kibeen buk kaal oogɪ. ²⁴ Igeet alaat ci ruben koko! Aaranu gɔɔn niiga kironɲit iirane, maje bar nyakale akuuyu labak.

²⁵ Izi nɔɲa wole ɲaatunooɲ igeet alaat o demziinto kibeen ɔl o Parici! Abuuku gɔɔn niiga eleeti! Aricanu gɔɔn niiga gi ci uunyu kodooc ugooc bawuci juruɲ. Maje bar keɲti eecitɔ abiz kaala o aamanu ɔl dɔyiza been zinzeeti appinzete unooɲ areezu eleeti. ²⁶ Igeet ɔl ci Parici rubenik koko! Otoonyca rak ririny ci eel kodooc keɲa o dook lai, ka zin buk kitiliza kodooc bawuc.

²⁷ Izi nɔɲa wole ɲaatunooɲ igeet alaat o demziinto ki ɔl o Parici! Abuuku gɔɔn niiga eleeti! Eelnu niiga kiyo looknya o adawi ɔl miniɲ gɔɔn alina eci bitaalu doon, maje bar eecitɔ abiz ame ci ame tɔc o. ²⁸ Zin buk gole nico niiga abuuku eleeti. Alinanu bitaala doon, maje zinzeetine eecitɔ arooɲnyu utuguz kaal ci ger.

²⁹ Izi nɔɲa wole ɲaatunooɲ igeet alaat o demziinto ki ɔl o Parici! Abuuku gɔɔn niiga eleeti! Agoonu gɔɔn niiga looknya baal adawin nyakaɲaneta e kitiliza, eeci atitinyu nɔɔɔ. Ma adimanu buk looknya o adawin ɔl baal abaak baayiz o abon e kitiliza. ³⁰ Ma aniyu niiga vɔlɔɲa ne, Mā da kaavtiya naaga tɔ oowe baal jijitigaacac e, alaɲ waan karuka nyakaɲanet kadaayitɔ kiyo baale niigi e. ³¹ Zin giye nico agayu gi o eeginu niiga didi dól ci dól ci ɔl baal amony nyakaɲanet e. ³² Inoko zin ɔɔtɔ uruktɲɲ kadaak gole ci baal akata jijitugooc laadun o.

³³ Igeet dól ci kokonyawu koko! Ka dim yo tiɲeere orogit gooye o abil been neen ku? ³⁴ Inoko tiɲeere kitoonakuɲ naana igeet nyakaɲanet, ki ɔl ci genyizo, been alaat ci demziinto. Bar zin tiɲeere aruku niiga oogɪ ɲaatineɲ kadaayitɔ. Ma adodoyu oogɪ keete ween talakec. Ma arooku oogɪ ceezine o lotento. Ma atooku oogɪ kuturyowe dook. ³⁵ Zin giye nico iinakuɲ tiɲeere igeet biyeta ci ɔl abon baal amony ɔl gaga nɔkɔ e dook igeet. Akanai biyete o Abel zee been biye o Zakeriya ween ɲeerti Biraca baal amonyu ɲaao aɲerɔn ceez o Joowo been ɲino taabinto e. ³⁶ Didile kaduwakuɲ igeet, payiin ci kaal ci baal ger agooni neke dook iinakuɲ katin igeet, eeci buk niiga agoonu kaal niceke ele.”

Awucnek Yesu Jerusalem

³⁷ Ma azi Yesu ne, “Jerusalem, Jerusalem, uruwu niina nyakaɲanet kadaayitɔ, ma avacu buk ɔl o itoonakin Jooi ineet biyene kadaayitɔ. Lak ci meelee ger ci karɔɔɲe gɔɔn kanyabotai ɔl ugun kiyo gɔɔn alotek toloci jɔɔ ogin keɲ o, bar zin niina ɲaan nyan kutugu nɔkɔ. ³⁸ Inoko zin tiɲeere ceez cune noko ooɲnonek looc kizi lik. ³⁹ Inoko zin kaduwakuɲ igeet, akatai waanico alaɲ bai bodo acinaɲ aneet zee been iiten ci kabadane e. Enice ɲaan aziyu ne, Amayuk Jooi nɔɔɔ o aku zaare ogin.”

Aduwa Yesu liben o ceez o Joowo

24¹ Mazi aduwna Yesu ceeze o Joowo, ivitak nɔɔnɔ nuyawa ogine arɔɔŋ ka keyeltek nɔɔnɔ linat o ceez o Joowo. ² Ma anek niini nɔɔɔŋ ne, “Acinu yo kaal nicoko dook juruŋ? Kaduwakuŋ didile, akɔm tiŋeere tegebereme ci ceez nico noko codoi ataadonek gɔɔn taden. Alibi tiŋeere niigi dook lai.”

Aduwa Yesu piryakzet o ka kiiya

³ Mazi ako aavi Yesu loota biye o kazi Kinjiroc, ivitak nuyawa nɔɔnɔ doon ŋinaante. Ma avu ajin anek ne, “Duwayet di. Ma kaala nici dook akanai tiŋa? Tiŋeere ma ka ija, akanai gitaz ci ka kagaya badaan unun kibeen dican o loocu?” ⁴ Ma abedeke Yesu nɔɔɔŋ anek ne, “Egenyit juruŋ ka kɔkɔm eet ci alabanuŋ. ⁵ Eeci tiŋeere avu ɔl ci meelik zaare ogan, ma avu azi ne, Aneeta Kiristo neen. Ma alaba tiŋeere niigi ɔl ci meelik. ⁶ Aziŋnu tiŋeere oroonok ci aɔn, ma aziŋnu kaviyak ci oroonok ci reen. Bar zin má rak anyeku zinzeeti kotoŋole looc kaale nicoko, eeci kaal nicigi ŋedet iina. Alaŋ zin bar ayelza iiten ci aɔrneke e ele. ⁷ Katin gɔɔn lɔɔci ce ɔɔɔ ki looc co. Ma anyak katin tarjo ki looc mɔɔtiz vitenane ci meelik ger. ⁸ Ma kaal nicigi dook olla eel kiyo wucezi o gɔɔn rak aami ŋaa dole o.

⁹ Zin tiŋeere iinyaye niceke acabjuŋ ɔl igeet, ma agiduŋ, ma apayekuŋ daayiz. Ma amarninuŋ tiŋeere ɔl dook igeet, eeci atuyaŋ niiga aneet. ¹⁰ Tiŋeere iinyaye niceke ɔl ci meelik amiiri ki vurut tuwente uneeŋ. Akat tiŋeere ɔl ci amiiri ki vurut o gɔɔnɔgi o ŋaan atuwe vɔlɔŋa, ma amarnin niigi nɔɔɔŋ. ¹¹ Zin tiŋeere iinyaye niceke avu nyakananeta ci voloŋo meelik, ma avu alaba ɔl ci meel. ¹² Ma giye o tiŋeere appeni gerzitin ɔɔɔt, alaŋ tiŋeere ɔl ci meel areezo. ¹³ Bar zin eeti ci amena amez kaal nicoko dook zee ma aɔrneke, arogze tiŋeere niini.

¹⁴ Maje zin tiŋeere kaviyawa o abon akati baliin o Joowo uuwawonek rak loocok dook zee ma azii modena dook. Mazi odot, kiiya ni.

¹⁵ Acinu katin gi o ger ɔɔɔt baal aduwa nyakanani o kazi Danyel e. Acinu tiŋeere nɔɔnɔ abil ŋaao Joowo taabinto. (Abon zin aziŋnu gi nico juruŋ.) ¹⁶ Zin ɔl o abaak Judiya iinya niceke abon avir avɔ biyene. ¹⁷ Mā aavi eeti raa, abon avir enice. Akɔm bodo nɔɔnɔ waŋi ci ka kooyi ceeza tɔ ka kook kaara kaal ogin. ¹⁸ Mā aavi eeti mana, abon avir enice. Akɔm bodo waŋi ci ka kimiirozeke niini kɔɔk ka kook kodoma rum onin. ¹⁹ Nɔŋ ci kol tiŋeere ŋaane o anyake kibeen o arɔkti. ²⁰ Ijinit zin Jook ka calaŋ aviryu lɔɔlɔ, karabɔŋ een iitene o yubzento. ²¹ Eeci kinatamma laadun e zee been waanico noko akɔm piryakzet ci atobɔ kibeen ci katin aku neke. Ma akɔm bodo ci atobɔ ki nice katin been neen. ²² Bar zin anyewun Jooi iinya niceke kizi kidice. Ma da calaŋ agɔɔn nɔkɔ, akɔm koca eet ci arogi been neen. Anyek zin niini iinya niceke kizi kidice giye ci akati ɔl o eŋera niini.

²³ Zin iinyaye niceke mā anyak eet ci anekuŋ ne, Icinit di Kiristo ceeni ŋaato, karabɔŋ azi ne, Kiristo caana ŋaate, má aziŋnu nɔɔnɔ. ²⁴ Eeci avu tiŋeere ɔl ci azi ne, Keegina Kiristo, kibeen nyakananet ci voloŋo meelik. Agɔɔn katin niigi kaal ci atet ɔl biye, ka katamanti gɔl ci alaban ɔl o eŋera Jooi. ²⁵ Iziiktɔ zin! Inoko kuduwayuŋ naana igeet gi nico iŋaan kaal nici kakatai o.

²⁶ Mā anekuŋ katin ɔl ne, Aavi Kiristo baza, má avoyu ŋinaante been neen. Mā azi ne, Aroodi Kiristo ŋaato, má aziŋnu nɔɔɔŋ. ²⁷ Eeci naana ŋeerti Eeto kakun tiŋeere keyelizai kiyo barɔye o gɔɔn abadi tammu keŋa kicinit ɔl dook eci jenu been eci nyagjo o.

²⁸ Zin gɔɔn laadun mā alote kuduvaana ŋaaman, anyak gi ci adaai tɔ ŋinaante.

Aduwa Yesu badaan onin

²⁹ Bodo ŋintimiliny nɔkɔ mazi odotit kaal ci gerze iina noko, ookci ii kizi koli, maje nyelɔyi alaŋ bodo ataran looc, maje monyonya iina tammu tadena. Buk kaala o eel tammu bɔbɔra amɔɔt, ma ookci. ³⁰ Zin enice ŋaan ayelzai kuni onane aneet ŋeerti Eeto tammu tadena. Ma aboobi tiŋeere modena dook loota ŋina, ma acinan aneeta ŋeerti Eeto kawoya diizwani dɔyize ci appe been diŋdiŋonta. ³¹ Abee tiŋeere toromba ci agereny, ma kitoonai naana ŋeerti Eeto toonnyak ogan looc, ka kivita kuluta ɔl o aŋeryai loocowe dook.”

Zɔɔz ci ayabzonek keet ceen moneec

³² Ma azi Yesu bodo ne, “Agaac zɔɔz nico keete ween moneec. Gɔɔn mā acinu itilizit oto artek bɔlɔk, agayu nɔkɔ izi lɔlɔŋumi aɔn. ³³ Zin buk gole ci atobɔ ki nico, mā icintu kaal nicoko dook, agaac izi iiten o ka kiiyai aɔn. ³⁴ Didile kaduwakuŋ igeet, ma ɔl o gɔɔn amez piryakzet acin tiŋeere niigi kaal nicoko dook. ³⁵ Katin tammu taden ki tɔdɔ aɔrneke. Maje bar zɔɔz onane abil nɔkɔ kodot.”

Akɔm eet ci agawa iiten nice

³⁶ Ma azi Yesu bodo ne, “Akɔm eet ci agawa iiten ci kakune naana e kina. Alaŋ toonnyawa o tammu aga, ma alaŋ buk naana alya ŋeerti Eeto kaga, bar aga baaba doon. ³⁷ Katin kuni onane aneet ŋeerti Eeto akanai kibiirit ɔl ooti kiyo gi baal iina irkite o jijitina i o kazi Nowa e. ³⁸ Waanice iŋaan kiiya tawani e, adake ɔl, ma awode, ma aroce ɔl labak zee been iiten baal akɔyi Nowa kavoola e. ³⁹ Alaŋ waanice aga niigi nɔŋ ci kɔl ka baale kiiyak nɔɔɔŋ neke zee makacin iiya otodot tawani nɔɔɔŋ dook lai. Zin iitene ci kakune naana ŋeerti Eeto e abil nɔkɔ ele.

⁴⁰ Iitene nice mā eevyi ɔl ceen ram mana, aŋeryai codoi, ma oonnonek codoi looc. ⁴¹ Mā areke ŋaai ceen ram golwa, aŋeryai codoi, ma oonnonek codoi looc. ⁴² Egenyit zin! Otomta eleeti juruŋ, eeci alaŋ agawanu iiten ci kakune naana Manyi. ⁴³ Abon agayu gi ce. Inoko gɔɔn kizi gi ci agawa eeti iiten ci ka kiiyake agoryaiti ceez onin, acine koca calaŋ ɔŋ ka calaŋ anyek agoryai waŋi ci aku agorzin. ⁴⁴ Abon zin buk niiga eelnu nɔkɔ. Iziti vilile tup, eeci kakun naana tiŋeere ŋeerti Eeto iitene calaŋ agawanu.”

Zɔɔz ci ayabzonek gabaren ci abon

⁴⁵ Ma azi Yesu bodo ne, “Gabaren jaŋ yo ci abon aliŋliŋonek alaan onin juruŋ? Gabaren ci abon neen o anyek alaani onine nɔɔnɔ kabal gabara o miliny dook ka gɔɔn keŋerek niini nɔɔɔŋ dayiin ugeec juruŋ. ⁴⁶ Ajowa zin tiŋeere gabarenti nici vɔyit ci liŋliŋon onin iitene ci abadaan alaani onine, ma ajowa nɔɔnɔ agɔɔn liŋliŋon juruŋ kibil ebaal aduwake niini nɔɔnɔ e. ⁴⁷ Didile kaduwakuŋ igeet, mā agɔɔn nɔkɔ, anyek koca alaani nici kaal ogin dook kagam gabarenti nici. ⁴⁸ Bar mazi een gabarenti nici eet ci ger, anek koca ele maany ne, Alaŋ tiŋeere alaani cane o abada kataman. ⁴⁹ Ma arɔkɔ gɔɔnɔgi ci miliny o, ma adake niini labak, ma awot nyaantane kibeen ɔl o abaaki. ⁵⁰ Mazi abada tiŋeere alaani ci gabaren nico o iitene calaŋ niini agawan. ⁵¹ Aku aruk niini

gabaren nico ɔɔɔt ele, ma apayek nɔɔɔ gerzitin, eeci alaŋ agɔɔn liŋliŋɔn o anyonek nɔɔɔ juruŋ. Ako zin tiŋeere niini ŋaati ako aluwi zee ma adak nyigit.”

Zɔɔɔ ci ayabzonek dɔl ceen amɔɔ

25¹ Ma azi Yesu bodo ne, “Abil baliin o Joowa kete. Anyak baale dɔl ceen amɔɔ adoma lambet cigeec, ma aduŋna avɔ bitaala ka kɔɔt kurumtek eet ci rociinto gɔl. ² Ma dolene nicoko ceen tur ŋaatineerj tarbale, maje bodo ceen tur ageny ɔɔɔt. ³ Adoma dɔlya ceen tur tarbalik o avɔyi lambet kɔkɔm maal oma ci anyayek. ⁴ Maje dɔlya ci ageny o avɔyi lambet ugeec kibeen bodo maaltane oogi burwete. ⁵ Bar eeti ci rociinto o alaŋaan aku taman, ma are dɔlya nɔɔɔ ŋinti reen zee makacin atanguzo.

⁶ Ma baalin keŋa egereny eeti oman azi ne, “Eet o rociinto e ce. Ivita urumtek gɔl.” ⁷ Ma iŋaaz dɔlya dook amɔɔ, ma aperperan lambet ugeecik e juruŋ. ⁸ Ma anek dɔlya ci tarbal o gɔɔɔgi ci ageny o ne, “Anycetɔ da maaltane ci miliny. Idicai maaltane lambete cigaacak o.”

⁹ Ma abedeke dɔlya ci ageny o nɔɔɔgɔ anek ne, “Izi buk maaltane ci kanyaka o kidice ter. Alaŋ kaleeno ki ageet dook. Odokonyit ɔɔɔ ataalta melegenyai kataman.”

¹⁰ Odokonyit ni didi dɔlya ci ona tarbal noko ka kɔɔt kataala maaltane. Mazi avɔ niigi melegenyai, urum eeti o rociinto e looc. Iiya ni orkorit niini kibeen dɔl ween tur ageny e ɔɔɔ ceeze o tiŋkawiinto, ma anyook karogi.

¹¹ Ma vurtã ivita dɔlya o tarbal e. Ma avu aruk karogi azi ne, “Manyi, manyi, koleyet da ceez kootã eecitã.”

¹² Bar abedeke eeti ci rociinto o nɔɔɔgɔ anek ne, “Aavtiza bitaala ŋinaante. Alaŋ kagayun naana igeet.”

¹³ Izi ni Yesu ne, “Egenyit zin, eeci alaŋ agayu iten karabɔŋ een ziit ci kakune.”

Zɔɔɔ ci ayabzonek gabara ceen iiyu

¹⁴ Ma azi Yesu bodo ne, “Ma baliin o Joowo abil kete. Anyak baale eet ci arɔɔŋ keeron. Mazi ka kɔɔɔ, otowa gabara ogin, ma aku aduwak nɔɔɔgɔ kuzuuti kaal ogin dook juruŋ. ¹⁵ Ma anyek gɔɔn co ŋaatineerj liŋliŋɔn ci agano ki nɔɔɔ. Anyek eet co guruc ceen 5000. Ma anyek bodo eet co guruc ceen 2000. Ma anyek bodo eet co guruc ceen 1000. ɔɔɔ ni niini. ¹⁶ Odoma gabarenti o anyonek nɔɔɔ guruca ween 5000 e, ook iliŋliŋi guruc nicoko zee makacin bodo anyaa guruc ceen 5000 oogi bodo. ¹⁷ Bodo buk gabarenti o anyonek nɔɔɔ guruca ween 2000 e, ook iliŋliŋi guruc nicoko zee makacin bodo anyaa guruc ceen 2000 oogi. ¹⁸ Maje gabarenti o anyonek nɔɔɔ guruca ween 1000 e, ook adawek guruc nicoko looc itaŋa.

¹⁹ Ma irkitowe ogen abada alaani uneerj ka kiiya kigiilit ki nɔɔɔgɔ guruc ogin baal anyek nɔɔɔgɔ e. ²⁰ Mazi avɔ agiil guruc, anyaa gabarenti baal anyonek guruca ween 5000 e alaan guruc oogi ceen bodo ni 5000, ma aku anek nɔɔɔ ne, “Anyan baale guruc ceen 5000. Inoko zin kiliŋliŋa guruc oogi ceen 5000 bodo.”

²¹ Ma anek alaani nɔɔɔ ne, “Abon ɔɔɔt ele. Een niina gabaren ci abonnan ziniz. Aliŋliŋ juruŋ. Zin giye o aliŋliŋe guruc baal miliny e juruŋ, ŋaan kanyin ineet guruc ci meel bodo ka liŋliŋi. Inoko ija ka kozolit ki ineet talniin can o.”

²² Ma aku bodo gabarenti baal anyonek nɔɔɔ guruca ween 2000 e, ma aku anek alaan ne, “Anyan baale guruc ceen 2000. Inoko zin guruc oogi ceen 2000 kiliŋliŋa ce.”

²³ Ma anek alaani nɔɔɔ ne, “Abon ɔɔɔt ele. Een gabaren ci abonnan ziniz. Aliŋliŋ juruŋ. Zin giye o aliŋliŋe guruc baal miliny e juruŋ, ŋaan kanyin ineet guruc ci meel bodo ka liŋliŋi. Inoko ija ka kozolit kibeen ineet talniin can o.”

²⁴ Iiya ni bodo gabarenti baal anyonek guruca ween 1000 e. Ma aku anek alaan ne, “Manygɔn, Kagayin naana ineet een eet ci gɔɔn adoknin aziiti, ma ateedi niina kaal ci eeva ɔl ogen. ²⁵ Kotoŋolewin zin, ma kaka karoodi guruc baal anyan e kadawei looc. Ore zin nɔɔɔgɔ ce.”

²⁶⁻²⁷ Ma abedeke alaani nɔɔɔ anek ne, “Een niina gabaren ci ger ɔɔɔt, ma adaaŋnin buk ele ɔɔɔt. Mã da agayan niina aneet kateedi gɔɔn kaal ci eeva ɔl ogen, abon waan zin aliŋliŋe guruc cigan o labak ka kojowa bodo azaace.”

²⁸ Ma anek alaani gabara ogin ne, “Aamta guruc nicoko ŋaatin, ɔɔɔ anycek gabaren ona anyak guruc ween 5000 e. ²⁹ Eeci mã anyak eeti kaal ci meel ger, anyonek bar bodo nɔɔɔ ci meelik ɔɔɔt. Maje eeti ci anyak kaal ci miliny ter, aamnyai bar ŋaatin nici kavɔ nɔkɔ dook. ³⁰ Inoko zin gabaren ci ger noko ujuktek nɔɔɔ bitaaln muur ŋinaante, ka kook kutulu ŋinaante zee ma adak nyigit.”

Aduwa Yesu payiin o aŋorneke

³¹ Ma azi Yesu bodo ne, “Iiten ci kabadane naana ŋeerti Eeto ki toonnyak ogan titinyonte onan, kaku kaavi lecere onan alaazetu.

³² Ma alotakan katin ɔl o loocu dook aneeta. Ma kaku kaŋer nɔɔɔgɔ dook lelen ram kiyo gɔɔn aŋera eeti o eeazawu aza bawɔne o.

³³ Kari zin tiŋeere ɔl o atuyan aneet libir onan azo. Ma kari ɔl o alaŋ atuyan aneet kaŋeta. ³⁴ Ma tiŋeere kanei naana alaani ɔl ci ona aavtiz aneet libire ci azo o ne, “Ivitak niiga o amayukuŋ baaba baliin onin baal agɔɔnakuŋ niini igeet laadun kinatamma e. ³⁵ Baale adakan magiz, ma anyan dayiin. Baale arukan kɔr, ma anyan maam kowode. Baale keen kernoi, ma atalnanan korogjowe ugooc.

³⁶ Baale kawo ŋaɔinyiny, ma anyan rumane. Baale kamoor, ma atiritan. Baale kacabje, ma avu gɔɔn acinan.”

³⁷ Zin katin ɔl ci ona abon noko abedekan niigi aneet azi ne, “Manyi, ma da kacinin adakin magiz, ma kanyin dayiin waŋa? Ma da kacinin arukin kɔr, ma kanyin maam waŋa? ³⁸ Ma da kacinin eeron, ma katalnanin korogjowe waŋa? Ma da kacinin awo ŋaɔinyiny, ma kanyin rumane waŋa? ³⁹ Ma da buk kacinin amoor karabɔŋ acabje, ma kavɔ kacinin waŋa?”

⁴⁰ Kabedeke zin tiŋeere naana alaani nɔɔɔgɔ kanei ne, “Didile kaduwakuŋ igeet, ma kaal o gɔɔn abon agooneku niiga gɔɔnɔga cigan celbez noko, bar agoonekan niiga aneeta.”

⁴¹ Kookconei zin katin naana alaani ɔl o eel aneeta kaŋeta e, ma kanei ne, “Enyekte ɔɔɔ ŋaatan ŋina niiga ci apayekuŋ Jooi gerzitin o. ɔɔɔ gooye o abil been neen baal agɔɔnnyak Loryen kibeen toonnyak ogin e. ⁴² Baale adakan magiz, ma alaŋ anyan dayiin. Baale arukan kɔr, ma alaŋ anyan maam kowode. ⁴³ Baale keen kernoi, ma bar alaŋ atalnanan korogjowe ugooc. Baale kawo ŋaɔinyiny, ma alaŋ anyan rumane. Baale kamoor, ma kacabje, ma alaŋ avu atiritan.”

⁴⁴ Abedekan zin tiŋeere niigi aneet azi ne, “Manyi, ma da kacinin adakin magiz, karabɔŋ arukin kɔr, karabɔŋ een kernoi, karabɔŋ awo ŋaɔinyiny, karabɔŋ amoor, karabɔŋ acabje sijina, ma alaŋ katiritan waŋa?”

⁴⁵ Kabedeke zin tiŋeere naana alaani nɔɔɔgɔ kanei ne, “Didile kaduwakuŋ igeet, ma eeti o gɔɔn alaŋ atirit eet codoi ole ci celbez noko, alaŋ atiritan niini aneet.”

⁴⁶ Zin tiŋeere ɔl nicoko apawonek nɔɔɔgɔ goo o abil been neen. Maje ɔl o abon avɔ niigi rogete o abil been neen.”

Abaaban alaata gəl ci ka kurukti Yesu genyiza

26 ¹Mazi adica Yesu demziin ci kaal nicoko dook, enek nuyak ogin ne, ²“Agayu niiga tiñeere ece iiten o Juz gɔɔn aadane vardanjinet. Zin iitene nice naana Ŋeerti Eeto kako kanyononei ɔl o ka kɔɔt kotodoyan aneet keete ween talakec.”

³Ivitak ni alaata o ceez o Joowo kibeen alaata o Juz kɔɔk o Kayavas ween alaan o adikir ceenze o Joowo. ⁴Ma avu abaaban niigi gəl ci ka kagamti Yesu genyiza, kɔkɔm eet ci aga, ka kɔɔt kuruyit nɔɔnɔ kadaak. ⁵Ma anɔ ne, “Alaŋ abon ŋaati kagooni gi nico iinyaye ci vardanjinto o, gerze ŋaan ayoket ɔl ageet.”

Avuut ŋaa oman Yesu Bezaniya

⁶Ma iitene oman aavi Yesu ole o eet o kazi Saiman baal amɔɔr mɔɔriz o gidaŋ e Bezaniya. ⁷Mazi ŋaan adake nɔkɔ, iiyak nɔɔnɔ ŋaa ci anyaa ketezewoc ci abiz karacoc ci ataala guruce ci meelik ɔɔɔt. Ma aku atitiny niini Yesu ŋaati aɗuuteke nɔɔnɔ karacoc nico nɔɔnɔ ɔɔ. ⁸Mazi acin nuyawa gi ci agɔɔn ŋaa nici noko, otoborit niigi nɔŋ. Ma aŋɔmtɔ anɔ ne, “Ma laadun ŋaa nici aminanji karacoc nico gaga naa? ⁹Alaŋ abon waan bar ataalane karacoc nico guruc ci meelik ka kanyozek guruca ɔl o amaata?”

¹⁰Maje Yesu aga gi ci azɔɔz niigi noko nɔkɔ, ma anek nɔɔgɔ ne, “Aŋɔmotu dim ŋaa nico naa? Ma gi ci agoonekan niini aneet noko gi ci abon ɔɔɔt ele ŋaatan. ¹¹Ma ɔl ci amaata o ŋaan aromenu tiñeere niiga ki nɔɔgɔ ŋina iinya dook. Maje naana alaŋ bodo karome ki igeet tiñeere tup. ¹²Aɗuutekan niini karacoc o adimanan niini aneet ka kerewa dawiin. ¹³Inoko zin anycaŋ kuduwayuŋ gi ce. Tiñeere gɔɔn ma akɔ uuwaki kaviyawa o Joowo loocowe dook, aadjai buk gi ci ona agɔɔn ŋaa nicini noko.”

Agama Judaz zɔɔz ci ka kataalɔi Yesu

¹⁴Ɔɔtɔ ni Judaz Iskariyot ween nuyai codoi nuyawe ween amɔtɔ ram ook alaate o ceez o Joowo. ¹⁵Ma akɔ anek nɔɔgɔ ne, “Mā kayelekuŋ gəl ci agamnyu Yesu, anyan koca naa?” Anycek ni niigi nɔɔnɔ guruc ceen eetom kamɔtɔ. ¹⁶Akata ni Judaz iinyaye niceke orooŋun gəl ci ka keyeleke nɔɔgɔ Yesu.

Adak Yesu ki nuyak dayiin o vardanjinto

¹⁷Ma iitene o akanan loten o vardanjinto gɔɔn adayi ɔl ɗɔken o alaŋ amokcar, ivitak nuyawa Yesu, ma avu anek ne, “Mayo arooŋnyet koota kutuguzeyin dayiin ci vardanjinto ŋaadaŋ?”

¹⁸Ma abedeke niini nɔɔgɔ anek ne, “Anyak eet oma kutura ŋinaante. Ɔɔtɔ enektek nɔɔnɔ ne, Azi alaani o demziinto ne, Izi iiten ci ka kadakta naana ki nuyak ogan dayiin o vardanjinto ole cun e.”

¹⁹Ɔɔtɔ ni didi nuyawa utuguzɔ kiyɔ ona aduwak Yesu nɔɔgɔ o, ma avɔ agɔɔn dayiin o vardanjinto ŋinaante.

²⁰Ma yomana ivita Yesu ki nuyak ogin een amɔtɔ ram, ma aavtiz loota ka kadaktɔ. ²¹Ma dayiine ŋina anek Yesu nɔɔgɔ ne, “Didile kaduwakuŋ igeet, ataalinan tiñeere eeti codoi ŋaatonooŋ aneet.”

²²Mazi azii nuyawa gi nico, ivirit nɔɔgɔ dook zinzeeti. Ma ajin ceeni gɔɔn ŋaatiineŋ Yesu anek ne, “Aneeta gi? Manyi, aneeta gi?”

²³Ma abedeke Yesu nɔɔgɔ anek ne, “Akɔ tiñeere ataalinan eeti ci kazola ki nɔɔnɔ dayiin ŋina noko ele. ²⁴Zin naana Ŋeerti Eeto ŋaan kadaai ebaal aduwan warage o Joowo laadun e. Bar zin nɔŋ ci kol eete ci akɔ ataalinan aneet o. Abon da bar niini alaŋ aritai dook.”

²⁵Buk Judaz o ka kook kataalɔi Yesu e ijin buk nɔɔnɔ anek ne, “Manyi, aneet gi?”

Ma abedeke Yesu nɔɔnɔ anek ne, “Neen ci aduwa o.”

²⁶Mazi ŋaan adake niigi nɔkɔ, odoma Yesu ɗokoc, ma anyek Jook zany, ma ateet ɗokoc nico, ma aŋerek nuyak, ma azi ne, “Adayit. Nicini ele onan neen.”

²⁷Bodo adoma diic ci nyaanu, ma anyek Jook zany, ma anyek nɔɔgɔ anek ne, “Owodit niiga dook. ²⁸Nicigi biye ogan ayelza terkediin o Joowo aɗuutonek looc ka kutuyɔ ɔl ci meel, ma aaryai baciinowa ugeec. ²⁹Didile kaduwakuŋ igeet, alaŋ bodo naana kawode ŋaatodoi ki igeet zee ma kavɔ kawude baliinte o baaba.”

³⁰Artek ni niigi beniin codoi, ma iŋaaz avɔ biye o kazi Kiŋjiroc.

Aduwa Yesu danjin o Pitɔr

³¹Enek ni Yesu nɔɔgɔ ne, “Adotekaŋ tija looc, ma aviryu niiga dook, eeci azi waragewi o Joowo ne, Karui tiñeere eet o towawiinto kazaante eezana. ³²Zin tiñeere ma kitija naana daayiza, karake ŋaatonooŋ kako Galiliya.”

³³Enico itija Pitɔr, ma anek Yesu ne, “Alaŋ bai naana kooŋnekin looc been neen! Yo nuun avir nuyawa dook, alaŋ naana kavir.”

³⁴Ma abedeke Yesu nɔɔnɔ anek ne, “Didile kaduwakin ineet, adaŋnyan tija lak iiyu zee ma arɔk toloci o oowu.”

³⁵Ma abedeke Pitɔr nɔɔnɔ anek ne, “Alaŋ bai naana kadaŋnyin been neen, mayo nuun mā ka kadaayit ki ineet.”

Ma buk aduwa nuyawa dook gi ci aduwa Pitɔr o.

Aŋarye Yesu Gezemaniya.

³⁶Ivita ni Yesu ki nuyak ogin. Mazi avu arum ŋinti kazi Gezemani biye o kazi Kiŋjiroc, enek niini nɔɔgɔ ne, “Aavtiz ŋina rak ŋinti ŋaan kako kaŋaryine o.” ³⁷Ma akɔyi niini Pitɔr ki lɔgɔz o Zebedi kazi Jemis been Jɔn. Maje nɔɔnɔ avir ziniz ɔɔɔt ele. ³⁸Ma anek niini nɔɔgɔ ne, “Kanyei naana ziniza inoni ci appe ɔɔɔt ci ajonini daayizi. Aavtiz zin niiga ŋina ebeyit eleeti ŋaryiinta.”

³⁹Ma akɔ niini ŋintimiliny, ma akani ŋum looc, ma aŋarye azi ne, “Baaba, mā anyak gəl oma, aara piryakzet ci ka kiiyayan noko ŋaatan. Alaŋ een zin bar eo karɔŋe naana, bar tugu eo arɔŋe niina.”

⁴⁰Mazi abadaak nuyak ween iiyu e, amada nɔɔgɔ atanguzɔ. Ma anek niini Pitɔr ne, “Ma niiga dook iyontiya alaŋ atamanu kicinte ki aneet ziit codoi ɗɔr o naa? ⁴¹Iziti vilile. Aŋaryuɔ ka calaŋ acinanuŋ Loryen zinzeeti zee ma agoonu oŋe. Eeci zinzeeti ugooc arɔŋ kutuguzɔ kaal ci abon, maje bar eleeti cugooɔ o alaŋ anyak dayiz.”

⁴²Bodo ŋintimiliny nɔkɔ imiurozek Yesu ŋaryiin. Ma akɔ ajin Jook anek ne, “Baaba, mā alaŋ piryakzet ci ka kiiyayan noko aaryai, tugu eo arooŋ niina labak.”

⁴³Mazi abada ŋaryiinta, amada bodo nuyak atanguzɔ, eeci adon niigi ɔɔɔt ele.

⁴⁴ Bodo amiiri niini, ma ako aŋarye aduwa zɔɔz we ele. ⁴⁵ Ma abadaak nuyak, ma aku anek ne, “Ŋaan dim ooginu noko? Izi zin ziiti o ka kanyozeke naana Ŋɛerti Eeto ɔl o oŋenu aɔn. ⁴⁶ Itingaz, kɔtɔɔz. Icinit di, iya ɛeti o ka kook kataaloyan.”

Agam ɔl Yesu

⁴⁷ Mazi ŋaan azɔɔz Yesu noko, urum Judaz looc ɔrkɔra kibeen ɔl ci meel ger ci itoona alaata o ceez o Joowo been ɔl o Juz baayizo. Awoya niigi dilanyai ki keeni. ⁴⁸ Maje uyen Judaz enek nɔɔgo ne, “Tedec mā acinu eet ci kacoco ŋalyamoc o, nɔɔno neen agamit.”

⁴⁹ Mazi aku arum Judaz looc, ook ŋaati Yesu ecodoi noko, ma anek nɔɔno ne, “Abona, alaan o demziinto.” Ma acoco nɔɔno ŋalyamoc.

⁵⁰ Enek ni Yesu nɔɔno anek ne, “Laŋo, tugu gi ci aroŋ tugu o labak.”

Ivita ni ɔl, ma agam Yesu. ⁵¹ Ma avoca nuyaiti codoi nuyawe o arome ki Yesu o kabaz tibila, ma ateeda gabaren ci alaan o ceez o Joowo itat por. ⁵² Ma anek Yesu nɔɔno ne, “Bil di! Arek kabaz cun noko tibil. Eeci ɔl o goon akat ɔl dilanyai dook adaai buk katin niigi dilanyai. ⁵³ Alaŋ agayu mā inoko kawo baaba, itoonakan toonnyaye ogin ci meelik enico ele kiiya kitiritan o? ⁵⁴ Mazi koca avu atiritan toonnyawa aneet, ka zin zɔɔz o warage o Joowo keleemnyai ku?”

⁵⁵ Enek ni Yesu kɔle dook ne, “Naa avunakan keeni ki dilanyai ka ivita agamtaŋ kiyo keen agoryai o naa? Karome goon naana ki igeet tup kademze ceeze o Joowo, ma ŋaan agamtaŋ. ⁵⁶ Bar zin kaala nicigi dook iina o ka keleemnyai zoowowa baal ayeet nyakaneta e.”

Enico odokonyit nuyawa dook ŋina lai, otoŋtek Yesu doon looc.

Aavi Yesu roonnya

⁵⁷ Ooti ni ɔl ci ona agam Yesu o nɔɔno ole o alaan o ceez o Joowo kazi Kayavas ŋaa ona aloten alaata o goon ademzek ɔl lotinok kibeen ɔl o Juz baayizo e. ⁵⁸ Mazi avoyi niigi Yesu, unuwun Pitɔr nɔɔgo vurma reena zee ma avo arum kɔrɔk ci Kayavas ona avoyi ɔl Yesu o. Ook ni aavu niini loota oromte ki ɔl o abek ceez o alaano kɔrɔk keŋa ka kicin gi ci aroŋ kutuguzek ɔl Yesu o.

⁵⁹ Maje alaata o ceez o Joowo ki ɔl o roonnyo dook aroŋ goɔl ci ajowan gi ci ger abaca Yesu ka kɔt kuruyit nɔɔno kadaak.

⁶⁰ Bar zin ɔkɔm gi ci ger ajowa niigi ŋaatin kina, yo nuun akat ɔl ci meelik ger nɔɔno vɔlɔŋa o. Ma vurma itingazo ɔl raman jena.

⁶¹ Ma anek ɔl o roonnyo vɔlɔŋa ne, “Kaziiŋna iiten baale azi ɛeti nici ne, Kanim naana kɔɔyɔk ceez ci Joowo noko, ma bodo keneeti iinyaye ceen iiyu.”

⁶² Mazi azii Kayavas zɔɔz nico, itiŋa jena, ma anek Yesu ne, “Anyei gi ci aroŋ bariz zoowowe ci aduwa ɔl nici noko tɔ?”

⁶³ Maje Yesu ajaki niini labak cin. Ma bodo anek alaani Yesu ne, “Inoko didi zaare o Jook o arogi duwayet mā een niina Kiristo ween ŋeerti Joowo ele neen.”

⁶⁴ Ma abedeke Yesu nɔɔno anek ne, “Neen ci aduwa niina o. Inoko zin kaduwakuŋ igeet ci aavtiyu ŋina noko dook, acinaŋ tiŋeere niiga aneeta Ŋɛerti Eeto ŋaati kaave aziite o Joowo azo, ma kabada tiŋeere ŋaati kawoyane diizwani tamma.”

⁶⁵ Mazi azii alaani zɔɔz nico, otobor nɔŋ, ma aɛec rumanɛ ogin maany, ma azi ne, “Eeti nici amomoz Jook giye ci anyeke ele kizi Jook noko. Inoko iziiktu niiga dook zɔɔz ci aduwa niini noko. Alaŋ bodo karɔŋ cudane oogi. ⁶⁶ Inoko zin aroŋnyu niiga apaktek nɔɔno naa zooze nico?”

Ma azi niigi dook ne, “Abac niini gi nico ɔrɔɔt. Abon adaai.”

⁶⁷ Otortek ni niigi nɔɔno amot, ma arɔk. ⁶⁸ Ma adoma ɔl ci ona aruk nɔɔno voret noko, ajin nɔɔno anek ne, “Kiristo, aga ri niina kaal dook. Ŋeneen ci arookin o?”

Adaŋ Pitɔr Yesu

⁶⁹ Maje Pitɔr aavi bitaala kɔrɔk keŋa. Ma aku dole ceen gabaren ci alaan o ceez o Joowo, ma anek Pitɔr ne, “Orkoryu ri buk goon niina kibeen Yesu ci Galili noko.”

⁷⁰ Ma bar adaŋnyi Pitɔr ɔl dook kɔrgena ŋina anek dole nico ne, “Alaŋ kaga gi ci aduwa o been neen.”

⁷¹ Ma iŋaaz niini ŋina, ma ako araan otoga. Bodo icin dole ceen gabaren oman nɔɔno, ma anek ɔl ne, “Orkɔr goon buk ɛeti nici ki Yesu o Nazaret.”

⁷² Bodo ni adaŋnyi Pitɔr azi ne, “Didile kateedona zɔɔ, alaŋ kaga eet ci aduwa o been neen.”

⁷³ Bodo ŋintimiliny noko ivitak ɔl o eel ŋinaante e Pitɔr, ma avu anek ne, “Niina alya een eet codoi ole o Yesu, eeci azooz kiyo niigi o.”

⁷⁴ Ma abarzek bodo Pitɔr nɔɔgo anek ne, “Didile mā kaduwa vɔlɔŋ, adaakan koca tammu. Alaŋ kaga eet nico.”

Enico ele ɔrɔk toloci. ⁷⁵ Ma aada Pitɔr gi baal anek Yesu ne, “Adaŋnyan tiŋeere lak iiyu zee ma arɔk toloci e.” Udun ni niini ook bitaala, ma ako alu ɔrɔɔt ele.

Avoyi ɔl Yesu ŋaati Pailat

27 ¹ Ma ŋeere ririwɔna ivita alaata o ceezi o Joowo dook kibeen alaata o Juz abaabanit goɔl ci ka kurukti Yesu kadaak. ² Acabit ni niigi nɔɔno azeen, ma avoyi alaane ween Romen kazi Pailat.

Daayiz o Judaz

³ Mazi ako acin Judaz apaktek ɔl Yesu daayiz, uwucek nɔɔno gi nici ɔrɔɔt, ma abad mony. Ma amiironeke alaata guruc baal een eetom kamɔtɔ anyek niigi nɔɔno ka keyeleke nɔɔgo Yesu e. ⁴ Ma anek niini nɔɔgo ne, “Kabaca oŋec giye ci kanyuŋ eet ci abon noko, eeci inoko aroŋnyu uruyit nɔɔno kadaak.”

Ma ebedeke niigi nɔɔno anek ne, “Akɔm ageeta zɔɔz cinaaŋ. Nicini zɔɔz cun doon.”

⁵ Ujukek ni Judaz guruc ceez o Joowo keŋ. Ma adun, ma ako acabek alem keet.

⁶ Everta ni alaata o ceez o Joowo guruc ci ona ajukek Judaz ceez keŋ noko, ma anɔ ne, “Nicigi guruc ci biyetu. Alaŋ zin abon keere ona ŋaati karomi ki guruc o ceez o Joowo.” ⁷ Ma agama niigi dook ka kataalai guruc nicoko mana ci eet o goon ɛenyet ijunya ka kizi ŋinti goon adawi niigi ɔl ceen modo, mate goon adaai niigi Jerusalema. ⁸ Gi zin ci awe ɔl mana nice kizi Mana ci Biyetu zee been inoko o neen.

⁹Zin gi baal aduwa nyakanani o kazi Jirimaya e eleemnyai didi. Azi baale niini ne, “Ooti ol o Israyil guruc baal een eetom kamoto baal aronj niigi ka kataalai noono e, ¹⁰ma avo ataalane mana ci eet ci eenyet ijunya kiyo baale aduwakan Jooi e.”

Ajin Pailat Yesu

¹¹Iiya ni ijin Pailat Yesu enek ne, “Ineet alaan o Juz neen?”
Ma abedeke Yesu noono anek ne, “Neen ci aduwa niina o.” ¹²Maje giye o akolaki alaata o ceez o Joowo kibeem ol o Juz mayan noono rooni volonja akom niini gi ci abariz kina.
¹³Ma anek Pailat noono ne, “Alaŋ kaal ci akanin ol ineet noko azii?”
¹⁴Bar Yesu akom gi ci abariz kina. Ma giye nico ibiir alaan o oot.

Apawonek Yesu daayizi

¹⁵Maje goon baale laadun ma aku iiteni o aadane ol o Juz vardaninet, waga alaani eet codoi ole o acabje ci te olla aronj ol noono koojai. ¹⁶Zin iitene nice anyak eet ci ger acabji giye ci amonyi niini ol, ma aga ol dook noono kazi zaar cigin ne Barabas. ¹⁷Mazi avo alotai kole dook, ijin Pailat noogo enek ne, “Aroonnyan kooŋayun Barabas yo kooŋayun da Yesu o kazi Kiristo?” ¹⁸Maje Pailat aga noko anyaak alaata ci Juz noono Yesu o, eeci amadik niigi noono gaga noko, kokom gi ci ger agoon.

¹⁹Mazi naan aavi Pailat roonnya noko, itoonak naa onine ol noono otok ci azi ne, “Ma agoonei eet nico gi ci ger been neen, eeci kapirna bilija avunakan wunozya ci akati noono, ma awucnekan niini oot ele.”

²⁰Maje alaata o ceez o Joowo kibeem ol o Juz baayizo ayoota ol ceen kole o ka kuduktak Pailat kooŋa Barabas. Maje Yesu abon apawonek noono daayizi. ²¹Ma ajin Pailat kole anek ne, “Mayo ole ceen ram noko aroonnyan kooŋayun jan?”

Abedeke niigi noono anek ne, “Karooŋnyin wogayet Barabas.”

²²Ma bodo ajin Pailat noogo anek ne, “Ma Yesu ci kazi Kiristo o kutuguwek naa?”

Ma abedeke niigi dook Pailat anek ne, “Todo noono talakeca kadaak.”

²³Abedeke bodo Pailat noogo anek ne, “Abaca niini gitaz?”

Bar enico egerenyit niigi oot ele azi ne, “Todo noono.”

²⁴Mazi ako acin Pailat akoma gol ci wogane Yesu, ma otoborit ol dook nono noko, abaaban izi ne, karabonj tedec agoon ol gi ci ger, odoma ni maam otoony azeen noogo numa, ma anek noogo ne, “Akomnan aneet gi can daayize ci eet nico o. Gi cunoonj doon nico. Alaŋ naana kawoye to.”

²⁵Mazi aduwa Pailat gi nico, egerenyit niigi dook aziti ne, “Anyek biye cigin o kivitayet ageeta ki dol ci dol cigaacak labak.”

²⁶Wogak ni Pailat noogo Barabas. Ma aduwak ol rak korooyit Yesu zee anyek ni noono koot kotodeec niigi noono keete ween talakec.

Amomoz takirnya Yesu

²⁷Ooti ni takirnya Yesu ole o alaano, ma avo aliya niigi dook noono. ²⁸Ma aburuca noono rumané ogin, ma aborceke rum ci meeri. ²⁹Ma agoon na nyigirgir ceen bila, ma avo aborceke noono o. Ma anyek keet kanyak aziite ci azo o kiyo keet o goon anyak eeti ween alaan o. Ma avo amomoz niigi noono akanek kozonjin kiyo alaani o. Ma azi ne, “Rok bai noko kodot, alaan o Juz.” ³⁰Ma oortek niigi noono amot, ma aama keet we bodo, ma arooi noono o. ³¹Mazi ijezit kaal ci ona amomoz niigi noono noko dook, uburuca rum ci meeri noko, ma arike noono rum onin laadun e. Ooti ni niigi noono kutur bitaala ka koot kotodeec kadaak talakeca.

Dodinet o Yesu

³²Mazi adunni niigi noono, urumto gola kibeem eet ci kazi Saiman ci looc ci kazi Sariin. Adanteke ni niigi noono kitik keet ci Yesu een talakec o. ³³Ma avunak niigi njinti kazi Golgoza. Ma keŋ ci zaar ci kazi Golgoza noko kazi ne amen ci oowu. ³⁴Ma njinaante anyek niigi Yesu nyaan ci acano ki agero ci akaka. Mazi atar niini, otobor alaŋaan awot.

³⁵Otodooc ni niigi noono njinaante. Ma anerek rumané ogin eleeti naati agooni maadico. ³⁶Mazi ako odotiz, aavtiyo niigi njinaante ebeyit noono. ³⁷Maje keete ci ona adodine Yesu noko tadena ayeedi niigi gi ci ona aruyi ol noono o azi ne, “Nicini Yesu ween alaan o Juz.”

³⁸Ma anyaa buk bodo niigi ol ceen agoryak een ram, ma avo adodo codoi noono eci azo o, maje codoi adodo eci kaŋeto o.

³⁹Maje ol ci olla awo gola ararni Yesu zee ma arurut ooti, ma amomoz noono anek ne, ⁴⁰“Ma baale azi ne, Ka woye ceez o Joowo, ma bodo eenyca iinyaye ceen iyyu. Rogoz zin di ele. Ma een neerti Joowo didi, duna di keete ci adodine noko looc.”

⁴¹Maje buk alaata o ceez o Joowo, ki alaata o ademzek ol lotinok, been ol o Juz baayizo amomoz buk niigi noono noko. ⁴²Ma ano ne, “Arogoz niini ol oogii doon, ma bar alaŋ anim korogoz ele cin o maany. Alaŋ een niini alaan o Israyil neen? Ma adunnak looc keete ceen talakec adodine noko, katu koca naaga dook noono. ⁴³Atu niini Jook, ma atarkat gi ci azi ne, Een niini neerti Joowo. Kicinit zin di ma eela Jooi inoko noono.”

⁴⁴Mayo nuun een ol ween agoryak adodo ol ki noono e amomoz buk noono.

Daayiz o Yesu

⁴⁵Mazi ako abil ii boloca, izi looci dook dildil kizi muur ziik iyyu. ⁴⁶Ma ziiye ween iyyu yomana egereny Yesu molowe ci appe azi ne, “Eli, Eli, Lema Sabaktani?” Ma keŋ ci zozz nico azi ne, Jook onan, Jook onan. Oonnan naa?

⁴⁷Mazi azii ol ogen ole ci eel njinaante gi nico, izito ne, “Awo bonj niini Ilija.” ⁴⁸Ma adokony eeti codoi naatineen, ma ako adoma kaviyoi, ma ajukek nyaan, ma akat moroka, ma itoonak noono ka kococo.

⁴⁹Maje bar ol ogene azi ne, “Bil rak di, kicinit karabonj aku arogoz Ilija noono.”

⁵⁰Egereny ni Yesu bodo molowe ci appe, ma atee enico ele.

⁵¹Ma areeci rum o goon anerin ceez o Joowo korgena enico ele, akanai tadena been tir loota. Maje looci amoot kirakirak, ma alibe biyen taza. ⁵²Ma akoli looknya o gabara o Joowo titiny baal goon adaai e. Ma anaaz ci meelik naatineen daayiza korogit.

⁵³Ma adunna niigi looknyai. Mazi ijaaz Yesu daayiza, wozozo niigi wot Jerusalem, ma avo acin ol ci meel ger noogo.

⁵⁴Mazi acin alaani o takirnyawu kibeem takirnya ogin abek Yesu e looc mooziz kibeem kaal nicoko dook, otonjole niigi looc oot ele, ma ano ne, “Didile eeti nico te neerti Joowo gi.”

⁵⁵ Maje njinaante anyak njai ci meel ger baal anowa Yesu Galiliya, ma atirit nɔɔɔ e. Agelem niigi Yesu reena. ⁵⁶ Ma njai nici awoyi Meri o kutur o kazi Magdala, ki bodo Meri ween yaati Jemis been Josev, kibeem yaati Jemis ki Jon.

Dawiin o Yesu

⁵⁷ Ma yomana iya eeti ceen aroi kazi zaar ne Josev ci aluuga baale Arimatiya. Niini buk nuyai ci Yesu. ⁵⁸ Ma ako ajin Pailat ka kanyek nɔɔɔ Yesu kook kada. Ma aricanek Pailat ol ka kanycek Yesu Josev. ⁵⁹ Odoma ni Josev ele o Yesu atakucek rum ci vɔɔ colai. ⁶⁰ Ma ako arek boot onin baal agoonak niini ele maany biya e, zee anyaa ni be ci appe ɔɔɔt ele, ma aku anyoogi boot otok. Zee ɔɔɔ ni niini. ⁶¹ Maje Meri o Magdala ki Meri oma bodo aavtiz njinaante agelem boot reena.

Abek takirnya boot o Yesu

⁶² Ma neertine co ɔɔɔt alaata o ceer o Joowo ki ol o Parici njai Pailat. ⁶³ Ma avo anek nɔɔɔɔ ne, “Manygɔn, azi baale voloŋoiti nici iinyaye baal njan arogni e ne, Kiŋaaz bodo iima daayiza iinyaye ceen iiyu. ⁶⁴ Inoko zin karoŋnyin anyek takirnya koot kebeyit boot juruŋ zee ma adicai iinya ceen iiyu baal aduwa niini o, ka calaŋ avo agɔɔɔz nuyawa ogine, ma avo anek ol ne, Itiŋa niini daayiza. Mā agɔɔn niigi noko, izi koca vɔlɔŋ cineeŋ o appe ɔɔɔt bar kujuk baal aduwa niini e, ma uulalet.”

⁶⁵ Ma anek Pailat nɔɔɔɔ ne, “Anycek zin takirnya koot kebeyit boot juruŋ.”

⁶⁶ Ɔɔɔɔɔ ni niigi ɔɔt boote o adawin Yesu e, ma avo agiir boot otok dook lai juruŋ ka kɔkɔm eet ci akol, ma ooŋnek takirnya njinite kebeyit.

Njaazi o Yesu daayiza

28 ¹ Ma iitene o yubzento neere ririwɔna ook Meri o Magdala been bodo Meri oma ka koot kicinit boot. ² Njintimiliny noko ɔɔɔɔɔ lɔɔci dook kirakirak. Ma akunak toonnyaiti ci Joowo looc tamma, ma aku aara be baal anyoogi ol boot otok e, ma aave. ³ Maje njum ci toonnyai nico o alanyit kiyo abadi bɔɔɔye o, ma vɔɔre rumane cigine o per. ⁴ Ma aruk takirnya o abek boot e kulurkuluri, kabaritit, ma iina katarŋguzɔ kiyo ol o adaai o.

⁵ Ma azoozek toonnyaiti njai anek ne, “Mā aŋolinu looc gaga. Kaga noko avu aroŋnyu Yesu baal adɔdi talakeca e. ⁶ Azee zin niini to njina. Itiŋa daayiza ebaal aduwan niini e ele. Ivita di icinit njinbaal ɔɔŋe e ce. ⁷ Iyiyit zin inoko taman ɔɔɔt uduktak nuyak ogin enektek ne, Itiŋa niini daayiza. Ma inoko araye njatunooŋ ook Galiliya. Avɔ tedec acinu niiga nɔɔɔɔ njinaante. Inoko zin gi ci kaduwakuŋ dook neen nici.”

⁸ Iyit ni njai nici ɔɔɔɔɔ boota njina njoliinta, maje njato atalne. Ma adokony ka koot kuduktak nuyak. ⁹ Njintimiliny noko ɔɔɔɔɔ Yesu nɔɔɔɔ booyonyoŋ, ma anek ne, “Abonanu. Abil ganɔn njatunooŋ.” Ma avunak niigi nɔɔɔɔ, ma avu atorkot zɔɔ, ma adiŋdiŋan. ¹⁰ Enek ni Yesu nɔɔɔɔ ne, “Mā aŋolinu looc gaga. Ɔɔɔt uduktak nuyak kivita koot Galiliya. Njan avo acinan niigi aneet njinaante.”

Aduwa takirnya o abek boot vɔlɔŋ

¹¹ Mazi njan avo njai gola noko, odokonyit takirnya ogen takirnyaye ona abek boot e ɔɔɔt Jerusalema, ma avo aduwak alaata o ceer o Joowo kaal ona acin niigi agooni e dook. ¹² Mazi azii alaata gi nico, ulute niigi dook ki alaata o Juz njatodoi, ma abaabana zɔɔɔ codoi. Ivita ni otoloyit takirnya anycek guruc ci meelik ger. ¹³ Ma anek nɔɔɔɔ ne, “Mā ajinuŋ ol, enektek ne, Ivita nuyawa o Yesu ogoroziit nɔɔɔɔ boota baal njai koogina. ¹⁴ Mā arum alaan zɔɔɔ nici, njan kavɔ kazoozona ki ageeta. Mā anyaku njoliin gaga zooze nico.”

¹⁵ Agamta ni takirnya guruc nicoko, ma avo aduwa vɔlɔŋ eona aduwake alaata e. Zin vɔlɔŋ cineeŋ noko uteec ol o Juz zee been waanico o.

Ayelzak Yesu ele nuyak ogin

¹⁶ Ma avo nuyawa ween amɔtɔ codoi biye o abil Galiliya njabaal aduwak Yesu nɔɔɔɔ ka kooti e. ¹⁷ Mazi avo acin niigi Yesu, njinaante idiŋdiŋanit nɔɔɔɔ. Maje ol ogen njatineeŋ njan bakbaye noko. ¹⁸ Ma icayak Yesu nɔɔɔɔ ajonun, ma anek ne, “Anyozozeyan alaazet dook tammu tadena been loota aneet. ¹⁹ Ɔɔɔt zin ole o loocok dook ka anycek nɔɔɔɔ kiziti nuyak cigan. Otoonyit nɔɔɔɔ zaare o baaba ki zaare ogan aneet neerin been zaare o Vɔŋiz o Joowo. ²⁰ Ɔɔɔt edemeziit nɔɔɔɔ ka kuzuuti kaal ci karicanekuŋ naana igeet noko dook. Abon zin niiga agayu karome tiŋeere naana ki igeet tup noko zee ma aŋorneke lɔɔci.”